


# KIKA KYO TWABUJILA

## KWIKALA DINOMINESHENI?

 Kejishuko ja kubwela kuno ku pulupiti ne jikwabo, papita nobe, Naketekela, pepi nobe bang'ondo basatu kwakubula kutanwa kuno. Baluyeye bajinga na kimye kyakosa, pamotu ne Amiwa. Oo, ke kukokoloka, nangwa byonkabyo, pano, kabiji ke kumvwa nobe kukeba kutwela mumwingilo jibiji. Kabiji kuketekela kuntendeka awe mulungu ubena kwiya, bufuku Pakisatu kibena kwiya, na mambo a—akusangululwa ponka pano pa tabbanako. Inge Lesa waswa, Njina musango wa . . . Aye Nkambo wandaya yapusanako kabiji nyingijilo ipya. Kabiji umvwe Aye kya mutokela kumuchima kwi kyuuba, Naketekela kutatula kuba yewa—yewa musango upya wapwijilo awe mulungu ubena kwiya, ponka pano pa tabbanako, po pafwainwa kwikala kifulo kitanshi.

<sup>2</sup> Kabiji pano, Amiwa kechi njipo na mbung'eno yatachikilwa jimo ne, kana yonka ya ku Australia ne New Zealand, mu Kakubokache kabena kwiya. Kabiji ne Mulongo Osborn ubena kwita mbung'eno ya kukwatakana pamo yo Namulaile kuno kimye kyapita kunyuma, mu Tulsa, bino palutwe kacheche, bino kechi kyakiyukanyikwa bulongo pa kikye ne.

<sup>3</sup> Kine kyajinga kyawama, Mulongo Jeffreys, pakuuba mba twiyimuna mumaboko akwe kunyuma, kabiji ne pa kumvwa songwalume wenu kwimba yewa lwimbo, ne obewa wajizha piyano. Amiwa natemwa kyokya, shaji ne mwaana. Anweba kechi mwikitemwa kyo nenyi? “Komesheshai mwaana mujishinda jo akonsha kuyamo.” Akyo kiji bulongo, Ba. Guenther, anweba—anweba mwayuka mba akye kiji bulongo, anweba bonse babiji. “Komesheshai mwaana mujishinda jo akonsha kuyamo, kabiji inge wakoma kechi ukafumamo ne.” Kabiji akyo kyabukiine. Kuji kimye kimo kyo akonsha kufumamo, bino kechi kikafumako mwiaye ne. Mwamona? Kikekalanga—kikekalanga nanji kimye kyonse. Alwa lufunjisho lwa pa bwanyike kabiji ne byonse byo abuulwa kuba, bikekalanga—bikekalanga nanji kine. Pano, akye kyo . . .

<sup>4</sup> Nasambakene Mulongo Jeffreys kokwa, kabiji Naambile mba, “Mulongo Jeffreys . . .” Nalanguluka mba, anweba mwayuka, Njiwa lusekelo pa kumona yense mulongo mwenyi mukachi kentu, bino bufuku bwa uno musango mulongo mwenyi kwiya! Abwe ke bufuku bwa balunda abo beya ku tabbanako, kasa tukyanye kutendeka kuno kusangululwa. Abwe ke bufuku . . . Twakeba kusenda bufuku buno, ne keesha lukeelo, kabiji apa ne bufuku, kuyatu mubyoby byo twaketekela

pano pa tabbanako, ku—kupitulukamotu jibiji. Atweba tuji na byo twaketekela bimo byapusanako bingi, byenyi bingi, bino mu musango umo nangwa mukwabo twibitana mu Baibolo. Bimweka kutanwamo bulongotu.

<sup>5</sup> Kabiji pano, inge mwakonsha kutanwa mulongo mwenyi nangwa nyenga muno, ao utanwa ku dinominesheni ikwabo, nangwa—nangwa wabula kwitabizha, ao watanwamotu bufuku bunu, twasaka anweba muyuke amba mwatambulwilwa bingi bulongo. Monai, mwatambulwilwatu bulongo byo kyafwainwa kwikala. Bino pano Naketekela. . . Kabiji akye twikikoshesha bingi. Nanchi inge kyamweka nobe kechi mwikitabizha ne, kyawama, pano, mwauba kyokyo nobe byo Nguba inge Mbena kuja paai wapilipili. Kabiji inge Mbena kuja paai wapilipili, ye natemwa bingi, kimye kyonse Amiwa, inge Amiwa . . . Inge Naja paai, inge Nasuma mu lutetele, Amiwa kechi taya paai ne. Amiwa—Amiwa tayatu lutetele kabiji ntwajijilatu nakuja paai. Nanchi, nangwa nobe kuja zoolo. Bino, anweba bonse mwatemwa zoolo, mwamona. Kabiji umvwe wasuma pa kikupa, kechi uleka ne, obewa utwajijilatu na kuzhokoloka kikupa kabiji ne kutwajijila na kuja zoolo. Kyawama, ajo jo jishinda jakubilamo bufuku bunu, kyo Mbena kwamba papo, anweba mwaubatu . . . umvwe mwasuma pa kintu kimo, mwamba mba, “Pano, Ami—Ami kechi nguba . . . Amiwa naikalatu mu kikye, nobe Mafunjisho acheche a kipwilo, mu mbung’eno isatu ibena kwiya. Babena kubatu nobe babena kupitulukatatu mu byo—mu byo baketekela, kabiji ne kubwelulukamotu.”

<sup>6</sup> Kabiji jishindatu jimo jo mwakonsha kulengela muntu kwi Kiketekela, ke kwikyamba na bulume poso bayuka mba Akyo kyo kintu kiji bulongo. Ajo jo jonka jishinda ja kwikilengelamo kyaimana. Pamotu nobe mulunda nami, Mr. Wood ye Najinga nanji; inge wapopatu musumali kichika, kabiji kipabi kyaikalatu kibena kupepela, lubesha wakonsha kwikilelwila panshi bukiji bukijitu. Bino wafwainwa ku mupopa watiwela, ku mukosesha bulongo. Nanchi pano inge Amiwa naamba na bwitote pa bintu bimo, kabiji kwi anweba benyi betu bufuku bunu mwaikala muno, Amiwa—Amiwa kechi mbena kwimutaya ne. Amiwa mbena kwesekatu kwibikoshesha mu kino Kipwilo bintu byo twaketekela. Bonse bekyumvwa bulongo kikye, ambai mba, “Amena.” [Kipwilo kyaamba mba, “Amena.”—Waku.] Kijitu bulongo. Abyo—Abyo ibyo. Kabiji pano fumyai bibye ku maboko ami. Kabiji pano—pano . . . Babena kwibifyatula, ne bikwabotu, amba kulutwe, inge bakeba kutana bintu po twaimena, kabiji ne pa bishina po twaimena, abye byafyatulwa bikalondolola. Kabiji pano tuba bibye bimye byavula, mambo mwiya bantu bakatataka kabiji—kabiji tuya kulutwe. Pano bino kechi tusakupituluka mu mafunjisho onse a Kipwilo ne, bino amo amotu otusaka kwa—kwambapo. Kabiji bino, Pakisatu bufuku, nangwa, kutapila . . .

7 Pano, Pakimo ne Pakibiji, Amiwa katatula, kulombelela, mwinengezhe mu mpwijilo ya lubuko. Kabiji mwakonsha kwikala pa mafoni, nangwa pose po mwakeba, kabiji mwafwainwa kuleta muntu unji yense ye mukeba, kukuukwe kusangululwa kubena kwiya. Kabiji mwafwainwa kwibabula mba kechi bakonsha kwiya bya lubilo lubilo ne, kechi kwiya, amba, “Kyawama, pano Nsakyapo bandombelele, bufuku bunu. Kabiji keesha bufuku, ke byonse. . .” Kechi mwakonsha kuba kyokyo ne. Mwafwainwa kwiya ne kutelekako pa kakimye, mambo tukeba kutekanya ne kubika akya Kyambo pepi pepi kyakuuba mba diabola kechi wakonsha kwikalapo na mpuzha nangwatu pacheche ya kwenda ne. Kabiji pano inge mwaleka lwitabilo lwenu lwaya kufikatu ne ku mpelo, poso watatula kuketekela, pano mwaleka buyuke bwa milanguluko bwatatula kubila monkamo, nanchi lwitabilo lwa Lesa lukekala kunyuma yakyo. Apo po mukatwajijila kuya kulutwe. Mwamona?

Mambo, lwitabilo lwenu kechi lwakonsha kwingila pabaya ne. Buyuke bwa milanguluko yenu bwafwainwa kwendela monka muyila lwitabilo lwenu, kabiji pano lwitabilo lwa Lesa lulondela panyuma ne kwikikajika. Mwamona? Pakuuba, inge lwitabilo lobe, “Oo, ee, Njinalo ponka pano!” Kabiji ne buyuke bwa milanguluko yobe, bubena kubwela kunyuma kukwe, amba, “Nazhinauka kana kisakwingila pe amiwa.” Kechi kyakonsheka kwi kyuba ne, ponkapotu. Mwamona? Nanchi tubena kukeba aaye kwikala yiine mpwijilo ya lubuko. Kabiji Amiwa kasa kyangye kubikapo umo muntu mubibamba, ne bikwabotu, na mambo alubuko, nangwa iye mpwijilo ipya, Nakeba kuuba mba bayukishetu kyo babena kwishila momo. Nanchi mwavuluka, kwiya na kwitupepula, kabiji tukekala na lusekelo pa kutanwa nenu.

8 Pano vulukai, pano, mu lukeelo kelo, tukatwajijilatu na Lufunjisho lwa kipwilo. Kabiji keesha bufuku neapo kintutu kimo. Pano anweba mwatambulwilwa kwiya, kabiji uji yense wakonsha kwiya. Kimye kyonse twaikala balusekelo kumona uji yense. Pakuuba pano bunu, bufuku, bya letwatu ku bantu ba muyino tabbanako kuno, aba—aba bakomena mululwe Lufunjisho. Mambo, byo tuya mu mantanda, mu busapwishi bwa muntanda, tutolatu bishinankata byaitabilwa, Mafunjisho abusapwishi bwa mu Binembelo. Bino pano pa tabbanako, ntuji na milanguluko yetu atweba bene kabiji ne byo twaketekelamo, nobe—nobe—nobe kipwilo, kabiji abyoy byo tusakupitulukamo, bufuku bunu.

9 Kabiji kasa tukyangye kushikula Kyambo Kyanji kyapeshiwa, bushe kuuba twakunyikatu mitwe yetu pa kakimye kacheche mu milombelo nenyi?

10 Wabulume bonse kabiji Lesa wangovu, Ao, ntanda kasa kyangye kutatula kuzhokolokela pa atomu mutanishi ne, Anweba mwajinga Lesa. Anweba kechi mwapipulwapo

nangwa pacheche ne. Kabiji kasa byo kukabula ma atomu a kwiikwachijila pamo, kabiji kechi kukekala ntanda ya kukwata ne, Anweba mukekalatu Lesa. Anweba mwi bamyaka ne myaka, kabiji kufuma ku myaka ne myaka. Anweba mwi Lesa. Anweba kechi mwajinga na ntendekelo ya moba ne, nangwa mpelo ya bumi ne. Anweba kimye kyonse byo byo mukekala. Kabiji, Taata, Anweba byo muji babula mpelo, kabiji atweba tuji na mpelo, nanchi twaipuzha lusa Lwenu lwa Bulesa, Lesa, twavuluka mba awe mupashi wetu ukakwatakana na Peenape, kufuma mu kimye kya kimye, kuya mu Peenape. Okao mambo, Nkambo, tuji kuno pakuuba mba tupesepese lupulukilo lwetu, kumona byo twaimana kumeso a Kyambo Kyenu, kabiji byo twaikala na bintu byo tupitamo. Bushe tubena kwikala kya kwimutokesha pa muchima Wenu nyi? Bushe mupashi wetu ushimuna pamo na Mupashi Wenu nyi? Kabiji kana kufujisha kwetu kushimuna pamo na yuwe Baibolo nyi? Kabiji, Taata, lekai tupimepime byonse bibiji, pepipepi, mumbung'eno isatu ibena kwiya. Kiswishai kye, Nkambo.

<sup>11</sup> Peshai kafunga kuno, bakwashi, baketekelwa, kabiji ne bonse bamembala, bantu beya ku kino kipwilo. Kufuma mu moba ami kuno, Nkambo, muji bavula, bavula bo Nabula ne kuyuka mazhina abo, nangwa kwepi kobafuma, bino Amiwa naketekela mba Anweba mwayuka byonse pe abo. Kabiji tuji pano na mambotu akitu kimo, bufuku buno, Nkambo, ke kwikala nalumvwang'ano pa Kyambo kyanembwa. Kabiji tupai Mupashi Wazhila mu bumi bwetu, pakuuba mba twikale na mutende, kabiji batekanya, kabiji ba kwakamwa Lesa, ne kupesapesa bumi bwetu monka mu Kyambo Kyanji. Kiswishai kye, Nkambo.

<sup>12</sup> Kabiji mu kino kishimikwa, bufuku buno, Nkambo, muji balongo bami ba bimye byapusanapusana bya—bya kipwilo. Kabiji, Nkambo, Amiwa nansata bingi byobaji muno mu lumvwang'ano lwa bupompweshi. Kapepo twakonsa kubula kuyila mumo pa bishinakata bicheche bya Lufunjisho. Bino mu kyonka kimo kishinakata kikatampe, twafwainwa kwimana pamo balongo bakwatakana babena kuya kulutwe. Amba, Anweba Lesa, lekai tukoseshe lwetu—lwetu lumvwang'ano lwa bupompweshi, kabiji wetu... kabiji ne fungwa ya lusa lwa Lesa ne butemwe bikale byavula pe anweba. Pano, vulukai, Nkambo, awe ke mwingilo wakosa bingi muntu pa kuba mba a mwingile, mambo tuji na kimo kya kulangulukapo, bufuku buno, kwakuya mye ayo ibena kuya ku Peenape. Nanchi twalomba mba Mupashi Wazhila usakwitutwezha mu Kyambo, kabiji usa Kwikyashika ne kwi Kilondolola mu Jishinda Janji aye mwine, kwi atweba, bintu byo Asaka atweba mba tuyuke. Kiswishai kye, Nkambo. Kabiji inge abye bisatu... bimye bya kupwila byapwa, lekai tuye nobe kipwilo kyakoseshiwa, nobe bakwatakana pamo, ne kubika michima yetu kabiji nkebelo yetu

pamo, na balunda netu bangikazhi ba mu Bumfumu bwa Lesa, ne kuya kulutwe kukila byotwajinga kunyuma.

<sup>13</sup> Nasaka kwi musachila Anweba, Nkambo, muno ku meso kipwilo kabiji—kabiji ne pa bantu batanwa kuno, Anweba byo mwampele milungu yavula yawama ya ku kokoloka. Naumvwa bulongo bufuku buno mambo Akyeenyi Kyenu ne mapesho Enu. Anweba Lesa, twalombelela mulongo papo, mulongo wetu ubena kuya kubushiya bwa tulunga twa meema, mukachi mwine mufishi, byaalo bya lukungu, aako bumi bwanji bwafwainwa kwikala ke pa kufikila bulwanyi. Anweba Nkambo, peshai Mulongo Jeffreys byo abena kuya, ne mwananji, ne bakazhi banji, kabiji mupai byananuka. Lekai asabe bipeze monka mufishi poso Kyeya kya Mamboawama kikasame palepa kabiji pabaya. Tumvwai, Taata, mambo twaipuzha kikye kyakukabila mu Jizhina ja Nkambo Yesu, Mwaana Wenu. Amena.

<sup>14</sup> Pano, bufuku buno, kutanga mu Scofield Baibolo wami wamucheche. Napitatu pa myaka tweti-faivi, katataka. Kabiji Nakonsha kumutanga, bino tumalembo tumweka tuheche bingi. Nanchi Njina magalashi akutangilamo inge Mbena kutanga, kabiji Nsakumona kana asakwingila byepi bufuku buno, pa kimye kyami kitanshi.

Pano Njina mitwe ya byambo, nobe bibye, amba, “Kyafwainwa Kipwilo. . .” Oo, bintu byavula, inge twakonsha kufikapo. Umo wayo ke, “Kika kyo twatelelwa mba Kipwilo? Kika kyo twabujila kwikala dinominesheni? Kika—kika kyo twaketekela mu bukikizhi bwa Peenape bwa mweo wa waitabila? Kika kyo tuzhachishisha banabakazhi basapwishi? Kika kyo tubatizhila kwibizha mu meema? Kabiji bushe Kipwilo kikapita mu Lumanamo nyi?” Kabiji ayo mitwe yavula papo, Naketekela Njina na fifitiini nangwa eitiini, pa mafuku acheche alondelapo.

<sup>15</sup> Nanchi Mbena kulanguluka, bufuku buno, kya kutatwilapotu, kya kuntendekelepo, kyamweka nobe Nkambo wikibika mu muchima wami na yuwe mutwe, aye. . . *Kika Kyo Twabujila Kwikala Dinominesheni?* Ene mambo ke. . . Bino, kechi tujipo na kintu nangwa kimo na bantu bakwabo baji na budinominesheni ne. Atweba kechi tujipo na kintu kimo nabo ne, bino Mbena kukeba kulondolola kika kyo twabujila kuyapo nangwa na dinominesheni imo ne. Amiwa naikajikilwe busapwishi mu kipwilo kicheche kya Baptist, nobe byonka byo mwayuka. Kabiji Baptist kechi dinominesheni ne, kechi byo kyajinga ne, kanatu katataka, kabiji pa kino kimye kya alukatu ke dinominesheni nobe bikwabo byashala. Bino, ene mambo kyo twabujila kwikela ke dinominesheni. . .

<sup>16</sup> Bino, atweba twi kabungwe. Atweba twi kabungwe, ka nembeshiwa kuno mu—mu kinje kya mambo, nobe kabungwe, jibumba ja bantu babungakana pamo mu kupopwela Kilishitu, bino kasa twabula dinominesheni. Kafwako nangwa

umo ukekala naluusa pe atweba ne, mwamona. Kechi ke dinominesheni ne. Ke—ke kabungwetu, lwamvwang’ano lwa pakachi ka Benakilishitu baitabila. Bantu beya kuno ku kipwilo. Kabiji a kino kikala ke kipwilo kyabo inge basaka kwiya, kikulutu banji na bumi.

<sup>17</sup> Kabiji bakonsha kwiya kuno kabiji ne kujimbulula byonse byo tusapwila. Akyo kijitu kyalumbuluka. Anweba mwaikala, kikulutu anweba mwi Benakilishitu, anweba muji na lumvwang’ano, kabiji muji nalubaji nobe bakwenu bashala. Mwamona? Inge Naamba namba Naketekela mu lubatizhilo lwa kwibizha mu meema, kabiji anweba mwaketekela mu kusansa, kabiji mwaikela ku kyonkakyo, twakonsha kwikalatu bonse pamo nobe twaitabazhanya. Atweba kechi twakonsha kumona jiso—pa—jiso, mu musango umo ne. Bino kikulutu obewa wi mulongo Mwinakilishitu nangwa nyenga, anweba mwatambulwilwa bingi bulongo, monai, yense muntu.

<sup>18</sup> Nanchi atweba kechi tujipo na dinominesheni uji yense ne, mambo Nalanguluka mba dinominesheni yabanya butemwe bwa balongo. Bamo ba mwiabo baamba mba, “Kyawama, atweba kechi tujipo na kyakuuba na kukwe kusangululwa ne. Akwa ke kusangululwa kwa ba Methodist.” “Kyawama, akwa ku ba Baptist. Atweba kechi tujipo. . . Atweba twi ba Methodist. Atweba kechi tujipo na kyakuuba nakyo ne.” Mulongo, inge Kilishitu uji monka, atweba tuji—atweba bonse tuji na kyakuuba nakyo. Twafwainwa kutuula byetu. . . Ke—ke Mubiji wa Kilishitu ao u—ubena kumanama. Kabiji Namona mba byavula mu ntanda leelo, byo tuji nabyo. . . Pano, Kilishitu kechi waubilepo, kimye kiji kyonse, kechi wabungikilepo kipwilo kya dinominesheni kiji kyonse ne. Pano, lekaitu kyokyo kikale kyashiniikishiwa.

<sup>19</sup> Pano, pano, Amiwa ke mwipuzha keesha bufuku, inge mu bibye bintu muji byo musaka kuyuka, nangwa biji jishimikila ja byapita kunyuma byo Mbena kwambula, nangwa kintutu kikwabo. Amiwa kechi jipo na kimye kya kupwisha byonse bulongo ne, abya kechi Nsakuya pa mutwe mukwabo ne, mambo wakonsha kupwisha milungu pa mutwetu umo. Bino inge mubena kukeba kuyuka mpuzha, nangwa kiji kyonse, ngipuzhaitu, ne kwikibikatu papo pa—pa desika, kabiji Amiwa nsakupana mukumbu wenu.

<sup>20</sup> Pano, dinominesheni wabandisha, kabiji ne kipwilo kitanshi kya dinominesheni kyo twaikele nakyo, ke kipwilo kya Katolika. Kabiji kyaalwilwe bu kabungwe pa kupitapo myaka fiili aduleendi ne ikwapo panyuma yakufwa mutumwa wapeleleko. Kabiji abyo ibyo. Mwakonsha kwikitana mu Bashakulu batanshi ba ku Nikeya, kabiji mwakonsha kwikitana mu byanembwa ne Josephus, kabiji, oo, ne bavula ba—bakatampe ba namba mashimikila abintu byapita kunyuma. Mwamona? Kabiji mwaila ma—ma. . . mankulo abipwilo aji onse, kwiyatu

kufika ne kulufu lwa mutumwa wapeleleko, kabiji ne myaka fiili aduleendi kulubaji lukwabo lwa batumwa, akwa kechi kwajingapo bipwilo bya dinominesheni ne. Kabiji Katolika ye wajinga dinominesheni mutanshi wa kipwilo.

<sup>21</sup> Kabiji kipwilo kya Polotesitati ke madinominesheni afumine mu dinominesheni. Kupangulula kutanshi kwaikeleko, kwajinga Luther; panyuma yakwa Luther kwaiya Zwingli, panyuma yakwa Zwangli kwaiya Calvin, kabiji kyatwajijilatu kuya kulutwe muyekawa musango. Kabiji kufikatu ne ku Kusangululwa kwakwa Wesley, kabiji kufikatu ne kwi Alexander Campbell, John Smith, kabiji ne-bakwabotu, mwamona, kuyatu kulutwe. Kabiji ndoonda yapelako yo tuji nayo luno ke misango yapusanapusana ya nkulo ya Pentekosito.

<sup>22</sup> Kabiji Naketekela mba Lesa waingijilenga na nkulo iji yonse. Bino inge mwakonsha kumona, kimye kyonse kipwilo po kyakakelwe, kyajinga aku bekyalulatu bukabungwe batatula kukakalwa ponkapotu? Kabiji umvwe bakakalwatu, Lesa kechi wikimika akya kipwilo jikwabo ne. Kiyaatu kyaikala ke lukunwa. Pano anweba . . . Inge mukeba kuyuka jishimikila pa kyokyo, twa—twakonsha kuleta, kyakuuba mba—kyakuuba mba kafwako kipwilo, mwaila mashimikila abipwilo, apo dinominesheni uji yense waponene ao waimenepo jibiji. Baptist, Methodist, Presbyterian, Lutheran, kiji kyonse, byo baponene, nishi bayijijila. Pano, abyo ibyo. Pano, akye, Ne—Ne mubuula pano, mvwalai majekete, mambo tusakwikikosesha. Mwamona? Kechi kwakikalapo, nangwa kimye kimo ne. Akyo muntu kyo alupukilemo nobe muntu pa bunke ne kulenga kipwilo kya bukabungwe, byo kyatatwile.

<sup>23</sup> Lesa wingila na muntu pa bunke, kechi na dinominesheni ne. Lesa kechi kwakikalapo nkulo ao yoaingijilepo na dinominesheni ne. Aye kimye kyonse wingilatu na umo umo. Mu Lulayang’ano Lwakala, Aye waingijile na umo umo. Mu Lulayang’ano Lupya, Aye waingijile na umo umo. Mu nkulo iji yonse, Aye waingijile na umo umo, kechi na madinominesheni ne. Nanchi, onkao mambo, inge Lesa kechi uji mu dinominesheni ne, ing’anyi mwingilo wakwikela nakyo nobe dinominesheni? Pano, Amiwa kechi mbena kwamba pa bantu muyewa dinominesheni ne, Mbena kwamba na dinominesheni aye mwine, mambo akuuba mba bantu ba Lesa baji monse mwa mudinominesheni.

<sup>24</sup> Pano, Lesa kechi uleka kintu nangwa kimo kubiwa ne kanatu Aye wapana lujimuno pa kikye. Amiwa kechi naketekela mba kujipo kintu kimo akyo . . .

<sup>25</sup> Pano, nobe byo tuji na makatazho afumamo, mu bipwilo, nobe byo twajinga na lukatazho lumo katatakatu pa mashi ne manyi, kabiji ne bikwabotu. Kabiji mwayuka “Mutemwe Mulongo Branham” kalata, kabiji ne bikwabotu. Pakuuba enemambo kyo Nabujiile kuswisha kyokya, mambo kechi kiji

mu Kyambo ne. Kabiji ao oene mambo kyo Naikela wabula kuswisha dinominesheni, mambo kechi kiji mu Kyambo ne. Kabiji kyafwainwa kwikala na kintu pa kwimena lwitabilo lwetu. Kabiji inge kechi kyakonsha kwikela pa dinominesheni ne, twafwainwa kwikimikila pa Kyambo kya Lesa. Mambo Akyo kyo kitendekesho kyonka, ke Kyambo kya Lesa.

<sup>26</sup> Kabiji umvwe Kyambo kya kwa Lesa kechi kyaambapo pa dinominesheni ne, pakuuba kyaamba kubula kuswisha dinominesheni, nanchi twakonsha kwambatu na Kyambo. Kechi oene mambo ne nangwa bishopu, kyaamba uji yense, kyalanguluka uji yense, kyaamba muntu wawama, kyaamba kintu kiji kyonse, inge kechi kyaila mwaikela Kyambo kya Lesa ne, nishi ke kintu kyatama. Mwamona? Kyafwainwa kwikala, Kyambo kyafwainwa kwikala kintu kyapelako. Kyambo kya Lesa kyafwainwa kwikala amena wapelako.

<sup>27</sup> Pano vulukai, Amiwa kechi mbena kubuzha bwinakilishitu uji yense (mwaumvwa kyokyo) mu madinominesheni ne. Amwa muji teeni sauzande myeo yawama mu onseo madinominesheni, abo banji baana bakwa Lesa. Pakuuba kwibaabanya kabiji ne kwibapatulula, Amiwa kechi ne kiswa ne. Kabiji Kyambo kya kwa Lesa kechi kyaswisha ne.

<sup>28</sup> Kabiji Naketekela mba kechi kujipo ndengelo ya kabungwe kaji muntanda buleelo, kechi kwajingapo ndengelo ya kabungwe muntanda, kanatu yaambijilwe jimo amba ibena kwiya, mu Kyambo kya Lesa. Naketekela mba Kyambo kya Lesa kipana bintu byonse byo tukeba, monkaamwe mu Kyambo. Kufumatu. . .ntendekelo yetu kufika ne ku mpelo, byatanwa monka mu Kyambo kya Lesa. Kabiji pano Na—Naketekela mba inge biji mu Kyambo kya Lesa, nanchi twafwainwa. . . Kibulang'ena jimo. Kabiji Kyambo kya Lesa ke lujimo.

<sup>29</sup> Bino, kechi tutanga Kyambo kya Lesa nobe ubena kutanga kipepala kya majashi ne. Tangai Kyambo kya Lesa na Mupashi Wazhila, monai, mambo Mupashi Wazhila Ayemwine wamba kupichila mwi Kilishitu. Kilishitu ke kusachila Lesa amba Aye wibifile abye bintu kumeso abamaana ne bajimuka, kabiji ne kwibisola ku balukeke bakonsha kufunda. Nanchi, mwamona, kechi kujipo jishinda ja kuuba mba kana wafunda ne, kechi kujipo kuuba mba kulenga kabungwe ne. Kujitu jishinda jimo ja kubilamo bintu bulongo, kookuba mba, kutangijilwa na Mupashi wa Lesa. Kabiji kyonse kyakupitamo kyo wajinga nakyo kyafwainwa kwesakana pamo na Kyambo. Mwamona? Apo nishi uji nakyu. Mwamona?

<sup>30</sup> Kijitu pamo nobe inge twabwela panshi papo mu mamineti acheche, tubena kwingila na bantu baji—baji. . .Bamo ke booba baimena pa Kusalulwila jimo kwa Lesa, bamo baimena pa Kusalulula kwa muntu, ne—ne mashinda avulavulatu. Pano, kimye kyonse kuji, nangwatu uchibe ka kibabulwa kacheche, ne ako kaji na mbaji ibiji. Abyo kine ibyo. Kabiji bonse babiji baji na



mbaji yakupachikilamo. Bino, kine kitu ke, kwepi kuji Bukine bwakikye? Ako koko tubena kwiya, kotulanguluka, kupichila mu lusa lwa Lesa, twimumweshwa Bukine bwa kikye. Pano twayai tusende. . . kabiji apo Njina amo mafunjisho a kipwilo anwembwa.

<sup>31</sup> Twayai tuzhikule mu ma Baibolo enu, nobe pa mamineti acheche, anweba bonse. Kabiji twayai tuye ku Lumwekesho, kyapitala kyabu 1; nangwa Lumwekesho, kyapitala kyabu 17, pa kutatwilatu. Kabiji twayai tutatule kutanga tumone pa tatwijile bibye bipwilo, kabiji kika—kika kubitapile. Bino, Baibolo wapaina jimo lujimo pa bintu byonse. Wapana lujimuno pa moba o—o twaikalamo. Kabiji pano, Lumwekesho, kyapitala kyabu 17, inge mwakonsha. Najikwamba mba kyabu 13, kechi Najikutazha mukyokyo ne, akyo kiji pa. . . Tusakufika pa kyokyo mukakimye kacheche, ne akyo, akyo ke mu bungauzhi bwa United States. Pakuuba pano telekeshaitu bulongo.

*Kabiji kwaishile kwi ami umo wa aba bamalika sebeni bajinga na michiba sebeni ya myalo, wang'ambila amiwa, amba. . . Iya kuno; ne Amiwa nkubule. . . obewa luzhachisho lwa awa pite mukatampe waikala pa meema avula:*

<sup>32</sup> Pano vulukai, akye kyaumvwanika bu kyafyamika. Pano awe mwanamukazhi wayukanyikwa-nabyubilo byatama, pano, inge tusakufujisha bibye, mwafwainwa kuyuka kilumbululo kya masimbo. Pano, *mwanamukazhi*, mu Baibolo, kyaimenako “kipwilo.” Baanga bayuka mba, twi Musongwa? Akyo Kipwilo ke Musongwa.

<sup>33</sup> “Iya kuno kabiji Nsakukumweshwa luzhachisho.” Pano, kukekala luzhachisho lwa pe yewa pite mukatampe, mwanamukazhi wabubipisho waikala pa meema avula. Pano, *mwanamukazhi* kyaimenako “kipwilo,” kabiji *meema* aimenako “bantu.” Pano, inge mwikimona, ne akyo, talai, veeleshi wabu 15 mu kimye kyo mukijipo, veeleshi wabu 15, kyapitalatu umo.

*Kabiji aye wang'ambijile amiwa mba, Aa meema o wajikumona, paikala pite, ke bantu, . . . mabumba, . . . mikoka, kabiji jimi. (Mwamona?)*

<sup>34</sup> Pano, akye kipwilo kikatampe, mwanamukazhi mukatampe, pano vulukai aye ke mwanamukazhi wayukanyikwa-nabyubilo byatama. Kabiji inge mwanamukazhi waimenako kipwilo, (kabiji Kipwilo kya Kilishitu ke Muson gwa, Musongwa wazhila), nanchi awe ke mwanamukazhi wabula kuzhila. Nanchi wafwainwa kwikala wabula kuzhila, ubena kwifwanyikizha kwikala, musongwa. Mwamona? Pano, ubena kuba ka? “Waikala pa,” nangwa kwikala *peulu*, kyalumbulula mba, “kwikala na bukalama pa meema avula.” Mu ng'ambilo ikwabo, uji na bulume kupichila mu mikoka ne jimi kabiji ne bantu. Aye ke muntu wakila, awe mwanamukazhi byoaji.

Pano, *aye wauba bulalelale na bamamfumu ba panopantanda, . . .*

35 “Mambo ba mamfumu ba panopantanda bauba bulalelale,” bantu banoshi, bantu bakatampe byo bauba. Mwauba byepi, nga mfumu wakonsha kuba byepi, bulalelale na kipwilo? Ke bulalelale bwa ku mupashi. Bumupashi! Ngaa bulalelale bobuka? Ke, kyawama, kiji pamo nobe mwanamukazhi wabula bukishika ku mulume wanji. Aye ubena kwikala na mwanamulume mukwabo kasa anji na mulume. Kabiji akye kipwilo, nanchi, ki—kibena kwifwanyikizha kwikala Musongwa wa Kilishitu, kimye kyo abena kuba bulalelale na bamamfumu ba panopantanda, na ngikelo yanji yakowela, lushimuno lwa kowela. Oo, Ke kintu kyazhika kabiji Kiji na byavula. Natemwatu Kyambo. Pano monai.

*. . . aye bamamfumu ba panopantanda bauba nanji bulalelale, kabiji ne bekala panopantanda batoma ku binyu bya bulalelale bwanji.*

36 Byanji “binyu” ke byobya byo abena kupana, lutundaiko lwanji, “Atweba twi Kipwilo! Atweba yetu ntuji nakyu.” Mwamona? Pano, kibikaitu akyo mu milanguluko yenu. Kijitu bulongo. “Nanchi aye wase- . . .”

37 Pano, malaika wabuujile Yoano mba, “Nsakukumweshwa alwe luzhachisho lubena kwiya ku kikye kipwilo kikatampe.” Pano tajishai.

*Ponkapo aye wasendele mu mupashi mungyetu: kabiji Namwene mwanamukazhi kasa aikala pa lukinyama wachijisha, . . .*

38 *Kuchijisha*, mu Baibolo, kyaimenako “bumfumu.” Awa mushobo *wachijisha* kyalumbulula mba “kichila.” Kabiji *lukinyama* kyaimenako “bulume.”

Bushe mwamona mba, lukinyama watutukile pa kalunga, amwa mwajinga mu Lumwekesho, kyabu 13. Kabiji inge mwamona lukinyama ke atutuke mu kalunga, kyalumbulula mba abwe bulume bubena kufuma mukachi ka bantu.

Bino mu Lumwekesho 13, awe mwanamukoko byo aishile, watutukile kufuma pantanda, mwabula bantu, United States. Bino pano, palutwe, wajinga na nsengo icheche ibiji, bulume bwa bumulwila ntanda ne bupompweshi. Kabiji pano watambwile bulume, kabiji waambile nobe nsung’unyi wajinga kunyuma yanji. Nanchi mwakonsha kwikinemba, tubena kwiya mu lukabisho lwa bupompweshi na bintutu bimo byo baubilepo mu Loma wabutushi myaka yavula yapita kunyuma, mambo ke BYO BYAAMBA AYE NKAMBO.

Pano kimonai. “Waikala pa lukinyama, ke bulume.”

39 Mwakonsha kumona Libeka nyi? Kimye Eliezer kyo amutaine, kyajinga mu kimye kya mabaanga, kabiji wapaine

meema ku bangamela. Mambo, Eliezer waambile mba, “Inge awa mwanamukazhi usakwiya ne kutomesha ba ngamela, akya kisakwikala ke . . . kabiji wapa ami meema akutoma, awa usakwikala ye iye Anweba ye mwasala, Nkambo, kwikala ke musongwa wa kalume Wenu, Izaka.” Kabiji byo akijingatatu mu milombelo, Libeka waishile ne kutapula meema wamupele watoma, kabiji wapana ne ku bangamela. Monai, ngamela wajinga nyama. Kabiji awa yeka nyama ye apele meema, iye wamusendele ku mutwala ku musongwa wanji, Izaka.

<sup>40</sup> Kabiji, leelo, bulume bwa Mupashi Wazhila, abo Kipwilo bo kibena kutekeza ne kupopwela, kyo Kintu kimo ki Kekisenda kufuma panopantanda, mu kukumanya mu Musongwa. Kine, Izaka wajinga mubujimi, mu kimye kya mabaanga. Atweba kechi tukakumanya Nkambo mwiulu mu Lukumo ne. Efisesa, kyapitala kyabu 5, waamba mba tukamukumanya Aye mulwelele. Oo, akyo kyakonsha kulengela mwina Methodist kwiningezha ne kubijika. Langulukaipo pa kikyeye! Mwamona? Aye Nkambo . . .

Izaka wafumine ku nzubo ya bashanji, kabiji wajinga mu bujimi kimye kyo amwene Libeka kasa abena kwiya pa ngamela. Kabiji aye wamutemenwe, kimyetu kitanshi kya kumumona, kabiji waikijile kufumapo pa ngamela ne kuya na kumukumanya. Abyo ibyo. Ako iko kotukakumanya aye Nkambo. Kabiji yenka umo ngamela ye apele meema, wamusendele kumutwala konka ku mulume wanji.

Kabiji Bulume bonka bumo Kipwilo bo kibena kupopwela, aabo ntanda bo ibena kutela mba makayotu, ibo bo kibena kupopwela Kipwilo, bukekala ke Bulume bumotu bukasenda Kipwilo kuya mwiulu, “Na kukumanya Nkambo mulwelele.” Aye Mupashi Wazhila! Mwamona? Kujitu . . .

Kabiji, talai, Libeka wajingatatu kisungu.

<sup>41</sup> Kabiji awe mwanamukazhi ke jiule, ye tubena kwambapo papo. Pano, kwatakanyai bulume kyokika? Abwa—abwa bulume, byo kyalumbulula, mba, ke lukinyama. Wajinga pa kyachijisha. Pano, ke ng’anyi musango wa lukinyama ye akonsha kwikala? *Wachijisha*, akyo kyakonsha kwikala ke “bunoshi” buji na bulume. Ing’anyi musango wa kipwilo ye asakwikalamo pano? Ke kipwilo kya bunoshi, kabiji ke kipwilo kikatampe, kabiji ke kipwilo kiji na ngovu, kabiji bongozhi bwakyo bwakumbana mitundu ne mitundu ya bantu. Kabiji ba mamfumu ba panopantanda bauba nanji bulalelale bwa ku mupashi, abo ke bantu bakatampe ba panopantanda. Pano twayai tumuyuke kana ye ng’anyi, nobe mu kaminetitu, kabiji tuyuke pa yuwe dinominesheni.

*Kabiji aye mwanamukazhi wavwajile byachiluluka (bya bumfumu), . . . wavwajile bya chiluluka ne byachijisha misombelo, . . . wikobaikakobaika bya*

*ngolonde ne mabwe abuneme...ne bamangalite, ne mukuboko kwanji mwajinga ne katomeno ka ngolonde kayulamo bya bunya ne byabipisha bya bulalelale bwanji:*

<sup>42</sup> Kika kyo anjinga nakyo mu kuboko kwanji? Mafunjisho anji, byo abena kupana ku bantu, “Atweba twi Kipwilo. Atweba twi *kikye*.” Kabiji walengela ba mamfumu ba panopantanda kupendwa ne aye, byonka bya. “Atweba tuji *bibye*. Atweba twiibulume bukatampe! Atweba twakumbana kyaalo kyonse. Atweba twi kipwilo kyakila. Iyai, ne kutoma byetu...Apo, ichilaiipo tucheche. *Anweba* bitolai. *Anweba* bitolai.” Abyo byobyoyo kiji, mwamona. Kabiji wajinga na katomeno mu kuboko kwanji. Talai.

*Kabiji aye mwanamukazhi wavwajile kyachiluluka kabiji ne kyachijisha misombelo...wikobai kakobaika bya ngolonde ne mabwe abuneme ne mangalite, ne mukuboko kwanji mwajinga katomeno kayulamo bya bunya ne byabipisha bya bulalelale bwanji:*

<sup>43</sup> Bino, balunda, kechi tubena kutanga pepala wa majashi ne. Tubena kutanga kya Peenape Kyambo kya Lesa kyapeshiwa. Meulu onse ne ntanda bikapita, pakuuba akya Kyambo kikashala. Abyo ibyo.

*Kabiji pa mutwe wanyi pa nembelwe jizhina, pajinga pa nembwa jizhina, nangwa byonkabyo, KYAFYAMIKA, BABILONA MUKATAMPE, INAJA BA PITE, KYABUNYA KYA PANOPANTANDA.*

<sup>44</sup> Pano, kuno myaka yapita kunyuma, kechi Naketekela mba kuno ku kipwilo ne, bino Nasapwijile pa mutwe, *Kuboko Kwanembwa Pa Lubumbulu*, ne kupana jishimikila ja kala ja Babilona. Pano, kabungwe konse kaikalako, bupopweshi bonse kabiji ne kabungwe konse kaji mu ntanda leelo, katatwile mu Ntendekelo. Pano, inge mwatola wakwa Hislop *Babilona Babiji*, inge musaka kwikilondela mujishimikila, nangwa ma buuku akwabo awama, mwafwainwa kutana kabungwe konse ko mwakonsha kutana. Amiwa mbena kwimubwezha kunyuma kokwa mu mamineti acheche, pa banabakazhi basapwishi, monai, kabiji ne kwimumwesa ko kyangatwijile patanshi, monai, kunyuma mu Ntendekelo. Kabiji pa bibye bintu byapusanapusana, byo byaishile kufuma ku Ntendekelo. *Ntendekelo* kyalumbulula mba “pa kutatwila.” Baanga bayuka mba abyoyobyoyo? Ntendekelo ke pa kutatwila. Nanchi, bintu byonse bijiko, byajinga na tatwilo.

<sup>45</sup> Inge Natala kinchi...Najinga mungye bimye, basatu, pepi nobe bang’ondo babiji. Inge namona kinchi, byo kiji kyawama. Ne kimona, kyafwa; kikwabo kyabwelapo, bumi kasa butwajijilatu. Kabiji Ndanguluka pa kyokyo. Bino patu pamo akya kinchi kyajinga na ntendekelo. Kyafwainwa kwikala

na ntendekelo. Kabiji jonka ja kuletelwamo kuuba mba kikale kinchi, nangwa kwikala maoko, nangwa biichi, nangwa popula, nangwa kisonga, nangwa musango yense mo kyajinga, kwafwaijilwe kwikala Bujimuku bwa maana kunyuma yakyo. Nangwa inge kwajingatu kimo, kwajinga kinchi kimo kya maoko, kyonse kiji panopantanda inge kinchi kya maoka. Bino Kintu kimo, kikatampe, Bujimuku bwa maana akila, ekibikile mundonda.

Jipeshiwe Jizhina Janji Jazhila! Aye Iye Utanchikila ng'ondo ne tubaangabanga mwakwendela mulwelele. Aye watanchika byonse mundonda. Kabiji Aye ukatanchika Kipwilo Kyanji mundonda. Kikaluluka monka Aye mo ekikebela mba Kyalulukile; kumusela, kumuzhika, kukabeta kabuyeke, nangwa kukabeta kabulenge, nangwa monse Moaikela. Umvwe twafumyamo milanguluko yonse ya madinominesheni mu maana etu ne kupana bumuntu bwetu bonse atweba bene pa Kalvali. Aye ukekitanchika mundonda, inge twaikala ba nekenena nobe binchi ne bilengwa Byanji bikwabo. Anweba kechi mukamonapo ng'ondo keambe mba, "Amiwa kechi sakunsama bukufu buno ne. Anweba tumo tubaangabanga musame mukifulo kyami." Pakuuba atweba, oo, twaikala ba pusanako, mwamona.

<sup>46</sup> Bino, Babilona, tajishai Babilona byo aamweka. Wamweka kutatwilo ya Baibolo. Wamweka pakachi ka Baibolo. Kabiji wamweka kwapela Baibolo. Bino, kujipo kintu kimo. Bino, watatwilwe ne Nimulodi. Nimulodi watatwile Babilona mu Kipachiko kya Shinala, konka kwipi na Mukola wa Tigilisi ne Ufuleta. Kabiji Ufuleta wapichile monka. Kabiji—kabiji mukwakwa yense, mu kyonse kya kyaalo, watajile konka ku Babilona. Kabiji bizhilo bya masakwa byajinga pepi nobe mafiiti tuu aduleendi byakilang'anya, abya bizhilo byalengelwe na kyela kya lubemba. Kabiji umvwe mwatwela mukachi kamuzhi wa Babilona, mukwakwa yense watajiletu ku jitanda.

<sup>47</sup> Pano, mwakonsha kuya ku Loma, buleelo, kabiji mukwakwa yense waya ku Loma. Kabiji kuji kisungu Maliya wamucheche waimana pose pa kuchipuka, ponse pachipukila mukwakwa, walama ne Kilishitu mwaana mu maboko anji, na kutongola jishinda jaya ku Loma. Mwamona? Wamweka kutatwilo, ya Baibolo; wamweka pakachi ka Baibolo; kabiji papo uji kwapela Baibolo.

Pano Nasakatu kutanga kuya kulutwe, pa mamineti acheche, pakuuba mba mukwatakanye kintendekesho kya kikye. Mwamona? Kijitu bulongo. "Kabiji Namwene mwanamukazhi," pano talai, "ke kipwilo." Inge mwamona *mwanamukazhi*, anweba langulukaitu pa "kipwilo." Mwamona?

*...Namwene mwanamukazhi kasa apendwa mashi abazhijikwa, . . .*

48 Pano, nga kyambo kya *wazhijikwa* kyafuma pi? Kyambo kya *wazhijikwa* kyafuma ku “awa *wazhijikwa*,” nangwa “awa watokeshiwa,” *wazhijikwa*. Kijitu bulongo.

...Namumwene kasa apendwa *na mashi abazhijikwa*,...

49 Pano, umvwe awe mwanamukazhi ke kipwilo, aye wamanyika *bazhijikwa*. Kabiji ke kipwilo kyabaya bingi. Aye uji nabulume bonse pantanda. Aye uji pa meema avula. Kabiji aye... Ne bamamfumu ba ponopantanda bauba nanji bulalalale. Kyawama, aye yeng’anyi? Ke kyafyamika. Pano Mupashi usa... Mwayuka, mwafwainwa kwikala bya bupe bya mupashi naiini mu kipwilo; kya milangwe, kabiji kikwabo ke kukwatakanya, kabiji kikwabo kya lubuko, kabiji kikwabo kya *binu bikwabo*.

...*kabiji ne mashi a bakamonyi ba kwa Yesu*:...

50 Kyamweka nobe kechi bateleko muchima ku byaambilenga Yesu ne. Kanatu byaamba kipwilo. Abyo ibyo. Kabiji akyo kyalumbuluka, ne akyo.

...*kabiji byo Namumwene, Namukuminye bingi*.

51 “Nakuminye bingi. Ami...Kyajinga kintu kya—kya—kya kukumya pa yuwe mwanamukazhi, Namukuminye aye byo...” Pano lekai tole kifulo kyakwa Yoano ne kweseka kulondololapo pacheche, mwamona. Yoano waambile mba, “Waikala byobya. Aye ubena kwifwayikizha nobe kipwilo kya Bwinakilishitu. Aye uji nasambu pa mali onse aponopantanda. Uji na bamamfumu ba panopantanda mu maulu anji. Aye ke munoshi kabiji kintu kyawama bingi, kabiji wakonsha kupendwa byepi na batapiwa pe Yesu? Wakonsha kumanyika byepi *bazhijikwa*? Wakonsha kwipaya byepi boba batapiwa pe Kilishitu? Kabiji akwe kasa abena kwamba mba ne Mwinakilishitu, aye mwine, kipwilo kya Bwinakilishitu.” Pano talai.

*Kabiji malaika wang’ambijile mba, Kika kyo wakuminya? Nsakukubuula kyafyamika kya uno mwanamukazhi, kabiji ne yewa lukinyama wamusenda, kabiji ao wajinga...na mitwe sebeni ne masengo jikumi.*

52 Pano, akwe ke kutangatu. Anweba kwatakanyai kikye. Akye kisakwikala kyapela bingi.

*Awa lukinyama ye waji kumona wajingapo kala, pakuuba pano ufwapo; bino pano kasake kufuma mu...kufuma mukalengwa kabula kupela, ne kuya mu lonaiko: ne abo bekala pano pantanda bakakumya, babula kunembwa mazhina abo mu buuku wa bumi kufumatu ku ntendekelo ya panopantanda, kimye kyo bakamumona...kimye kyo—kimye kyo bakatala lukinyama ao wajingako kala, pano ufwapo, kabiji ukekalapo.*

53 Pano, pano akye kyafwainwa kuko Zhang'ana, nanchi kiji bino. Aye waambile mba, pano talai, kuuba mba, "Kimye bonse," kechi bachechetu ne, pakuuba, "bonse bekala panopantanda bakakumya." Bonse bakakumya. Ntanda yonse ikakumya yuwe mwanamukazhi. Kujitu jibumba jimo ajo jikabula nkumukumya, kabiji abo ke boba bajinga na mazhina abo mu Buuku wa Bumi wa Mwanamukoko.

54 Pano, Nasaka kutwezhamo ne kikye ponka pano, mambo tusakufikapo pa kikye mu mamineti achechetu. Mwamona? Kimye ka mazhina abo po abikilwe mu Buuku wa Bumi wa Mwanamukoko? Kufuma (Kimye ka?) ku kusangululwa kwapeleleko kobatainweko? bufuku bo baile ku kitapisho? bufuku bo batwelele mukipwilo? Amiwa kechi mbena kweseka kwi mukozha ne. Bino, Mbena kwi mubuula, Baibolo byo aamba mba, "Mazhina abo abikilwe mu Buuku wa Bumi wa Mwanamukoko kufuma ku ntendekelo ya panopantanda." Kya kine! Kimye Lesa, mu ntendekelo, kyo amwene mba Ukatuma Mwaana Wanji, kabiji mba Aye ukatola kifulo kya ndengamambo, kimye Mashi a Mwaana Lesa po ainchijilwe. Aye Baibolo waamba mba Mashi Anji ainchijilwe kintendekesho kya ino ntanda kasa kikyanyye kwaalwa. Baanga bayuka mba Baibolo waamba byobyoy, amba, "Aa Mashi akwa Kilishitu ainchikilwe kintendekesho kya ino ntanda kasa kikyanyye kwaalwa?" Kimye Mashi po ainchikilwe, membala yense wa Mubiji, bena mazhina anembwa na Mashi, mu Buuku wa Bumi wa Mwanamukoko, pa kintendekesho kya ino ntanda. Kika kyo mwaakamwa? Oo, mulongo! Akyo kinshikula bizhilo, kechi ibyo nenyi?

55 Kyawama, pano twayai tutange kikye papo, ne kumona kana byaamba kyokyo ibyo. Mwamona? "Kabiji malaika wang'ambijile mba, 'Kwepi kyo . . .'" Naketekela kiji mu veleeshi 8, "Kabiji lukinyama ye wamona . . ." Kijitu bulongo. Akyo ikyo.

*Awa lukinyama ye wajikumona po aji, kabiji ufwapo;  
kabiji ukafuma mu kalengwa kabula kupela, . . .*

Pano, tubena kubwela jibiji ku kyokyo, bino Mbena kukeba kikye kikwabo, mambo tusakufika pa kyokyo.

*. . . kabiji ukaya mulonaiko: kabiji ne abo bekala pano  
pantanda bakakumya, babulwa kunembwa mazhina abo  
mu buuku wa bumi kufuma ku kintendekesho kya ino  
ntanda, . . .*

56 "Kukekala jibumba pantanda," mu ng'ambilo ikwabo, "abo ba kajimbaikwa," mambo aye wibajimbaikile. Kabiji kwajingatu jibumba jimo ajo jabujile kujimbaikwa, kabiji abo ke boba bajinga na mazhina abo anembwa mu Buuku wa Bumi kufuma ku kintendekesho kya panopantanda. Tusa kufika pakyokyo palutwe pacheche.

<sup>57</sup> Pano monai awa mwanamukazhi, kipwilo, wajinga “*Kyafyamika, Babilona.*” Twamumona wamweka mu kimye kyakwa Nimulodi. Kika Nimulodi kyo akebelenga? Nimulodi wasombele muzhi kabiji walengejile mizhi ikwabo kupana musoko kuyuwe muzhi. Bushe twakonsha kumona kikye kintu buji leelo? Kujipo yoya mpuzha leelo? Kujipo kipwilo kiji na bupopweshi bwa tubungwe mu kyaalo kiji kyonse panopantanda nyi? Kyakine. Kujipo mpuzha buleelo ayo ilengela kyaalo kyonse kupana musoko kwi akyo? Kujipo yoyo mpuzha nyi?

Twayai tuye kulutwe ne kutanga byashalapo, pachechetu, pakuuba mba mukwatakanye kipikichala kyonse. Kijitu bulongo.

*...awe ye mwamona lukinyama ao wajingapo  
kala, ...kechi po aji ne, kabiji ukekalapo.*

*Pano popaji muchima wa maana.*

<sup>58</sup> Pano, baanga bayuka mba maana ke kya bupe kimo kya Mupashi? Pano, ke musangoka wajibumba jo Abena kwambako, nanchi? Aye ubena kwamba ku jibumba ja bantu baji na—na bya bupe bya Mupashi bibena kwingila mu kikye Kipwilo.

*...pano po paji muchima wa maana.*

<sup>59</sup> Pano, imanai, mutaane kuuba mba kupita monse mu ao mankulo abipwilo papo. Nakulupukamo, aye Mupashi Wazhila kasa abena kwamba mba, abye bya bupe byo bikengilanga mu juba jakupelako. Pano, tuji na bya bupe bya lubuko bibena kwingila. Oo, ki—kibena kuyatu bulongo. Kyawama, mulongo, kuji ne bya bupe bikwabo. Akye ke kimotu kya bibye. Akyo ke kakitutu kacheche. Kyawama, apo paji kyabupe kyabaya bingi. Kyepi kyakonsha kwikala kyawama, kya bupe kya Mupashi Wazhila kya maana, kya kubika pamo Kyambo kya Lesa kabiji ne kumwesa Kipwilo po twaimana, kukila kwikalatu na muntu wabukwa? Atweba bonse tusaka kwikala na butuntulu. Bino kyawama Amiwa kwikala na mweo uji na butuntulu, kukila kwikala na mubiji mutuntulu, kimye kyonse. Oo, ami!

Umwwai Mupashi Wazhila kwamba mwi Yoano, pa Petemosa, amba, “Pano po paji muchima wa maana. Lekai ateleke ku Kikye.” Apo tubena kumona kipikichala kyalengwa papo. “Pano po . . .”

*Pano po paji muchima wa maana. Aya mitwe sebeni  
yo mitumba sebeni, yo aikalapo awa mwanamukazhi.*

<sup>60</sup> Pajitu muzhi umo, ye Nayuka, pano pantanda. . . Kujitu mizhi ibiji, ayo yo Nayuka, iji na mitumba sebeni nangwa mitumba yakilapo. Cincinnati ye umo, ao wafwainwa kwikala na jishimikila ja bubela ja Cincinnati. Ye inaja musuka, mwayukatu, kuuba mba. . . ne bikwabotu. Bino muji byavula bingi byakila pa kyokyo. Bino kechi mujipo kipwilo kimo kyakila pa byonse mu Cincinnati ne.



Kujitu mpuzha imo pantanda ponse, iji na kipwilo kyaikala pa tutumbatumba sebeni, akyo kyakilika ntanda onse. Bino, Nafumatu konka kwa. Byone bye bintu.

Kabiji Namona popa po kyaambiwa mba, “Pano po paji muchima wamaana.” Lumwekesho 13. “Lekai awa uji na maana abale nambala ya lukinyama, mambo ke nambala ya muntu.” Kechi kabungwe ka bantu ne, jibumba ja bantu, pakuuba ke “mu” muntu. “Kabiji nambala yanji ke siikisi aduleedi ne siikisite-siikisi.”

<sup>61</sup> Amiwa kimye kyonse ng’umvwa, mba, ku jitanda ja kwa papa wa ku Lomu, pa nembwa mba, “VICARIVS FILII DEL.” Nakumyanga kimye kyonse namba kana kyakine. Nshilai mu laini, kabiji kwikilenga mu manambala, mu manambala a mu Kiloma, mumone kana byokiji. Akye kyabukine. Naimene pepi *byobya* kisocho kyabumfumu kyanungakana pasatu kyakwa papa, mu galashi, “Luusa lwa kalunga kabafu, mwiulu, ne mpuzha ya lumanamo.” Mwamona? Nanchi, abye bintu, Amiwa nafumatu konka, nafumatu ku Lomu kabiji nayuka mba kyabukine. Pano twayuka mba kyalumbululwatu bulongo.

*Kabiji kuji bamfumu batanu na babiji: batanu bapona kala (bajingako pa kyokya kimye), kabiji umo ukiji ponka (ao ye ukeya, wajinga Kesala), ne mukwabo ukyangye kufika (wajinga Helonda, wajinga mubi); . . .*

<sup>62</sup> Pano talai. Talai byo kyalumbuluka.

*. . . kabiji byo akeya, ukekalatu ka kimye kacheche.*

<sup>63</sup> Pajipo umo wayuka myaka Helonda yo aikele pa bumfumu? Bang’ondo siikisi. Wandosele bainanji kupita mu mukwakwa, pa kinchi kimo kya mbili. Kabiji wasokele muzhi; kabiji ne kupana mambo kubena Kilishitu. Kabiji waimbilenga pa kajimba ku lubaji lwa katumbatumba. . . akwe kasa bena kusoka muzhi. Bang’ondo siikisi—siikisi. Kabiji monai, “Kabiji lukinyama. . .” Pano monai, talai musango wa bujimbijimbi ye ajinga naaye. Mwamona? Pano talai.

*Kabiji awa lukinyama wajingako, kabiji ufwapo, ye. . . wa butanu nabusatu, kabiji ye wa bu sebeni (musango wabu sebeni), kabiji ye wakuya kulonaiko.*

<sup>64</sup> Muntu yense wayuka *lonaiko* byo kyalumbulula, ke “kalunga kabafu.” Kabiji monai mpuzha ko abena kufuma, “kalunga kabafu.” Kyokika? Kalunga kabula kupela. Kechi kujipo kintendekesho kya lufunjisho lwa ba Katolika ne. Kechi kujipo Baibolo wa lufunjisho lwa ba Katolika ne. Kechi kujipo kintu kiji nobe Baibolo wa lufunjisho lwa ba Katolika ne, nangwa pachechetu ne. Abo kechi baamba mba byo kiji ne. Aye pulisiti waikele popa, awe pulisiti waka mubiji kacheche papo pa kipwilo kya Sacred Heart byo aishile kokwa. Aye waambile mba, “Oo, aye. . .” Namubuujienga pa lwa kubatizha Mary Elisabeth

Frazier. Aye waambile mba, “Oo, mwamubatzhile mujishinda jo ba batizhangamo ba kipwilo kitanshi kya Katolika.”

Naambile mba, “Akyo kyajinga kimyeka?”

Aye waambile mba, “Mu Baibolo, Baibolo wenu.”

<sup>65</sup> Naambile mba, “Bushe kipwilo kya Katolika byo kyabatizhanga nyi? Alo lo lufunjisho lwa kipwilo kya Katolika nyi?”

“Ee.”

<sup>66</sup> Naambile mba, “Mwaila nyimeno ya kipwilo kya ba Katolika, kika kyo kwaikela lupipu lwabaya bingi?” Mwamona?

<sup>67</sup> Aye waambile mba, “Kyawama, mwamona, anweba bonse mwaketekela Baibolo. Atweba twaketekela kipwilo.” Mwamona? “Atweba kechi tutako muchima ku byaamba Baibolo ne. Ke kyokya kyaamba kipwilo.” Abyo kine ibyo. Anweba inge mukeba kubekya, ku kikye, kyesekei jimo, mwamona. Abo kechi batako muchima ku byaamba Baibolo ne; akyo kechi kijipo nakintu kya kuuba nakyo ne. Abo batatu muchima ku byaamba kipwilo. Mwamona?

<sup>68</sup> Bino atweba kechi twata muchima ku byaamba kipwilo ne. Atweba twaketekelatu byaamba Lesa. Amena. Mambo mu Baibolo, kyanembwa mba, “Lekai ng’ambilo yonse ya muntu ikale ya bubela, kabiji Yami ikale ya Bukine.” Akyo kyo twabujila kwikela dinominesheni.

<sup>69</sup> Pano monai. Telekai ku kikye, pa kamineti kamo. “Bamfumu faivi byo bajinga, bapita kala, bamfumu faivi.” Inge mubena kukeba kyokyo kufuma kujishimikila, Nakonsha kwi mu mwesha. “Kabiji umo po aji, ne mukwabo ukeya.”

Pano talai, “lukinyama.” Bino, lukinyama kechi wajinga mfumu ne. Aye wajinga “umo po aji, kechi po aji ne; bino po aji, kabiji kechi po aji ne; bino po aji, kabiji kechi po aji ne.” Kyokika? kuswanang’ana kwa ba papa, bulume, lukinyama ubena kutangijila. Apo ke kimye kyaalululwe Lomu wabutushi ke papa waku Lomu. Lomu wa Butushi waalulukile, kabiji ipo po aikele ke bupapa, akyo, baikele na papa mu kifulo kya kwikala na mfumu, kabiji papa ke mfumu wa bu mupashi. Ao oene mambo kyo amwikilwa kisocho kya bumfumu, mfumu wa bu mupashi, witota mba aye ye waimenako Yesu Kilishitu. Abyo byobyoyo kiji. Pano talai.

<sup>70</sup> Kabiji tusa kufumyamo alwa lufunjisho lwaki Katolika ne kwimumwesha byo kyaenda kufika ne mu bipwilo bya ma Polotesitati, monai, akitwajijilatu kutanwa mu kipwilo kya Polotesitati, avulatu. Kyapusanako, kine, na Baibolo, bya puseshatu. Pano, “Lukinyama wajingako, kabiji ufwapo.” Pano vulukai, “Bonsetu bakajimbaikwa, panopantanda, baji na mazhina abulwa kunembwa kufuma ku kintendekesho kya ino ntanda.” Twayai tumone.

*Ne aye lukinyama wajingapo, kabiji pano ufwapo, (veleeshi wabu 11) kabiji aye mwine yewa bu eiti, kabiji. . .ye wa muboba sebeni, kabiji uya mulonaiko. (Aye ukatwajijilatu poso wafika ne ku kalunga kabula kupela ku mpelo ya lwendo.)*

*Ne aya nsengo jikumi yo wajikumona bo bamfumu jikumi, . . .*

Pano talai papo. Inge mubena kukeba kumona kintu kimo kya katazha, talai kikye.

*. . .bo bamfumu jikumi, bakyangye kutambula bufumu; bino abo batambula luusa lwa kwikala bamfumu pa awala umo na lukinyama.*

<sup>71</sup> Kechi baswanyikwa bumfumu ne; ke butangi bwa nkanjikizhi. Monai, abo kechi baswanyikwa bumfumu ne, bino batambula luusa lwa kwikala bamfumu, awala umo, mu kimye kya bumfumu bwa lukinyama. Akye ke kimye kya bukivule ponka pano mu kimye butangi bwa bankanjikizhi bubena kumweka. Mwamona? “Batambula luusa lwa kwikala bamfumu, awala umo na lukinyama.” Pano, kijitu bulongo.

*Bano bonse baji na muchima umo, onkao mambo bapana bulume ne luusa lwabo ku yewa lukinyama.*

*Bano bakalwa na Mwanamukoko, kabiji aye Mwanamukoko ukebashinda: (Lukumo!) mambo aye ye Nkambo ya ba nkambo, kabiji Mfumu wa ba mfumu: na abo bo aji nabo pamo bo baitwa, ne kusalululwa, kabiji bakishinka.*

<sup>72</sup> Natundaikwa Amiwa kusapwila mbila ponka pano pa kyokyo, “Basalulwilwe, kintendekesho kya ino ntanda kasa kikyangye kwaalwa, kabiji baikala ba kishinka mu lwito lwabo.” Aleluya! Abyo byokiji. “Baitwa, basalululwa, kabiji bakishinka.” Kabiji ke kintu kinungakanya, mwamona, “Basalululwa, kabiji bakishinka.” Ne abo bakamushinda. Nangwatu bekale bakila byepi.

<sup>73</sup> Kabiji awe komyunizimu mukatampe, tanchikilo ya komyunizimu yo tuji nayo leelo, kechi imuletele kijikila ne. Akye kibena kwingijila mu maboko akwa Lesa. Nakonsha kwi kishiniikisha na Baibolo. Aye ukamanyikwa pa yense kamonyi ye ayipaile. Ee, mwane. Monai babo bamfumu bonse baitabazhanya pamo, kabiji bakamushikwa. Kabiji ne kyaalo kyonse, ntanda yonse, kubena kukumbana komyunizimu. Kika, kyafwainwa kwikala ke ng’endo yakwa Lesa, ya kumumanyikilamo. Anweba mwaamba mba, “Pembelako pa kamineti kamo, Mulongo Branham. Komyunizimu, kwikala ng’endo yakwa Lesa?” Kyabukishinka, kine, ke ng’endo yakwa Lesa. Aye Baibolo byo byo aamba. Bino kibena kwendela mumwe pakuuba mba kilete luzhachisho lwa babi ne bantu ba myendeleko baleta

buvu bambulwa koloka. Kika kya shalako mu ino ntanda? Kika kyo tuji nakyo? Kuno juba jikwabo. . .

<sup>74</sup> Amiwa nsakuleka lufunjisho lwami pa kamineti kamo, inge kyakonsheka. Natangilenga pa Kyanembwa awa mwaana wa mubukende kechi wakonsha kutwela mu kipwilo kya Yehoba ne pa bisemi fotiini. Baanga bayuka kyokyo? Abyo ibyo, Mpitulukilo ya mizhilo 23; mwaana wa mubukende. Inge mwanamukazhi ba mukwata mu bujimi, mba, kwabula bantu bakumulamwina ne, kabiji mwanamulume wamushinda awa mwanamukazhi, awa mwanamulume uka musongola. Kabiji nangwatu umvwe mwanamukazhi waikala pite, wafwainwa kwikala nanji poso wafwa. Kabiji inge awe mwanamukazhi wasongolwa koaji, kyaambiwa mba kisungu, kabiji kasa abula ne, nashi wafwainwa kwipaiwa pa kikye. Kabiji umvwe mwanamulume ne mwanamukazhi besongola, kabiji basema mwaana wa mubukende, amba, kechi ukatwela mu kipwilo kya kwa Yehoba ne, kufika ku bisemi fotiini. Kabiji myaka foote kyo kisemi. Kikekala myaka foolo aduleendi abwa bubu bwa fumishiwamo mu Isalela.

<sup>75</sup> Lesa washikwa bubu! Mwakonsha byepi kupita pa Mashi Azhila akwa Nkambo Yesu, mambotu uji ku dinominesheni imo, waketekela kutwelamo nyi? Wafwainwatu kwiya na byaimika Lesa nangwa kechi mwakonsha kwiya nangwa pachechetu ne. Ibyo. Kwasho, musapwishi, nangwa twikale ba byepi, kechi kijipona kintu nakyo ne. Iyaitu na mikambizho yakwa Lesa.

<sup>76</sup> Bisemi fotiini. Muntu wiisambilenga ne amiwa pa kyokyo waikala muno pa kyonka kino kimye. Waambile mba, “Pano twakonsha kuyuka byepi ao wafwainwa kupuluka?”

<sup>77</sup> Naambile mba, “Apo po wafwainwa kwikala wa ketekela bulongo mu Kusalulwila jimo.” Jizhina jobe ja bikilwe mu Buuku kintendekesho kya ino ntanda kasa kikiyangye kwaalwa. Lesa usenda yoya ndoonda ya mashi. Akyo kijitu kwi Aye. Mwamona?

“Pano akyo kiji nakika. . .”

<sup>78</sup> Telekai. Anweba ba kitwala, leelo, kechi Nayuka ne kana mwiya ku kino kipwilo, nangwa kwepi ko muya, anweba basongwalume ne basongwakazhi. Bushe mulanguluka mba, bintu byo mubena kuuba, inge kwaikala kisemi kikwabo, baana benu bakazhachishiwa na byubilo byenu nyi? Anweba kechi muji na mushingi nabyubilo byawama nyi? Anweba basongwakazhi muji kuno mumvwala tutwe tuputula twakala twa tuheche ne bintutu bikwabo, mwayukatu, akyo kiya kufikizhiwa pa mwanobe wamukazhi. Bushe mwayuka mba bankambo yenu babakazhi bajinga na—na mvwajilo yabula kuwama, kabiji ne bainobe bajinga basongwakazhi batunyimbo, ao oene mambo kyo mwaikela na mvwajilo yatama nyi? Kyakine. Nga baana benu bakekala byepi? Ee, mwane. Lesa waambile mba ukapepula

bubi bwa basemi pa baana kabiji ne pa baana babo, kufika ku bisemi bisatu nangwa foolo.

<sup>79</sup> Kabiji bushe ubena kuvuluka, mulongo wami, kimye kyonse kyo uba kintu kyawama, kikabikwa pa baana benu nyi?

<sup>80</sup> Talai kuno, twayai tutole Bahebelu, kyapitala kyabu 7. Aye Baibolo wamba mba, kimye—kimye Melekizedeke byo asambakene Abulahama byo afuminenga na kutapa bamfumu, kabiji wa mupesheshe, kabiji Waambiile mba, bino, “Levi . . .” Aye keambe pa kupana bya bujikumi. Waambile mba, “Levi wapelwe nsambu kufuma kwi Nkambo ya kutambula bya bujikumi kufuma ku balongo banji. Kabiji ne Levi utambula bya bujikumi, wapaine bya bujikumi, mambo wakijinga mukifuka kya kwa Abulahama byo asambakene Melekezendeke.” Kabiji Abulahama wajinga nkambo-yaba nkambo yanji. Abulahama wasemene Izaka, Izaka wasemene Yakoba, Yakoba wasemene Levi; Levi, taata, bankambo yanji, nkambo-yaba nkambo yanji. “Kabiji kimye Levi kyo ajinga mu kifuka kyakwa Abulahama,” aye Baibolo waamba mba, “aye wapaine bya bujikumi kwi Melekezendeke.” Aleluya!

<sup>81</sup> Kechi muswishe muntu umo kwi mubuula mba kintu kyonse kyubiwa mu ntanda kyakonsha kukanya mutanchi wa Lesa mukatampe ne. Ubena kwenda kuya kulutwe! Kyatanchikilwe kunyuma kokwa ku ntendekelo. Kechi kujipo ba diabola nangwa ba diabola bavula bakonsha kukanya tanchikilo Yanji ne.

<sup>82</sup> Pano, Baibolo kechi yaamba mba “wafikijilemo” kupana ne. Aye Baibolo waamba mba, “Aye wa paine bya bujikumi,” kimye kyo ajinga mu kifuka kya bankambo-yaba nkambo yanji. Lukumo! Awa ye Nkambo yami. Oo, Aye wikiyukile, kasa, ne ntanda ikyangye kulengwa ne. Aye wayukile bintu byonse. Kabiji mwi Abulahama, mo apayijile bya bujikumi.

<sup>83</sup> Kabiji, nyenga, mulongo, wakonsha kunyemena byepi kukwe, kabiji bantu bekala kasa benda na bakazhi babakwabo, kabiji basongolwa bo babena konauna manzubu, kabiji kwikela mujishinda jo mwikelamo, mwaketekela kisemi kikwabo kikekala byepi? Abino byobyo kiji. Kyaalukatu ke kyatutu pakuuba ke jibumbatu ja baana babukende, basemekelwa mu mashinda-angi, jibumba ja mazhikankanwa. Kabiji kuji kintu kimo kyashalako, ke juba ja ma atomiki jo tubena kwikalamo. Abyo kine ibyo. Tuji mukimye kya kumpelo.

<sup>84</sup> Kasa naikala lukeelo luno, kunyuma kwine mu tutumbatumba twa ku Kentucky, songwalume mukulumpe wamubiji mucheche, kechi mwakonsha kufika teeni futu po aji ne, walengelenga myenge ya mebele. Kapepo kechi wayuka kuboko kwa kipiko ne kwa kilujo ne. Byo aumvwine . . . Napitajile pa kibaza kya kukayilapo makayo. Amiwa kechi Nayukile ko Najinga ne. Najingatu mu kikuneke. Kabiji Nailenga na kwipaya baluyeye. Kabiji byo Naikele panshi

kokwa, Natatwile kwisamba nanji. Kabiji awe songwalume waambile mba ukaya mu bushilikale. Kabiji twaishile kutana kuuba mba, tubena kwamba pe Nkambo, kabiji aye waambile mba, “Musapwishi, ke mwaketekela mba tuji mu kimye kya kumpelo nenyi?” Monka mwine mu mitumba.

<sup>85</sup> Naambile mba, “Kine, byo tuji. Kine, mwaana wamulume, tuji mu kimye kya kumpelo.”

<sup>86</sup> Pano potuji. Akye kyo kimye kyo tubena kwikalamo, mulongo. Tuji mu kyokyo kifulo. Kechi mwamona nenyi bainetu kunyuma akwa, ne bashetu, byo baikalanga, kabiji ne bankambo babalume ne bankambo babakazhi? Kechi mwamona nenyi bataata ne bamaama byo baikalanga? Oene mambo kyo twaikela mu buubole leelo jino. Kechi kya kukumya ne, wakonsha kusapwila wiichibako ne mutwe; kimotu bakamvwala tuputula, ne ku kushipila mu kilungi. Bakakepa mishanga ne ku kufululwilayo mu, kabiji amba, “Ubangatu byobe obewa mwine.” Kika? Mambo ao ye mukoka mo bafuma. Nsakufika pa kyokyo, kwakubula kupita mumbaji, *Awa Lukunwa Wa Aye Muloolo*. Tusa kuyuka po atwelelamo, ne kumona kyo bobila muyewa musango. Ke baana bakwa diabola kufumatu ku kintendekesho kya ino ntanda. Abyo ibyo. Kafwako nangwa kimo, kyashalako ne, ke buchibishitu bwa mambo boobwashalako. Kechi kujipo kintu kikwabo ne kanatu buchibishi bwa mambo. Lesa ukonaunatu bintu byonse shata. Kabiji muntu mwine wiikyuba. Lesa kechi wafukwile mba kikekala muyewa musango ne, bino Aye wayukile mba kikekala muyewa musango. Ao oene mambo Aye kyo aambijile mba, “Ukajimbaika bonse bekala panopantanda, kufumyako bonka baji na mazhina abo abikwa mu Buuku wa Bumi wa Mwanamukoko kufuma ku kintendesho kya ino ntanda.”

<sup>87</sup> Twayai twi kimone. Tutange kuyako kulutwe. Pano, Naketekela mba tuji pa bu 12.

*Ne aya nsengo jikumi yo waji kumona bo bamfumu jikumi, bakyangye kutambula bufumu; bino batambula luusa nobe bamfumu awala umo na yewa lukinyama.*

*Bano baji na muchima umo, kabiji bapana luusa ne bulume bwabo kwi aye lukinyama.*

*Kabiji bano bakalwa na Mwanamukoko, kabiji Mwanamukoko ukebashinda: mambo aye ye Nkambo ya nkambo, kabiji Mfumu wa mfumu: kabiji aba bo aji nabo ba—baitwa, ba salalwa, kabiji bakishinka.*

*Kabiji aye wang’ambijile amiwa mba, Aa meema o waji kumona, paikala pite, ke bantu, . . . mabumba, . . . bisaka bya bantu, ne njimi.*

*. . . aya nsengo jikumi yo waji kumona iji pa lukimya, bikamushikwa pite, . . .*

<sup>88</sup> Pano talai pa kyokyo, aya “nsengo jikumi,” abwe ke bufumu jikumi. Monai, abye byonse bibena kufikilamotu, mu musango ujimo baabo batangi bankajinkizhi. Monai musango wa batangi bankajinkizhi kobashakamina. Kwepi ko bashakamina? Anweba—anweba mbulaitu tangi nkajinkizhi ubula kushakamina ku komyunizimu. Mwamona? Kabiji abo (bakoba ka?) bakamushikwa “pite,” awa mwanamukazhi, ye kipwilo. Pano kika? Monai byo bakooba.

*. . . abo bakamushikwa awa pite, kabiji bakamushatu  
ke masala ne bwamba, kabiji bakaja nyama yaji, kabiji  
ne kumusoka na mujilo.*

<sup>89</sup> Aky a bakekyonauna kwi kifumyapo pa mapu, kine nobe byonka byo Naimana pano. Twajinga na kimye kya kusenda lolo lufunjisho lwa kyokya kipwilo, kabiji ne kupita mu Kinembelo, apo po Kyaamba mba, tangai, “Bonse bamfumu ba panopantanda, ne bonse bendesha mato, kabiji ne bonse, bakajila, mambo Babilona mukatampe washalatu ke masala mu awala umo.” Awala umo, kimye kyanji kyaiya! Kabiji, oo, Kyaamba mba, “Nsangalalai, anweba bazhijikwa, kabiji ne abweba bonse bangauzhi bazhila, mambo Lesa washikanya naji mashi abazhijikwa ne balongo bobo.” Mwamona, kijitu bulongo. Kine, komyunizimu ubena kwingijila monka mu maboko mwa kwa Lesa. Pamotu ne Mfumu Nebukadineza byo aingijile mu maboko, kwiya na kusenda Bayundeya, byo bafumine! . . . ? . . .

<sup>90</sup> Kabiji lukunwa wa bubi wakonsha kutwajijilatu na kupana bubole, lukunwa waoloka wakonsha kwikala monka kabiji lukunwa wakonsha kulama bubole, kabiji kitwajijilatu na kubola kabiji na kubola pa kakikmye kamo apa bino kyafumapo. Kifika pa kifulo kimo, mambo bainabo ne bashabo ne bakwabotu baikajile mu musango umo kunyuma yetu, kabiji muyekawa musago, kya kuuba mba kechi kushalapo nangwa kintu kimo kyetu ne. Kabiji mwayuka byo aambile Yesu nyi? Amba Aye inge ne kuchibako moba ne, kapaji nangwa muntu umo wapulukile ne.

<sup>91</sup> Mwakonsha kumona nyi? Mwakonsha kumona kyo twaikela na babo (kechi mbena kwamba kintu ne.) ba Arthur Godfrey, ne bantu bonse, mwayukatu, monai, kabiji ne ba Elvis Presley, ne—ne mambwata patoka, ne ma ofoloshi, ne suki yalepa kufika ne mushingo yabo, ne byonse bye, mwaila ngubilo ya banyike mo babena kubila nyi? Kika kyuba byobya? Kyokika? Mambo kibena kufuma ku jibumba ja baikele kala, bantu ba mubukende. Kafwako kyashalapo ne! Oo, bakonsha kwimana ne kwimba, “Kwipi, Lesa wami, kwi Anweba,” nobe Ernie wapa-kunde ne bonse be bakwabo musangotu umo, kwimba musango walwimbo, kabiji ne bikwabotu byonka bya. Mulongo, mwayuka kine kintu nyi? Abo, abo ke bukafutufutu bwakine. Ee, mwane.

<sup>92</sup> Muntu kechi ujipo namwingilo wa mu uno pulupitu ne awa uya kabiji uji na nyimbilo ya loko-na-loko kabiji ne

byombesha bya musango wabongi-bongi kabiji ne bintu bya yewa musango. Aye kechi ujipo na mwingilo nangwa umo wakwimana kuno kunyuma ne. Akwe ke kwikala bung'anga, baitwa na Lesa. Lesa bo aita ba mingilo bo bena kuno kunyuma. Kabiji kechi bajipo na lubaji lwa bintu bya musango yewa ne. Alo lo lukatazho byo luji buleelo, baalula kipwilo kwikalatu pamo nobe ke nzubo ya bwenyi. Nzubo ya bwenyi kijitu bulongo, inge ukeba kuuba kyokyo, akyo kijitu kwi obewa. Pakuuba lekai ne mubuule, kuji lupusano lwabaya bingi lwa kweseka...pa kachi ka nzubo ya bwenyi ne kipwilo. Ee, mwane. Umvwe ukeba kuuba bibye bintu mu nzubo ya bwenyi, ne kwikala na byonse bye bijiilo ne bintutu bikwabo, kijitu kwi obewa. Bino, mulongo, kipwilo kyafwainwa kwikala kya pyangwamo kufumina ku pulupiti kufikatu ne mukachi. Abyo ibyo. Amiwa kechi natazha mu kuuba mba kupyangamo na mawindo akatataka ne bikwabotu ine. Natazha mu kuuba mba awa musango-wakala, kusangululwa kwatumwa-na Lesa ako kukapalang'anya bintu kufuma kulubaji lumo ne kuya ku kwabo. Ee, mwane. Kijitu pamo nobe kwambula kyeya, kyeya kya malaiti pa yuula pevu iji ku jiepo. Ee, mwane, bikapalang'ana umvwe kyeya kya nsama.

<sup>93</sup> Pano monai, “Baji na muchima umo, kupana bulume bwabo.” Nji panshi ya kikye. “Aya nsengo jikumi.” Ee, pano.

*Mambo Lesa wa bika mu michima yabo kuba kyaswa muchima wanji, (abyo byo kibena kubiwa), kabiji ne kwitabazhanya, ne kupana bufumu bwabo ku lukinya, kufikatu ne byambo bya Lesa po bikobiwa.*

*Pano, kabiji ne yewa mwanamakazhi ye waji kumona ke yewa muzhi mukatampe, uji na bufumu bulama bose bamfumu ba panopantanda.*

<sup>94</sup> Pano, kechi kuji kuzhokoloka ne, twayuka mba abwe ke butangi bwa ki Katolika. Kechi kikebewa muntu nangwa umo...Na—Naketekela kyo kyo mba kya kine nobe byo Naketekela mba Natambula Mupashi Wazhila. Naketekela kyokyo pamo byonka byo Naketekela mba Amiwa ne Mwinakilishitu waimana pano leelo, amba butangi bwa ki Katolika bo—bo...Awa Muzhi wa Vatican ye—ye muzhi waikala pa mitumba sebeni. Abwa butangi bwa kipwilo ye lukinyama wapingapo, kabiji ufwapo. Aye ye Babilona. Bintu byonse bya bikwa mu kipikichala bulongo, kyalumbulukatu monse mu Binembelo. Amba ke kipwilo kya Katolika.

<sup>95</sup> Pano, pano popaji kintu kya kukumya. Mwaamba mba, “Kyawama, kechi ubena kwambila amiwa ne, Mulongo Branham.” Bino lekaitu ne mwipuzheko kintu kimo. Twayai tuye pano mu veleeshi wa bu 5.

*Kabiji pa mutwe waji pa...nembelwe mba, KYAFYAMIKA, BABILONA MUKATAMPE, INANJA*



*BYA BUNYA...INANJA BA PITE NE BYA BUNYA  
BYA PANO PANTANDA.*

<sup>96</sup> Wajinga ng'anyi? P-i-t-e. Kabiji wajinga i-n-a-n-j-a. Kika? I-n-a-n-j-a. Aye wasemene kintu kimo. Inanja baana babalume nyi? Waba pite! Nga pite kyo kika? Kyo kintutu kimo nobe—nobe pite, mwanamukazhi wa byubilo byatama? Lufunjisho lwanji. Aye wimwesa nobe kipwilo kya Bwinakilishitu, bino kasa apana mafunjisho alenga-muntu. Kabiji papo ubena kwamba mba wajinga na... Inge wajinga ko kabungwe katanshi, nanchi kyamweka kuuba mba kuji tubungwe twalupuka kufuma mwi aye. Wajinga inanja bapite. Abyo ibyo nyi? Inanja bapite. Kechi wakonsha kwikala inanja, pano, wa basongwalume. Kechi wakonsha kwikala inanja...Wajinga inanja banabakazhi. Kabiji, inge bajinga banabakazhi, bajinga bipwilo. Pano twayai tukebe bishinka. Kika kyafumine mwi...

<sup>97</sup> Nanchi kabungwe katanshi kajinga kepi? Katolika nobe kipwilo. Nanchi kabungwe kabubiji kajinga kepi? Luther. Nanchi kabungwe kabusatu kajinga kepi? Zwingli. Nanchi kyaishile kufika kuka? Calvin. Kabiji kyaishile kwikala ke Anglican, kabiji kufuma Anglican kyaikele ke Methodist. Aye Methodist, Nanchi Methodist wasemene ka? Kufuma momwa kwaishile Alexander Campbell. Kufuma mwi Alexander Campbell kwaishile John Smith. Kufumamo...Alexander Campbell ke kipwilo kya Bwinakilishitu; nanchi, bajinga foolo nangwa faivi, kipwilo kya Kilishitu kabiji ne tonsetwa tumisapi twa tuheche twafuminemo. Pano kwaishile kipwilo kya Baptist, mwajinga mabano avula bingi. Kabiji kufuma kipwilo kya Methodist kwaishile...kufuma mu kipwilo kya Methodist, kwaishile, patanshitu kwaishile Wesleyan Methodist, kabiji baabenepo foolo nangwa bimye faivi. Pano kwaishile musango mukwabo wa Methodist, kabiji babwela bafumamo jibiji, pano kwaishile kwikala ba Free Methodist. Kabiji—kabiji bafuma mu kyokya ke ba Nazarene. Kabiji kufuma mu Nazarene ke Pilgrim Holiness, kabiji kufuma Pilgrim Holiness kuyatu ne kulutwe. Ke tumisapitu tuheche twafuminengamo byonkabya, ne kutwajijila kuya kulutwe, kamo katotwa tuheche—tuheche mwatatwile kufuma bikwabo kuyatu ne kulutwe. Kabiji byonse bya byaubile ka? Kabiji pa kupezhako byafikile ku Pentekositi.

<sup>98</sup> Pano nga Pentekositi waubile ka? Kintutu kimo kyaubilepo inabo, babwele ne abo balengamo tubungwe. Kabiji kyaishile kwikala ke kika? Ke—ke dinominesheni. Twelai mu imo, kintu kitanshi, “Nga lufunjisho lobe luka?” Mulunda, bakusang'una na kisang'uno kya jino-jawama, monai, pakuuba mba batane byo uji, ne byo waketekela. Kabiji inge kechi wakonsha kuling'ana nabo ne, mulongo, nishi bakufumya pakachi kabo. Kabiji abyoyi.

<sup>99</sup> Pano kechi wakonsha kulanguluka mba mambo waamba mba wiiwa ki Pentekosito nishi uji na bukikizhi ine. Mulongo, kukekalatu bamvula ba ki Pentekositi babula mijishinda nobe byonka byo baji mujishinda, Naketekela. Mwamona?

<sup>100</sup> Pano, tonsetwe tubungwe, inge balekeletu mapesho a ki Pentekosito atwajijila, kechi kulengamo kabungwe ne, kwikilekatu kyaikala ke butemwe bwa balongo ne kuleka aye Mupashi Wazhila watatula kwabanya. Aye Mupashi Wazhila wabanya. Ananyasa ne Safila waishile kimye kimo, waambile mba *kikananga-ne-kikananga*; kabiji Mupashi Wazhila waambile mba, “Kika kyo waji kubepela?”

<sup>101</sup> Bino twaamba mba, “Pano, awa ke Mulongo Jones, kwambapo kintu kyatama nangwa kimo pe aye ne, ye panyi bingi ye tuji nanji mu kipwilo. Nayuka namba aye uji na Mupashi Wazhila; Namumvwine kwamba mujimi, kabiji Namumona kubijika mu Mupashi.” Akyo kechi kijipo na kintu ne pamotu nobe kwichila kunde pa mwayi wauma wang’ombe. Mwamona? Kechi kijipo na mwingilo ne. Lesa ye waamba. Aye ye waamba kana byo byoaji nangwa ine. Kyakine. Bino twikitwajile mwayila dinominesheni wetu. “Kyawama, twamupanga kufuma mu—kufuma mu Assemblies, ba Oneness bamutola. Ba Oneness bamusendako pa kakimye kacheche, kabiji ne abo babwela bamupangamo. Mambo, bamusenda bamutwala kokwa, kabiji ba Yesu Yekatu bamutola. Jesus Only bamutulapo pa kakimye kacheche, kabiji kyalondelapo ba church of God, bamutola. Church of God of Prophecy bamutola, kabiji ke ba Tomlinson move bamutola.” Oo, ami! Mulongo, inge kechi twapwisha byonse ne! Amo ke mu Pentekositi, kusangululwa kwapelako. Kabiji pano kuji ba Blue Flame, kabiji baji ne na bapopwela manyi, abiji ne—kabiji ne ba mashi mu meso. Kabiji, oo, lusa, Amiwa kechi nayuka kobafika pano ne.

<sup>102</sup> Ke kintutu kimo, kya kuuba mba kyonsetu byaalukatu ke kyabula kulumbuluka. Bushe mwayuka mba Baibolo waambile mba kikekala kyabula kulumbuluka nyi? Bushe mwayuka mba aye—aye Baibolo waambapo pa jino juba, amba jikekalako, kya kuuba mba ne matebulu a Nkambo akayulatu malashila? Kabiji waamba mba, “Ng’anyi ye Nakonsha kufujisha lufunjisho? Ng’anyi ye Nakonsha kulenga nkukwatakanya Amiwa? Mambo kisopelo kyafwainwa kwikala pa kisopelo, kwikala pa kisopelo, ndonda pa ndonda.” Ng’anyi ye Akonsha kufujisha lufunjisho? Keboba basumuka ku mabele, aba inanji. Mwamona?

<sup>103</sup> Pano, kechi kujipo—kechi kujipo mwanamukazhi, mwanamukazhi wamushingi mu uno muzhi ne kanatu yewa wakonsha kusema mwaana wamukazhi kisungu. Byoaji pa kusemekwa, pano, kabiji wakonsha kuya bulongo. Pakuuba inge kechi mwakonsha kumona ne, bainanji bajingatu musango umo, awa songwakazhi, mu jikumi kufumyamo naini, bakekala na byubilo pamotu na byubapo bainanji. Bino, mwayukatu

amba abyo ibyo. Mwanamukazhi mukulupe ulama nzubo ya yukanyikwa na byubilo byatama, wakonsha ku komesha songwakazhi muचेचे. Aye wakonsha kwikala na myaka sikisitiini, watokeshiwa kabiji wabyubilo byawama nobe kikwibu, bino, inge waikajijilatu muyewa musango. Bino, kine kintu ke kino, aye ubwela kabiji watatula kuba byubilo byubapo bainanji.

<sup>104</sup> Pano, kipwilo kya Katolika kyajinga pite wakala mutanshi ao waishile na mafunjisho o a lengele aye mwine, byubilo bya kufwanyikizha, abyo, Baibolo waamba mba, “Aye wafumine mu kalengwa kabula kupela ne kuya mulonaiko.” Aye Baibolo ye waamba kyokyo. Pano, inge bafunjisha kyokyo, kyaya mungi. Kyaya mungi, mwaila Kyambo kya Lesa. Kabiji pano kwaiya kipwilo kya Methodist, akyo kyasemekelwe kufuma mwi aye, inetu wakyanyike walamba, bino waubile ka? Aye waalulukile ne kuba bintu bimo byonka byubapo inanji. Waleka kipwilo kyanji kumvwala tuputula. Wibaleka ke bapepe tusanga. Wibaleka kutwajijila na kuba byubilo monka mo basakila kubila. Kafwapo nangwa kimo kyakwambapo pa kyokyo ne. Aye muचेचे mubiji kafunga wakala wabula-kupisha kunyuma kokwa, ku pulupiti kunyuma kokwa, aye uji na moyo kuchina juba jimo wabula kufola, nangwa sanyi ya mabisikechi.

<sup>105</sup> Leka kubuule, mulongo, Amiwa kyangwamina kusapwila Mambo awama, ne kuja kashinkwa kauma ne kutoma meema afuma kumusapi, kabiji ne kwamba bya Bukine pa kyokyo. Inge muntu yense wa mukipwilo kyami waimana ne kulupukamo, Amiwa nkebabula Bukine pa kyokyo. Ee, kine.

<sup>106</sup> Lukatazho lweepi? Oo, ke jichikichi ja bya kuja. “Kyawama, mwayukatu, Amiwa ne kafunga wa kipwilo kyakila mu kubaya mu muzhi yense.” Anweba ba Baptist ne ba Methodist muteleka ku ngauzhi wabubela. Pano, akyo kyakonsa, pakuuba yense ufujisha byapusanako na yuwe Baibolo ke ngauzhi wabubela. Amiwa kechi nasakamana ne nangwatu ki waminishiwe byepi, ke bungauzhi bwa bubela. Abye ibyo.

<sup>107</sup> “Oo, byonse bijitu bulongo kikulutu jizhina jobe janembwa mu buuku.” Wakonsha kwikala na jizhina jobe janembwa mu mabuuku avula. Inge kechi jiji mu Buuku wa Bumi ne, obewa walubilamo! Wakonsha kwikala wawama bingi, wakonsha kwikala walukokelo ne kutokeshiwa kabiji wa byubilo byawama, akyo kechi kijipo nakintu kimo kya kuuba nakyu ne.

<sup>108</sup> Isao wajinga na bibese bibiji kukila byajinga Yakoba, inge kyangwalwa mwayila bu muntu, walaminenga bashanji bakote bampofu kabiji ne bintu byonse bikwabo. Kabiji Yakoba wajinga wabuvu pacheche watanwangatu ku empulo wa bainanji, songwalume mukulumpe wa muचेचे wa kyanakikazhi. Bino Lesa waambile mba, “Yakoba Namutemwa ne kukana Isao,”

bonse babiji basongwalume kasa bakyangye kusemwa ne. Loma 8 byobyoyo aamba. Abyo kine ibyo.

<sup>109</sup> Lesa wayuka biji mu muntu. Kabiji Aye wayuka biji mu kipwilo, ne abyo. Twikela ku Shinkwa wa Bumi, Shinkwa wa Kyambo ya Lesa. Pano, akyo kyotwabujila kwikala dinominesheni.

<sup>110</sup> Pano Nasaka kwi mupa kikwabo kicheche...Nasaka kwimulondolwela kupichila mu kintu kicheche kyo Nanemba papo. "Aye mukatampe..." Pano mu Lumwekesho, mu 19:2. Njina kintu kimo kyanembwa papo. Nasaka kumona byo kiji pano.

*Mambo lolwa kine ne koloka luzhachisho lwanji: mambo wamuzhachisha awa pite mukatampe, waongwelenga pantanda na bwanji bulalalale, kabiji aye washinkanya nanji na mambo a mashi a bakalume banji aji ku maboko anji. (Ayo yo mpelo ya kipwilo kya Katolika.)*

<sup>111</sup> Pano, twakeba mba ne anweba mumone, ne papo, amba dinominesheni—amba dinominesheni ne ayo yatanwa mu Binembelo papo, amba...Kabiji Baibolo kechi yaambapo pa dinominesheni ne. Dinominesheni yafumine ku kipwilo kya Katolika. Aye ye mutanshi inanja wa dinominesheni, kabiji kila dinominesheni wafuma ku yonkaya ndonda. Pano, akye kisakwikalako kibena kuko Zhang'ana pacheche. Kisakuyangatu na kubailako kuko Zhang'ana kimye kyonse, mwamona. Bino Na—Nasaka namba mumone mba madinominesheni kechi asemekelwe nangwa kubikwako na Lesa ne. Kyabikilweko na diabola.

<sup>112</sup> Kipwilo kya Lesa ke...Atweba kechi twaabanapo ne, bonse twi mubiji umu; luketekelo lumu ne lufunjisho, kimotu mu butemwe. Akyo kyo Kipwilo kya kwa Lesa mumi. Nangwatu bekale mu musango ka, abya bintu, tujitu pamo! Abyo ibyo. Nangwatu aye Methodist nangwa Baptist, mulongo, inge wasemwa jibiji ne kuyulwa na Mupashi Wazhila, aye ke mulongo wami. Atweba tubena kwendelatu pamo. Ibyo. Ee, mwane. Kechi kijipo na lupusano ne.

<sup>113</sup> Mosesa. Kimye kimo Amiwa nkeketa ne kwaamba mba, "Abewa wayuka aja jibumba ja kisangajimbwe ja ba Pentekosito, Mulongo Branham, kika kya kuyila na joja jibumba ja musango yewa?" Mwayuka kine kintu nyi? Mosesa watajilenga pa baana ba Isalela. Aye watajilenga pangye kwingijisha kipeze kimo kyatajilengamo Felo. Felo watajilenga pe abo nobe jibumba ja kukandula-mulobwe, bino Mosesa watajilenga pe abo nobe basalululwa kwi Lesa. Aye wayukile mba baji na mulaye. Kika? Aye wiikiyukile kupichila mu Kyambo. Kabiji ko kulwitabilo...Na kulu kwanji pa njitanda, kwikala Felo, ntanda yonse kasa iji ku maulu anji, waikele popa kasa

bamwichila binyu mu kanwa kanji, kabiji ne banabakazhi balamba kasa babena kupumpushila mwela pe aye, nobe mfumukata, nangwa nobe tangi nkajikinzi, nangwa nobe mfumu wa ntanda yonse, mwanyike Mosesa, pa myaka foote, wajinga nakyo mu maboko anji. Aye watajile pa joja jibumba ja kukandula-mulobwe, bino wayukilemba aye ye umo mwi abo. Aleluya! Abyo byokiji. Aye wayukile mba ye umo mwi abo. Kabiji ko kulwitabilo, bunke bwanji, aye ko asalulwijile!

<sup>114</sup> Muntu yense wafwainwa kusalulula. Obewa wafwainwa kusalulula. Obewa usakusalulula ponka pano. Obewa usakusalulula mu lukeelo kelo. Obewa ukasalulula keesha bufuku, inge waikala na bumi. Wafwainwa kusalulula kimye kimo. Mulongo, kimye kyapita kunyuma Nasajile. Awe Baibolo wajinga buuku wakulumbulula byambo. Awe Baibolo wajinga Buuku wami wa Bumi. Awe Baibolo wajinga Kyambo kya Lesa. Awe Baibolo imo Amiwa mongikela. Awe Baibolo iko ko Naimena.

<sup>115</sup> Onkao mambo, Mosesa watajile pa baana ba Isalela. Kabiji kechi waambiletu mba, “Oo, ke bantu bawama bingi ne. Amiwa kechi jipo na kintu kimo naabo ne. Oo, ine, Amiwa kechi nafwainwa kwambapo kintu kimo kyatama pe abo ne.” Ao ye musango bantu bavula mo bobila buleelo. “Oo, aba ba Pentekosito ne booba bantu baji na Mupashi Wazhila, ne booba bantu baketekela mu lubuko lwa Bulesa, oo, Ami—Ami—Amiwa kechi njipo na kintu kimo kyatama ne abo ne.” Bino awa kechi wajinga Mosesa ne. Aye wakaine Ijipita ne kwikala umo wa mwiabo. Aye waile mukachi ka balongo banji. Aye wajinga umo wa mwi abo.

<sup>116</sup> Mulongo, amo imo Amiwa moosendela jishinda njami. Amiwa katola jishinda ja bacheche ba kwa Nkambo basulwa, inge ye mukono umo, musango yense mo baikela. Baji na mulaye, kabiji ne Amiwa mbena kumona mazhina abo anembwa mu Buuku wa Bumi wa Mwanamukoko. Abo ke balongo bami. Abyo ibyo. Salulula lubaji lobe ne kwimana nabo. Mukuwama nangwa mukutama, imana ponka nangwa byonkabyo. Inge baji mu kilubo, bakwashai kuba kyawama. Ibyo. Anweba kuuba mwibalengela kwikala bawama pa kwibapanga ne. Monai, esekai kwibafumyamo.

<sup>117</sup> Charlie, byonka byo baambijile Mulongo Allen, pa mambo amujilo ye...mashi mu maboko. Naambile mba, “Kechi, kechi Nakisulapo A. A. Allen ne.” Naambile namba, “Inge Nakonsha kusapwila nobe A. A. Allen, kechi Nakonsha kwikala na mpwijilo ya lubuko ne.” Pano, inge kyafika pa kubula kuswang’ana na mambo a mashi kwikala bukamonyi bwa Mupashi Wazhila, mu maboko obe, Nakonsha kukana pa kyokyo. Pakuuba inge kyaiya pa butemwe bwa balongo, aye ye mulongo wami. Nakonsha kwimana nanji pamo mukondo. Abyo ibyo. Inge uji mu kilubo, Nakonsha kweseka kumukwasha. Kabiji

inge kechi uji mu kilubo ne, inge Amiwa yami nji mukilubo, Nakonsha kukeba aye kukwasha. Kabiji ajo jo jishinda jo—jo twendelamo pamo. Pano talai papo.

...aye wajinga *KYAFYAMIKA, BABILONA...AYE INANJA BA PITE...*

<sup>118</sup> Pano mwamona kipwilo leelo, balunda, mwakonsha kumona abye bipwilo leelo bikalatu mu musango yense mo bakeba kwikelamo nyi? “Kyalumbulukatu bulongo, yaingatu bulongo,” inanja nkumba waja nkumba, kutako muchima ne. “Kika, kechi kujipo lukatazho pa kuba kyokyo ne. Kika, esekaitu kwikala mu musango wakala.” Pano monai lufunjisho lwabo. Pano Nakeba...Pano tajishai. Awa ye musango wabo. Bushe mwamona, amba myaka icheche yapita kunyuma, amba kipwilo kya Katolika kyo kyonka kyaswishanga kuya nakutamba bipikichala nyi? Ba kipwilo kya Methodist kechi balangulukangapo kintu kya byobyo ne. Byonsetu ke madinominesheni, “Ine! Awa yo mingilo yakwa diabola.” Nakumya kana kika kyamwekele. Ee, mwane.

<sup>119</sup> Kabiji mwayuka, mwakonsha kwibasenda ba basongwakazhi bakyanyike ba ku Katolika, balupukatu na tutwe tuheche... (Pano, anweba bamo basongwalume bakala bakoma nobe Ami)... balupukatu pano monai tutwe tubitu tuheche twakufikatu-mu manungo. Awa mwanamulume, Naketekela, uji mu ngehena, bufuku buno. Amiwa kechi nayuka ne. Amiwa kechi ne wakumuzhachisha ne. Bino kimye kyo aimbile awa lwimbo mutanshi wabiko waumvanyikile pa waileshi, kwakubula kufumyamo byatama ne, awa, “Balang’anyai, basongwakazhi, balang’anyai; balang’anyai pashi mumweshe manungo enu alamba.” Baanga bamuvuluka kimye kitanshi kyo alupukile, myaka yapita kunyuma? Apa ponka po pajinga kupusa-kutanshi. Abyo ibyo. Kabiji byo bajinga nayewa muntu wafumine ku Texas, ne kutwala banabakazhi kabiji ne kwingijisha bya kuvwala bya mukachi pa kuuba mba bamwekenga nobe buntu bungi bobabula, ne bintu bikwabo nobe byobya, kabiji bebaleka kwakubula kupewa mambo ne. Kabiji pano kyaubile ka? Kyatatwile kutwelelelwa. Ke mupashi.

<sup>120</sup> Mwanamulume umo waambilenga, juba jikwabo. Aye waambile mba, “Amiwa kechi Nayuka kyo nsakuba ne. Njina wawama, songwalume wakishinka, watatula kuba mba kyonse kyo abikapo maboko anji nishi watola.”

Naambile mba, “Kika?”

“Aye wakwatakana na ngivi.”

<sup>121</sup> Obewa inge wakwatakanatu na muntu ngivi, ukekala ngivi obewa mwine. Bamaama bami bakala ba ku Kentucky baambanga kimye kyavula mba, “Inge walala panshi na kabwa uji na mbalebale, ukemanapo na mbalebale, ne obewa.” Umvwe

watola—umvwe watola mwanamukazhi wabula kuyama, kabiji lekai. . . songwakazhi, kabiji ne ku mubika pamo na—na songwalume wabyubilo byawama, kabiji kintu kitanshi mwayuka bakatatula kupusenamo mambo aye kechi wibiyuka ne. Kyalwilai mu lubaji lukwabo. Obewa uyukanyikwatu na bantu bo ukwatankana nabo. I abanye obewa mwine! “Lupukaimo mukachi kabo,” byo byaamba Baibolo, “abanai nabo!” Abyo ibyo.

<sup>122</sup> Inge madinominesheni abo abwela kubobwa bubole nobe kuleka bantu babo. . . Kyawama, kuno juba jikwabo, mu kipwilo kikatampe kyawama kya Baptist, bapangile. Amba wafwainwatu kusapwila mamineti tweeti, muntu wakonsha, mambo kafunga wapepele fwaka. Akya kipwilo kyonse balupukile pangye. Bonse bwabo baimene na kupepa fwaka kyabaya bingi, kabiji ba bwelele jibiji, kafunga ne bonsetu. Naile ku kipwilo Kyanemeka kupwila, kokakwa muntu waimene, wamvwajile mukukumba walepa, waimene byobya, ne waambaile mba, kasa ashakamina pa pulupiti *bibye*, waambilenga pajiluba jo ataine ku katumbatumba. Abyo byo byonka byajingakotu, kabiji byo alupukile byonka bya. Kabiji minwe yanji yajingatu ya kibobo na bwishi bwafwaka. Ee. Kabiji pa kwamba pa banabakazhi, awa mwanamulume wailenga na kukaya. . . Ng’anyi aya kailo ya kina German yo bakaya na byobya, kya kwamba mba anweba—anweba ke mwingijishe ngyuka, mwayuka? Najinga. . . Oo, Nalanguluka mba Nsawkivuluka. Kisela kya ngyuka, bailenga na kukaya kisela kya ngyuka. Nalanguluka mba abyo ibyo. Ee, kijitu ko wingijila. Ke kimye kyonse kukaya ngyuka. Kisela kya ngyuka, monka mwakukokolokela! Ami, buwame! Ako ko kuji kitendekesho kyakyo. Kechi kyakukumya ne! Kika kyo bobila kikye? Kabiji ke bambe pa kipwilo kya Katolika papo pa mampuzha pa Lotali paji bya kwi kyombesha. Kika, anweba ma Polotesitati mujitu pamo biko naabo, nanchi kika kyo mwakonsha kwamba pa kikye? Mwipika kechi wakonsha kutela ketulu mba “ndochi ne.” Kechi ibyo ne. Mubena kuba kyokyo, kabiji ke mwambe mba, “Kyawama, Amiwa ne Presbyterian. Amiwa ne Methodist.” Kafwako nangwa kimo kyo uji ne kanatu wasemwa jibiji. Abyo ibyo. Kabiji umvwe mwauba kyokyo, mwayukatu, mujipo kintu kimo kikubula byobyo bintu amba byatama, kabiji mu kafumamo mu kyokyo kine kasa muji pa kufika-mujinungo ne kunyemamo. Mwayuka mba abo bo Bukine. Kyakine. Ee, mwane. Abyo bintu byendela pamo mu kyokyo. Kika?

. . . AYE INANJA BA PITE . . .

<sup>123</sup> Juba jimo ja moba abena kwiya, maama wakala ukamba mba, “Mwayuka nyi? Nangwa byonkabyo, mutemwe, bonse tujitu pamo.” Kabiji mwayuka byo kiji nyi? Aya Mbung’eno ya Bipwilo baketa bonse kukwatankana pamo byonka byo baji

pa kino kimye. Kabiji mwayuka kikamweka ku kajibumba kacheche kaji nobe kano nyi? Anweba mukalipila pa kyokyo, basongwalume. Abyo kine ibyo.

<sup>124</sup> Bino kwakamwa ne, aye Mwanamukoko ukamushinda. Mambo Aye ye Nkambo ya ba nkambo, kabiji ye Mfumu wa ba mfumu, kabiji Lesa ukatwajijila na kutangijila Kipwilo Kyanji, mukifulo kya dinominesheni. Aye uketulwila Manyi a golonde a Mupashi Wazhila pa Kipwilo. Mulongo, Mujilo ukapona kufuma Mwiulu, kabiji biyukilo ne bya kukumya bikamweka, byo mwabula kumonapo kunyuma. Ee, mwane. “Kuchina ne, kajitanga kacheche, kyo kyaswa muchima wa Shenu kwimupa Bufumu.” Ee, mwane. “Aye ushinda kufikatu ne kumpelo!” Amo momwakuyla. Lamaitu jishinda. Lamai mutwe wenu kasa atala ku Kalvali. Awe Baibolo ujitu bulongo. Kechi musakamane ne.

<sup>125</sup> Pano monai. Abye byo byubilo bimo byo baji nabyo. Byubilo bimo byatama byo baji nabyo. Twakonsha kutwajijilatu kuya kulutwe. Kintu kitanshi mwayuka, kyakwata ne ku bipwilo bya ma Polotesitati. Nanchi banabakazhi ba ku Katolika batatwile ku . . . Kika, kechi kiji na kintu kuvwala kaputula ka kacheche ne, kikulutu baya ku kipwilo babika ne katambala ka kacheche ku mutwe wabo. Musango umo wakisho, “Kechi muje nyama iji yonse pa Kitanu ne.” Kabiji, oo, kwepi komwatana kubika katambala ku mutwe wenu pa kutwela mu kipwilo? Nasaka namba mumweshako Kinembelo. Ke bungauzhi bwabubela. Kwepi ko kitanwa mu kipwilo amba mwafwainwa kuvwala kisocho mu kipwilo? Inge mwavwala kisocho ku mutwe wenu, kekulengulula Kilishitu, ibyo; bantu, bo Mbena kwambapo. Banabakazhi, muji na kya kuvweta mutwe, bino Nakambizha muntu uji yense nkumweshi paji kisocho nangwa katambala. Ke suki yobe! Kabiji wiitendamo. Pano ngaakyo? Oo, baamba mba, “Ao ke musango wakala.” Inge byo kiji, ke Baibolo! Kabiji Kyambo kya Lesa kiji bulongo.

<sup>126</sup> Kusapwila kuno, kechi papita kimye kyabaya ne, pa mwanamukazhi waomvwele mauulu akwa Yesu, kabiji watolele suki yanji, mwayuka, kabiji—kabiji wa munshimwine nayo. Naambile namba, “Jishindatu mwanamukazhi jo akonsha kubilamo kyokyo, ke kwimena ku mutwe wanyi pakuuba mba ekale na suki yavula ya kovwelako mauulu Anji, ya kunshimwinako.” Abyo ibyo. Oo, ke, ke kyabuvu pa kumona jishinda ja . . . Kuno, kimye kya mashika, kwendauka na kakochi kakacheche kabena kumweshi mubiji byonka bya, kabiji mibiji yabo ya bwamba kasa imweka.

<sup>127</sup> Pano baamba mba, “Kika kyo utolelatu banabakazhi?” Mukebewa ne anweba kwimutola.

<sup>128</sup> Kabiji anweba banabalume muswisha banabakazhi benu kuba kyokyo, mulongo, Amiwa—Amiwa kechi nayuka bya kulanguluka pe anweba ne. Pano, abyo ibyo.



129 Kabiji anweba bakafunga, kechi Naketekela mba muji muno ne. Bino umvwe wamona shetu, wamubuula mba iya, wamubuula mba, umone. Mwamona? Inge kechi uji na mushingi wa Kilishitu ne ukaleka kipwilo kyanji kuuba byobya kwakubula. . . Pano aye. . . Bakonsha kwikyuba kunyuma yanji, pakuuba inge kechi wiibabula ne pa kikyeye, aye kechi wafikilamo kwikala kalume wakwa Yesu Kilishitu ne. Abyo kine ibyo. Aye kechi wafikilamo kwikala kalume wakwa Kilishitu ne. Kalume wakwa Kilishitu wafwainwa kwikala wabula moyo umvwe akyo kyaikala kyafuma Baibolo. Kyakine. Pakuuba abyobyobyaji, baya ne kwibyuba nangwa byonka byo.

130 Kabiji pano, kintu kitanshi mwayuka, ba Polotesitati bekitolele. Anweba ba Methodist bawama, kabiji anweba Baptist, ne anweba ba Presbyterian, nangwa ba Nazarene, Pilgrim Holiness, kabiji ne anweba bonse, kintutu kimo, bafumamo, kamo mu sikisi, kabiji kichika kya dazeni kya bakwabo. Abyo byo kiji, “Inanja ba pite.” Dinominesheni wenu, “Kikulutu watatwile ku maofweshi akatampe, ng’anyi lupusano lujipo?” Mwamona? Kilenga lupusano lwabaya bingi. Kechi watatwile, *awa* Ofweshi mukatampe ne. Kyafwainwa kutatwila ku maofweshi enu akatampe kuno, bino kechi yewa Umo akwa Kwiulu ne. Kiyilatu ko mwafuma. Akyo kine.

131 Pano, Nalanguluka mba kechi tuji na kimye kya kutola akye kikwabo ne, kape kyawama Nekileke ke kya lukeelo kelo. Kijitu bulongo, twayai tutoletu kikyeye kyaipipa. Tuji na, papo, “lubatizhilo lwa mu meema.” Tuji ne na “kusalulwila jimo,” kabiji, oo, bintu byavula. Nanchi twayai tutole kikyeye, akye kicheche, kyaipipa kya “banabakazhi basapwishi,” kabiji ne kutola kikyeye.

132 Pano, pano, inetu musapwishi, Amiwa kechi nasaka kukozha michima yenu ne, bino Nasaka kwimubulapo kintu kimo. Anweba kechi mujipo nangwa na kimo kishabu shabu kya Kinembelo ne, kafwako nangwa kimo mu Baibolo ne. Ee, Nayuka ko mubena kuya, kabiji Njina byonse byenu, ee, “Kabiji baana benu babalume ne babakazhi bakaula.” Pano, umvwe kafunga wenu kechi wayuka kyalumulula kyambo kya “kwaula” ne, aye—aye nishi kechi wayukapo kintu nangwa kimo ne. Aye kechi ujipo na mwingilo wabaya kunyuma ya pulupiti, kweseka kwi mubuula anweba kwikala musapwishi ne. Mwamona? Mambo, kya kine, kya kanyiwa kufuma ku Ntendekelo kuya ku Lumwekesho. Pano lekai ne mumweshe kikyeye, mwamona.

133 Pano Nasaka namba anweba muzhikule mu Timoti Mutanshi 2:11. Pano zhikulatu papo kabiji tusakutana kikyeye, kabiji tusa kwi kitana papo, ne apo, Byubilo 2 wenu. Ee. Kabiji pano—pano telekaitu papo Kinembelo byo kyaamba payuwe mutwe.

134 Pano, muntu umo watwajijiletu nakwamba mba, “Kyawama, Mulongo Branham, obewa wiiwakala wanshikwa

mwanamukazhi.” Amiwa kechi nanshikwa banabakazhi ne. Amiwa ne. . . Amiwa kechi nkeba kumona banabakazhi kutola kifulo kyabula kyabo ne.

Mwavuluka pa Kusungila mato pa Howard kukwe, pamo pa kusungila mato payingila bingi bulongo ku Mukola wa Ohio? Babikapo mukulumpe mwanamukazhi. Talai kya mwekele.

Bapaine nsambu ya kuvota ku mwanamukazhi. Talai kyamekele.

<sup>135</sup> Lekai ne mubuule ponka pano. Kechi kusubatu banabakazhi ne. Nasaka namba banabalume bayuke mba baji mukikye nabo. Bino leka kubuuleko kintu kimo, mulongo. A kino kyaalo ke kyaalo kya mwanamukazhi. Amiwa nsakushiniikisha kwi anweba, monka mu Kinembelo, kupichila mu kiji kyonse kyo mukeba kushiniinwa nakyo. Akye ke. . . Kika kimweka pa mali etu? Mwanamukazhi. Utanwa kwepi? Mu Lumwekesho, mumwe, musa kumumona. Aye ke nambala satiini, kabiji, byonse byo atapile; tubaangabanga satiini, mikakamba satiini, bibuji satiini. Satiini, byonsetu byajinga satiini, kya kutatwilapotu. Wamweka mu kyapitala kyabu 13 mu Lumwekesho. Mwanamukazhi, satiini!

<sup>136</sup> Kabiji mu 1933, kimye aye Nkambo. . . Kimye kyo twajinga nampwijilo ponka paji kipwilo kya Kilishitu, nzubo yakala ya Busendwe bwa mabwe, kimonwa kya Nkambo kyaishile kwi amiwa kabiji naambijile jimo amba “Germany ukemana kabiji ukabika Kishilwa kya Maginot kokakwa.” Anweba bavula mwiikivuluka. Kabiji ne byo bakekala na bukikizhi ponka pa, kabiji bena America bakapumwa bingi pa kyonka kya kishilwa. Kabiji kyaambiwe ne bikamweka, kabiji ne pe Roosevelt kabiji ne bintutu bikwabo, byo akekala kufika ne ku bundamakyalo bwabuna. Bulongotu, monka kine mo kyaishile kufikizhiwa. Kabiji kyaambile mba myotoka ya icheche ikayangana nakupashang’anya nobe jike, poso mu moba akupelako ikekalatu mu musango wa jike. Kabiji Naambile mba, “Kikeya kufikizhiwa mba aya myotoka ya icheche kechi ikekala na kindilaivo ne. Kukekala kintu kikwabo kya kwikyendesha.” Ke yoya myotoka ya icheche yo babena kuleta kino kyonka kimye. Kiji bulongo. Kechi mukatwela mu muzhi. . . Nanchi, ke mpuzha ya tweti-mailoshi, mwakonsha kuyatu tweti mailoshi. Kechi mwakonsha kwimba mu mukwabo motoka ne, mambo wa kuzhalululwa na limoti. Mwamona, kasa abena kuya mu yekawa musango, kabiji ne ponka pano. Kabiji Naambile mba, “Vulukai, mu joja juba, mpelo kasa ikyangye kwiya, mpelo kasa ikyangye kwiya, awa mwanamukazhi. . . Pano, anweba bonse nembai kikye. Ku kekala wakila, mwanamukazhi wabulume ukekalako, ukekala nangwa Ndamakyalo, nangwa tangi nkajikinzi, nangwa umo wakila wabulume mwanamukazhi muno mu United States. Kabiji ukekajikwa, kupichila mu bongozhi bwa banabakazhi.

Pano, vulukai, akyo ke BYO BYAAMBA AYE NKAMBO.” Mwamona?

<sup>137</sup> Kabiji uji mu kilubo. Kabiji kyashinkula jishinda jabyepi? Lekai ne mubuule. Ikalai ba bumupashi. Lekai. . . Kasulukai. Talai. Kika kyo kibena kubila byobya? Pakuuba mba kipane mpuzha pa kutwelela ku kipwilo kya Katolika. Mwamona? Anweba mupopwela baabo bakaya bisela bya mafilimu kabiji ne byonse bye bintu byapusanako. Vulukai byambo byo Nasapwijile? Margie, mwiiavuluka, myaka yapita kunyuma, pa—pa kutuulwa bulemo kwa United States, pakuuba mba banshinde kafulumende wa America. Kabiji byo Naambile mba wakomejile mu Paris panyuma ya kwi bapokolola kufuma kuboba banabakazhi, waini ne bimye bikatampe. Kabiji waambwile mujilo monka mu Hollywood. Pano, mu kifulo atweba tutumenga ku Paris na kutambulako mafwasho, abo batuma kuno na kutambulako mafwasho. Kyaubile byepi? Kiji na. . . Atweba kuuba twaswisha baana benu kuya na kumona bipikichala ne, pakuuba watwelele monka mu televizhoni, batwelelemo ne kutamisha byonsetu, ne kutwajijila monka. Kabiji pano potwafika leelo, bonse basongwakazhi ne basongwalume, bonse batemwa yuwe musango waboba bakaya bisela bya mafilimu. Kyokika? Kibena kulenga jishinda. Mulunda, umotu mwanamukazhi wabyubilo-byatama wakonsha kutwala bavula bingi ku ngehena kukila ne bonse batoma baji mu muzhi. Abyo ibyo. Mutalai ende pa mukwakwa na bya kuvwala byanji bimweshi mubiji, kechi nataka muchima ne nangwatu ekale mwanamulume wabyepi, inge aye ye wamulume uji na bututulu bwa mubiji, umvwe watala pa mwanamukazhi wakonsha kumvwa kintu kimo kupita mwiaye. Pano ikalaitu ba bukishinka. Amiwa kechi nataka muchima ne. . .

<sup>138</sup> Naikala na Mupashi Wazhila pa myaka yavula. Kuuba watala pa mwanamukazhi wamvwala lubaji lumo. . . Amiwa—Amiwa senda ka musalabo kacheche mu motoka wami, anweba bavula mwiikamona. Muntu umo wang’ambijile mba, “Obewa wi Katolika nyi?” Kwepi ba Katolika po baikalepo na nsambu pa musalabo? Awa musalabo ulumbulula mba “Mwinakilishitu.”

<sup>139</sup> Awa mucheche Cecilia Wazhila wakala ne bintu bikwabo ko kayukilo kabu Kinakatolika. Atweba kechi twaketekela mubitu bya musango yewa ne. Twaketekela mwi Kilishitu. Baji na misango yonse ya bantu bafwa bo bapopwela. Ke musango mukatampe wakupopwela bapashi. Byobyo kiji, kupopwela bafwa. Kafwako kintu kyamusango yewa, ine.

<sup>140</sup> Naipwizhe yewa pulisti. Naambile mba, “Kika kyo mubila, nanchi, inge. . . Petelo wajinga papa mutanshi?”

Aye waambile mba, “Abyo ibyo.”

<sup>141</sup> Naambile mba, “Pano kika Petelo kyo aambijile mba, ‘Kechi kujipo mukwabo ng’ambi pakachi ka Lesa ne muntu

ne kanatu yewa Muntu Kilishitu Yesu'? Kabiji anweba muji na banabakazhi bafwa faivi sauzande, ne bintutu bikwabo, mwibalula ke bang'ambi. Pano kika kyamwekele?" Abyo byobyoyo kiji. Abo kechi baji na mukumbu pa kyokyo ne. Abyo ibyo.

<sup>142</sup> Pano amo mafunjisho abo, lufunjisho lwabo lwabubela, jibumba ja ba bubela bangauzhi ba ki Polotesitati baiya kabiji babena kufunjisha byobyoyo, kabiji ne anweba bantu ba ki Polotesitati mubena kutambulwila. Abyo kine ibyo. Madinominesheni kabiji ne misango ya lubatizhilo, kabiji ne mikambizho yapusana pusana ne bintu byo mubena kupitamo, abyo kine byabula Byanembwa. Aye wikikana, mu Kinembelo, nangwa byonka byo anweba mwi kikwachijilatu. Ke bukine.

<sup>143</sup> Pano telekai ku kikye kya banabakazhi basapwishi. Kijitu bulongo. Timoti Mutanshi, Nakeba Timoti Mutanshi 2:11. Pano telekai byo Kyaamba papo.

*Lekai banabakazhi benu bafunde mu kuzhindama na kukokela konse.*

*Bino kechi Naswa mwanamukazhi kufunjisha ne, nangwa kwikala na bukulumpe pa mwanamulume ne, kana kwikala mukuzhinda.*

<sup>144</sup> Amiwa kechi njina nsambu ya kwikibikamo ne. Amiwa jitu na nsambu ya kubulang'ana mba mokiji. Mwamona? Mwamona?

*Lekai banabakazhi benu bafunde mukuzhindama kabiji bekale bakokela mu byonse. (Inge mwatwela mu kipwilo kya Orthodox kabiji mwi batajisha, monai. Mwamona?)*

*Bino kechi Naswa mwanamukazhi kufunjisha ne, nangwa kwikala na bukulumpe (kwikala kafunga, kwasho, nangwa kintu kyonse kiji byobyoyo) pa mwanamulume ne, monai, nangwa kwikala na bukulumpe pa mwanamulume ne, bino bekale bazhindama.*

*Mambo Adama wajinga mutanshi kulengwa, kabiji apa ke Eva.*

<sup>145</sup> Bushe mwayuka nyi? Pano telekai, banabakazhi. Anweba bawama, banabakazhi baoloka Benakilishitu kyo kintu kimo kyawama bingi akyo Lesa kyo apana ku mwanamulume, inge ne nge Wamupele kintu kyapusanako. Ee, mwane. Mwamona? Mwanamukazhi kechi wajinga ne mu bilengwa bitanshi kulengwa ne. Mwanamukazhi kechi uji mu bintu byalengwa kwi Lesa ne. Aye ke kintu-kyakulengwamo mu mwanamulume. Lesa walengele mwanamulume, kwikala byonse bibiji mwanamulume ne mwanamukazhi. Kabiji Aye wibabenye. Kabiji panyuma muntu waikala kala pantanda ne kutumba banyama mazhina, kabiji waikale pano kimye kyabaya, Aye watolele lubavu kufuma ku lubaji lwa kwa Adama, nobe kintu-kyakulengwamo jibiji,

kabiji ne kulengamo mwanamukazhi. “Adama walengelwe patanshi, kabiji apa ke Eva.” Pano monai.

*Kabiji Adama kechi wajimbaikilwe ne, pakuuba mwanamukazhi byo ajimbaikilwe ne kuzhilulula wazhilulwile.*

<sup>146</sup> Lesa watolele mwanamulume. Aye diabola watolele mwanamukazhi. Kitalai byo kiji, monka mo kyaolokelatu, kika kibena kwikyuba leelo. Talai pa kiine Kipwilo kya Lesa, kikaamba mba, “Yesu!” Aye atikilishitu ukaamba mba, “Maliya!” Imonai aya mipashi. Mwamona? Byobyo iji. “Mutende Maliya, inanja Lesa, watokwa obewa mu banabakazhi, kabiji tulombeleleko atweba bandengamambo, kufika ne kujuba ja lufu lwetu. Amena. Maliya, lombal!” Oo, ami, buwame! Monai, abyo byo kiji, “mwanamukazhi,” ke muntu wakwa diabola. Kilishitu kintu kya bumpopweshi, kabiji ye Yenkatu! Abyo byo kiji. Abyo byobyo kiji.

<sup>147</sup> “Adama walengelwe patanshi, kabiji apa ke Eva.” Adama kechi wajimbaikilwe ne. Kabiji mwakonsha kwikala byepi na kafunga mwanamukazhi, kwasho? Adama kechi wajimbaikilwe ne, pakuuba mwanamukazhi ye wajimbaikilwe. Aye wajinga . . . Aye kechi walangulukile mba uji mukilubo ne, bino momo ajinga. “Awa mwanamukazhi byo ajimbaikilwe wazhilulwile ne kuzhilulula.” Mambo, aye, kimye kyonse kyo kwi—kwikala kijilo mu mukwakwa, mwanamukazhi ye wikiletele. Kimye kyonse ka mwaana inge kajila, mwanamukazhi ye wikiletele. Kimye kyonse muntu umo po afwa, mwanamukazhi ye wikiletele. Yonse suki yavwi, mwanamukazhi wiiletele. Bintu byonse, ne lufu, mwanamukazhi ye wibiletele. Byonse byatama, mwanamukazhi wibiletele. Kabiji mwamubika ke mutwe wa kipwilo, kafunga, oo, bimye bimo bu bishopu. Kimulenge buvu.

<sup>148</sup> Pano lekai ne mwalulwile mu kikyee, kikwabo, mu kimyetu kicheche. Mwamona? Pano twayai tuye momwa mu Kolinda Mutanshi 14:32, kabiji monai Paulo byo abena kwamba papo, kabiji nanchi tusakuya ne kubikwabo byavula, mu kaminetitu kamo. Kabiji kechi twakeba kwimulama mukimye kyabaya ne, kya kuuba mba mukekale bakoka lukeelo kelo ki kalengele kubula kubwela ne. Kijitu bulongo. Nasaka kutanga. Baanga baketekela mba Paulo wajinga mufunjishi watundaikilwenga? Pano, vulukai, Paulo wamunembejile kikyee Timoti ne aye. Mwamona? Akye, pano, Kolinda Mutanshi 14:32. Pano twayai tutampe ponkapo, ne kutatula katanga papo, 14:34, Naketekela.

*Lekai banabakazhi benu bekale bazhindama mu bipwilo: . . .*

<sup>149</sup> Bushe mwaumvwa byo aambile nyi?

*Lekai banabakazhi benu bekale bazhindama mu bipwilo: mambo kechi kyaswishwa abo kwamba ne; pakuuba bakambizhiwa kwikala banekenena, . . .*

<sup>150</sup> Anweba muji na bya kutanga mwapela pa kyokyo nyi? Inge muji nabyo, pitulukaimo mumone kana kechi kisa kwimutwala ku Ntendekelo 3:16 ne. Lesa byo abuujiile Eva, pa mambo akuteleka ku muloolo mu kifulo kya mulume wanji, amba aye ukekala tangi pe aye moba onse a bumi bwanji. Kyakosha kwikala byepi mwanamukazhi kutangijila mwanamulume, waikala kafunga nangwa kwasho, Baibolo kasa abena kwamba mba lekai bekale “banekenena,” nobe byonka bya kyajinga mu ntendekelo? Kimye Aye... Lesa—Lesa kechi ukyinga ne. Anweba kuuba mwalengela Kyambo kyaamba kintu kimo *papo* kabiji kintu kikwabo *papa ne*. Kuuba wikyuba ne. Kijitu kintu kimo kimye kyonse.

<sup>151</sup> Nanchi, mu ntendekelo, amwa imo, akye kasa kikyangye kupwa, inge Naikala na kimye, Mbena kukeba kwi molwela pa mambo a *Masonbola Ne Kwikana*. Amiwa kechi na kikyubapo mu kino kipwilo ne. Bino monai lulwe lulayang’ano lubiji. Umo waamba mba wakonsha kusongolwa; mukwabo ke ambe mba kechi bakonsha kusongolwa ne; kabiji awe umo ke ambe mba *kikye, kyokya*, nangwa *kikwabo*. Pembelaikotu ka mineti kabiji mumone byaamba Baibolo, inge twafika ku kyokyo. Mwamona? Kijitu bulongo. Pano talai papo.

*Lekai banabakazhi benu bekale bazhindama mu bipwilo:... kechi kyaswishwiwa kwi abo kwamba ne; pakuuba ba kambizhiwa amba bekale benekenena, monka mwaambila ne mizhilo.*

<sup>152</sup> Nanchi, mu Lulayang’ano Lwakala, kechi bebaswishishe kwamba ne, mambo Paulo waamba papo amba kechi be kyuubanga ne. Abyo ibyo nyi? “Lekai banabakazhi benu bekale bazhindama. Ke kunekenena.” Pano inge mwatanga kwapelela byambo, kisa kwimutwala kubwela ku Ntendekelo 3:16. Mwamona? Kijitu bulongo. “Monka, monka mwaambila ne mizhilo.”

*Kabiji umvwe bakonsha... kufunda kiji kyonse, lekai babo... bepuzhe—bepuzhe balume babo... ku nzubo: mambo kyo kyabuvu mwanamukazhi kwamba mu kipwilo.*

*Kika?...*

<sup>153</sup> Pano talai pa kyokya kipuzho pa onse ma Baibolo enu, pa kyokyo, “Kika?” Kika kyalengejile Paulo kwamba kyokyo kabiji ne kubila muyewa musango? Pano, inge mwakonsha kutola makalata bena Kolinda o banembele kwi Paulo. Pano, mwakonsha kwiatana mu kyonse kishimikwa kyawama mutanwa mabuuku akutangamo, monai, aa bena Kolinda o banembele kwi Paulo. Banembele ne ku mubuula, panyuma ya babo banabakazhi baalulukile... Bajinga na—na lesa mwanamukazhi kokwa, watelelwe mba “Diana.” Kabiji wajinga waku Efisesa, ne aye. Kabiji bena Kolinda nabo bapopwejilenga

kintutu kimo, mambo bwajinga bupopweshi bwa butushi. Kabiji bataine jibwe mu bujimi juba jimo, ja mwekelenga nobe mwekelo ya mwanamukazhi. Baambile mba, “Lesu mwanamukazhi, kabiji aye wapana kipasha kyanji panshi kwi atweba.” Kabiji tempo wabo wajinga wakila wakwa Solomoni, byo baambile, balonda mashimikila akala. Oo, wajinga wa mabwe, wazhokolokwa na golonde; ako, tempo wakwa Solomoni wajinga wa kinchi kyasinda, mukachi kyabikwa na golonde. Mwamona? Kabiji kyajinga kyakila bingi. Kabiji amba, nanchi, inge Lesu wajinga wa—wamukazhi, kika, kine, wafwainwa kwikala na mapulisiti banabakazhi. Kine, inge Lesu mwanamukazhi, nanchi mwanamukazhi musapwishi ujitu bulongo. Bino, Lesu Mwanamulume. Aye Baibolo waamba mba Aye Mwanamulume, kabiji Aye Mwanamulume. Mwamona? Kabiji inge Lesu wajinga Mwanamulume, nanchi wafwainwa kwikala mwanamulume.

Pano monai papo, “Kika?”

<sup>154</sup> Pano, bamo bamwiabo mapulisiti banabakazhi, kimye kyo baalulukile kufuma kubutunshi kuya mu Bwinakilishitu, abo balangulukile amba bakatwajijila mu maofweshi abo nobe basapwishi, kwiyatu kasa batwajijila. Inge basapwijiile kokwa pe Diana, kabiji baiya kuno ke basapwile pe Kilishitu.

<sup>155</sup> Aye waambile mba, “Olo? Ko kwafumine Kyambo kya Lesu kwi . . .” Ingi telekaitu ku Kikye. Mulongo, bamwingilo bakonsha kuuba byepi byobyo? veleeshi 36.

*Olo? ko kwafumine kyambo kya Lesu kwi anweba nyi? nangwa mba aishijiletu anweba yeka nyi?*

*Inge muntu wilanguluka mwine amba ye ngauzhi, nangwa mba ye wa bumupashi (kechi mba kanatu waikala ngauzhi ne; nangwatu muntu uji na ndangulukilo-ya bumupashi), wafwainwa kuyuka mba bintu byo Mbena kwimunembela yo mikambizho ya Nkambo. (Mwaitaba kyokyo nyi?)*

*Bino umwe aye, inge umu wamweka nobe uji nabulubi, nanchi mulekaitu ekale mubulubi.*

<sup>156</sup> Pano, akyo kyaikalatu kyaoloka bulongo monka mo Nayukila kwikibikila. Mwamona? Aye waambile mba, “Inge muntu ye wa muntu bumupashi, nangwa mba ye ngauzhi, wafwainwa kuyuka mba byo Mbena kwimunembela yo mikambizho ya Nkambo.” Bino amba, “Inge aye—inge aye usakwikalatu na bulubi, mulekaitu ekale na bulubi.” Mwamona? Kyo kyonkatu kyo wafwainwa kuuba. Inge bakeba kutwajijila kuya nakyo, balekaitu bayenga, mambo wikimwene byo kyatatwile kokwa.

<sup>157</sup> Kabiji mwanamukazhi umu mukote wambujile mba, amba, “Oo, Paulo wajingatu nabushikwe-bwabanabakazhi bwakala.”

158 Aye kechi wajinga na bushikwe-bwabanabakazhi ne. Mwayukatu, Paulo wajinga mutumwa, kabiji wa ku Kipwilo kya Bangetila. Talai kuno. Bushe mwamuyuka Paulo . . . Baanga baketekela mu byasapwijilenga Paulo? Abyo ibyo aye—aye byo aambile papo? Kabiji Paulo waambile mba . . .

159 Mwaamba mba, “Kyawama, pembelako kamineti kamo, Mulongo Branham. Mineti umotu! Bino, bishopu wetu waamba mba bijitu bulongo. Aye mukulumpe wa pa bonse, wa ba Assemblies, waamba mba byonse bijitu bulongo. Aye bishopu wa ba Oneness waamba mba byonse bijitu bulongo.”

160 Amiwa kechi natako muchima ku byobamba ne. Ke byabubela! Kabiji Nanji kwi mubuala mba tusa kukonkomesha bingi bibye. Kabiji bangauzhi babubela bakonsha kwamba byonkabyo. Mambo Baibolo waamba mba, “Inge muntu wilanguluka aye mwine mba ne wa bumupashi, nangwa ngauzhi, mulekai ayuke mba byo Naamba yo Mikambizho ya Nkambo.” Kabiji umvwe mupashi wanji wabula kunshimuna na kyokya Kyambo, aye ke ngauzhi wabubela, kya kutatwilapotu. Kyangwamina kwikala wabushikwe-bwabanabakazhi kukila kwikala wakutemwa-banabakazhi, kuuba byobya bintu, kwikala na byobyo bintu mu Kipwilo kya Lesa, byapusanako na byatongolwa byakwa Lesa. Kabiji Paulo waambile mba . . . Monai Galatiya 1:8. Paulo waambile mba, “Inge malaika wafuma Mwiulu kabiji wasapwila mambo awama angi apusanako na oa o Nasapwijile kwi anweba, ekale wafingwa mafingo.” Pano musa kuuba byepi pa Kyokyo?

161 Pano mwaamba mba, “Pano ngapokyaambiwa mba, ‘Baana benu babalume ne babakazhi bakaula,’ mu Yowela, kabiji—kabiji pa ambwile Petelo pa Juba ja Pentekositi?” Abyo kine ibyo.

162 Bushe mwayuka mba, mu Lulayang’ano Lwakala, amba jishindatu jimo, kabiji jo jonka jishinda kino kimye, muntu jo akonsha kwishilamo mululayang’ano, ke kupichila, mu . . . Abulahama iye ko bapaine mulaye, kabiji aka—aka katetesho ka mulaye kajinga ka kutwalwa ku mukanda. Baanga bayuka kyokyo? Awa wajinga Lesa wanshinikishenga.

163 Nobe mulongo wa ku Baptist, aye waambile mba, “Mulongo Branham, kika, atweba ba Baptist twatambula Mupashi Wazhila.”

Naambile mba, “Kimye ka kyo Mwamutambwile?”

Waambile mba, “Kimye kyo twaitabijile.”

164 Naambile mba, “Paulo waambile mba, ‘Mwatambwile Mupashi Wazhila kufuma po mwaitabijile nyi?’” Mwamona? Naambile mba, “Pano, anweba ba Baptist iyai mu mutambulepo byo Mukyokyo, kabiji twakonsha kwisamba ne anweba pa bukikizhi bwa Peenape.” Naambile mba, “Bino, kyawama, kwepi ko mwakonsha ku Mutambula muyeo musango?” Mwamona?



165 Aye waambile mba, “Mwamutambwile Aye *kufuma* po mwaitabijile nyi?” Bajinga baitabila, kabiji babijikilenga ne lusekelo ne bintu byonse byashala. Abo kechi ba kimutambwile Mupashi Wazhila ne. Paulo waambile mba kechi bajinga nanji ne. Mwamona? “Mwatambwile Mupashi Wazhila kufuma po mwaitabijile nyi?”

Abo baambile mba, “Atweba kechi twayuka ne kana Mupashi Wazhila wapanwa nyi.”

Waambile mba, “Nanchi mwabatizhilwe byepi?”

166 Abo baambile mba, “Atweba twabatizhiwa.” Bino, mu buubela, mwamona. Nanchi babatizhilwe, ne jikwabo. Kijitu bulongo.

167 Pano monai kikye, aabo banabakazhi basapwishi, byo batwelelemo, balangulukile mba basakwikala na nsambu yabo. Bino kine kechi kyaswishiwa kwi Lesa kuuba kyokyo ne. Kabiji lekai . . . ponka potukiji na yuwe mutwe papo, abo banabakazhi, monai. Kabiji kiji, pano, aye waambile mba, “Inge muji muntu mukachi kenu, ao wa bumupashi, nangwa ngauzhi, mulekai ayuke mba byo Mbeni kwi munembela yo Mikambizho yakwa Nkambo. Pakuuba inge uji mu bulubi, mulekai ekale mu bulubi.” Kabiji ao oene mambo . . . uno tabbanako kechi wimana ne kupesha banabakazhi basapwishi, bakwashi banabakazhi, nangwatu kintu kiji kyonse kya mwanamukazhi kiji nobe ofweshi wa kipwilo ne, ke mambo akuuba mba akye Kinembelo kyaikala papo kabiji kijitu patoka.

168 Pano, Baibolo waambile mba, “Baana benu babalume ne babakazhi bakaula.” Pano, kyambo kya *kwaula* kyalumbulula ka? Kikebai. Ke ku “kubuulang’ana kintu kimo, na kutundaikwa,” nangwa “kwambila jimo mwenkelo ya kintu.” Ke kyambo kijimo bintu byavula.

169 Kijitu pamo nobe *kutokesha* kalumbulula “komvwewa, kabiji ne kubikwa pa lubaji mu kwingila mwingilo.” Mwamona? Nangwa, ke kyambo kijimo bintu byavula, byalumbulula kukila pa kintu kimo, nobe byo tuji nabyo byavula mu Kizungu papo.

170 Kiji pamo, nobe byo twakonsha kyambo kya “kinje.” Kyawama, *board* kyalumbulula ka? Mwaamba mba, “Kyawama, kyalumbulula mba walipijile *board*.” “Ine, kechi waubile ne. Aye watazhizhe mukuuba mba *bored* ke jilozo.” “Ine, kechi waubile ne. Aye watazhizhe mu kuba mba *bored* wamusabile.” Nangwa, mwamona, kyambotu kimo, wafwainwa kuyuka kyo ubena kwambapo. Mwamona?

171 Kabiji abyo byo kiji na kyambo muji byambo byavula, kwepi, “Baana benu babalume ne babakazhi bakaula.” Pano, jishindatu jimo Lesa jo . . .

172 Awe Baptist waambile mba, “Kyawama, atweba twatambula Mupashi Wazhila.” Naambile namba . . . “Nanchi kimye kyo

twaitabijile.” Naambile mba...Pano, monai, aye waambile mba, “Lesu wamupele Abulahama ki...” Waambile mba, “Abulahama waitabijile Lesu.” Abyo byo e kyambile. Aye waambile mba, “Abulahama waitabijile Lesu kabiji kya mutelwe ke bololoke.” Baanga bayuka amba akyo bo bukine? Pano monai byo—byo akonsha kwikipeezha Satana ne kwikibika pa mulongo. Mwamona, kijitu kyaapela. Pano, akyo Kinembelo.

<sup>173</sup> Mulongo, Mbena kukubula, akwe peulu, wafwainwa kwikala washingwa kasa ukyangye kutwela kuno. Wafwainwa kutwela mukifulo kya buke bobu na kulomba. Bantu baamba mba, “Kika kyo ubujila kuya nakumona bantu?” Mulongo, inge ubena kuya na kwamba ku bantu nangwa kwibafunjisha, wafwainwa kwikala bunke bobu, na Lesu, mukimye kicheche, kasa ukyangye kutwela ku pulupiti. Kyakine, monai, mambo Satana wajimuka, wajimuka bingi.

<sup>174</sup> Aye waambile mba, monai, aye waambile mba, “Abulahama waitabijile Lesu, kabiji kyamutelejilwe bololoke.” Abyo ibyo. Aye waambile mba, “Pano, kika kikwabo Abulahama kyo akonsha kuuba kanatu kwitabila?”

Naambile mba, “Byo byonka byo akonsha kuuba.”

<sup>175</sup> Aye waambile mba, “Kika kikwabo kyo wakonsha kuuba nangwa muntu mukwabo kyo akonsha kuuba kanatu kwitabila?”

<sup>176</sup> Naambile mba, “Abyo byo byonka byo twakonsha kuuba. Pakuuba mona, mulongo, nanchi Lesu wapwanang’ene, nangwa watambwile lwitabilo lwa kwa Abulahama. Aye wamupele katetesho, kiyukilo kya mukanda, nobe kayukilo kalulayang’ano. Mwamona? Aye wamupele. Aye waambile mba, ‘Pano, Abulahama, ketaba lwitabilo lobu, nanchi Mbena ku kupa kiyukilo kakuba mba Nakutambula.’”

<sup>177</sup> Nanchi Aye wa musembulwile Abulahama, kabiji aka kajinga katetesho kalulayang’ano. Kabiji pano mu jino juba... Pano, mwanamukazhi kechi wajinga mulolwa lulayang’ano ne; kanatu mwanamukazhi wasongolwa. Kebakebai, kechi bakonsha kutwala kumukanda mwanamukazhi; nanchi, abo batwelelemo, pakuuba mba aye ne mulume wanji bekalu ke umu. Abo kechi baji babiji ne; baji umu. Baanga bayuka kyokyo? Kinembelo byo kyaamba. Nanchi, aye pa kwikala wasongolwa, nanchi aye—aye wikala ke umu. Kabiji yainga mumwe ne kumona mu Timoti, waambatu kintu kimo, amba, “Kechi ponkapotu ne aye ukapuluka pa kusema baana, inge watwajijila mulwitabilo ne buzihile pamo na butekanye bonse.”

<sup>178</sup> Pano, bino, nanchi, mukanda wa mu Lulayang’ano Lwakala wajinga wa kumubiji, pakuuba mu Lulayang’ano Lupya, Yoela waamba mba, “Amiwa nketulwila Mupashi Wami pa bantu bonse, kabiji baana benu babalume ne babakazhi bakaulanga.” Pano, kyambo kya *kwaula* kechi kyalumbulula

mba kufunjisha ne. Akwa *kwaula* kyalumbulula nangwa “kubulang’ana kyo wapitamo, kasa watundaikwa,” nangwa “kwambila jimo kintu akyo kibena kukebewa kubiwa.” Kabiji twayuka mba kwajinga bangauzhi babakazhi mu Lulayang’ano Lwakala. Abo kechi baambanga mu kishimikwa ne, kwamba mu kipwilo, kwapwila bantu, nobe mufunjishi ne. Bino aye, Anna, ne bavula ba mwiabo mu nzubo yazhila, bajinga bangauzhi banabakazhi, kabiji bajinga. . . Milyama wajinga ngauzhi wamakazi, nangwa kimo kyayekao musango. Wajinga na Mupashi pe aye, akyo bukine, bino wajinga na mampuzha poapelelenga. Banabakazhi bakonsha kwikala ba ngauzhi buleelo, kine; bino kechi kwikala bafunjishi, ne bikwabotu ne, kunyuma ya pulatifomu kukwe. Inge wauba, walengela—walengela Baibolo kwipachika Ayemwine. Aye Baibolo kechi wakonsha kwamba kintu kimo *papo*, kabiji kintu kikwabo *papa*. Nafwainwa kwamba kintu kimo kimye kyonse inge ne Kechi ke Kyambo kya Lesa ne. Mwamona? Nanchi, “Baana benu babalume ne babakazhi bakaulanga,” kyalumbulula mba “bakambila jimo bintu bikamweka” nagwa “kupana lushimuno.” Pano, kebai kyokyo, kabiji mwamona Baibolo ulondolola byambo mumone kana kechi byo kiji ne. “Baana benu babalume ne babakazhi bakaulanga.”

<sup>179</sup> Pano, Baibolo kabiji waamba pa mwanamukazhi wifwanyikizha, nanchi, nangwa witumbijika mwine mba. . . Akye kyakonsha kwingila kulubaji lonse na kipwilo kya Katolika, kabiji kyakonsha kwingila ne akyo na ba. . . na yuwe mutwe ye tusakwambapo pano. Twayai tuzhikule mu Buuku wa—wa Lumwekesho, ne kuya nobe ku—ku kyapitala kyabu 2 ne veleeshi wa 20, mu kimye kyo tuji pepi papo, pakuuba mba mwakonsha kutala papo kabiji ne kumona bu diabola bokiji nabo, kibena kwamba pa bikamweka mu moba akupelako, abye byo. . . awe mwanamukazhi byo akooba. Vulukai, kipwilo kya Katolika ke mwanamukazhi. Twafumatu na kwikitanga, kechi ibyo nenyi? Telekai ku kikye pano, byo Kyaamba. Lumwekesho 2:20, “Nangwa byonkabyo. . .” Aye ubena kwamba ku kikye kipwilo kya Tiyatila, monai, “Nangwa byonkabyo. . .” Akye ke kipwilo kya nkulo—ya pakachi, kupita mu Mankulo a Fishi.

Nangwa byonkabyo *Njina bintu bimo bicheche byatama byo nataana mwi obewa, mambo waleka awa mwanamukazhi Yezabeli, ao witela aye mwine mba ngauzhi, kabiji ufunjisha ne. . . kongola bakalume bami ne kuuba bulalelale, ne kuja bintu byo batapisha ku bankishi.* (Mwamona?)

<sup>180</sup> Pano, inge mwakonsha kumona, monai ao mankulo a bipwilo, popo tusakupezhoo. Bino mu lukeelo kelo tukatolepo abye bintu bikwabo. Talai. Mu. . . Mwaila abya—abya bitulwapo malampi bya golonde bya mu tabbanako waki Yudeya, amwa mukachi, mwajinga shinkwa wazhila ne bikwabotu, mwajinga

bitulwapo malampi bya golonde bitanu na bibiji. Anweba bonse mwayuka kyokyo. Mwamona? Kuji mankulo abipwilo bitanu na bibiji. Akyo kibena kwamba pa mankulo abipwilo bitanu na bibiji, ke kyeya. Pano inge mwakonsha kumona mu Lumwekesho 1, twatana Yesu kasa aimana mukachi ka mankulo abipwilo bitanu na bibiji, abya bitulwapo malampi bya golonde bitanu na bibiji, byo aalulukile wamwene Umo nobe Mwaana muntu, kasa aimana, wamvwala kivwalo byonka byo kyajinga. Kyajinga Musongwa waimana mu bitulwapo malampi, byalengwa.

<sup>181</sup> Pano, Lulayang'ano Lwakala, abo batolanga awa... awe lampi umo, ne kumwambula, batola awa lampi mukwabo ne kumwambula kuyewa, waambula yewa mukwabo, umo waambula mukwabo, byonkabyatu, poso baambula byonse bitulwapo malampi bitanu na bibiji.

<sup>182</sup> Inge mwakonsha kumona, pa ntendekelo, Lesa byo atatwile kwingila na Bayudeya, kabiji bapichile mu nkulo ya golonde. Kabiji kepo ke nkulo yakila fishi ya kwingila na ba Yudeya, Lesa yo ajinga nayo na Muyudeya, kyajinga kimye kya bufumu bwakwa Ahaba. Kabiji inge mwakonsha kumona, pa kutanga aa mankulo abipwilo kokwa, Aye wabwelako jibiji. Aye waambile mba, pano, "Bintutu bicheche kunyuma," kabiji waambile mba... Pano, monkamwa mu Nkulo ya Fishi, myaka fiftiini aduleendi kokwa, nangwa pa kimye kya kwa Ahaba, patanshi, kabiji ne Bayudeya. Aya nkulo yakila fishi yo bajinga nayo, kimye Ahaba kyo a songwele Yezebeli kabiji waletetele kupopwela bakishi mu Isalela, kabiji walengejile bantu bonse kulondela bupopweshi bwakwa Ahaba... kulondela lesa wakwa Yezebeli. Vulukai, batolele, babikile binchi, kabiji bakundawile byakusokelapo bitapisho bya kwa Lesa. Kabiji Elisha wajijile, amba "ujitu buke bwaji," kabiji Lesa wajinga na sebeni aduleendi babujile kufukamapo manungo abo kwi Balaamu ne. Mwavuluka kyokyo nyi? Akya kyo kyokya kipasha kya kyokya Kipwilo kyasalululwa kibena kwiya. Mwamona popo? Mwamona byo kiji nyi?

<sup>183</sup> Pano, mu kikye kipwilo, inge mwakonsha kumona kipwilo kitanshi, kipwilo kitanshi, kipwilo kya Efisesa, kyajinga kipwilo kyakila. Aye waamba mba, "Uji na kyeya, nangwa byonkabyo." Kabiji umvwe mwamona, kila kipwilo, kyatatwile kyeya kukepana, kukepana, kukepana, poso byo kyafikile ku Tiyatila. Nanchi, aya myaka fiftiini aduleendi. Apo Aye po aishile kulupikila kulubaji lukwabo, "Kabiji mujitu na kyeya kicheche. Koseshai kyokya kyashalapo, kuchina mba kitulwapo malampi kyenu kya kafumishiwapo." Kabiji kyaishile kufika ne ku nkulo ya kipwilo kya Filadelifya, kabiji popo kyafikile ne ku nkulo ya kipwilo kya Laodikea.

<sup>184</sup> Pano, pano popaji buwame. Oo, ami! Amiwa natemwa kikye, Mulongo Smith. Monai, talai pa kikye. Pano, mu *iye* nkulo ya kipwilo, nobe byonka byo twapichilemo... Pano talai kikye. Aya

nkulo itanshi ya kipwilo yajinga ya Efisesa, nkulo ya kipwilo kya Efisesa. Pano, kila kimo kya yoya nkulo ya kipwilo, poso byo kyafikile ku iye myaka fiftiini aduleendi, inge mwakonsha kumona . . . Kitangai byo musa kuya kunzubo bufuku buno, inge mwaikala na kimye, nangwa lukeelo kelo, kasa mukyangye kwia ku kipwilo, pa kyabu 1, kyabu 2, kabiji ne kyabu 3 kyapitala kya Lumwekesho. Musa kutaana mba, kila imo ya aa mankulo a bipwilo, Aye wambile mba, “Uji na bulume bucheche, kabiji bino kechi wakana Jizhina Jami ne,” poso Wafika ku iye myaka fiftiini aduleendi ya Tiyatila, aya Nkulo ya Fishi. Ipo po Alupukilemo kulubaji lukwabo, ne kwaamba mba:

. . .munji na *jizhina mba* mwi bomi, bino kasa *mwafwa*.

<sup>185</sup> Kabiji abye, kafwamo mu bibye bipwilo bikwabo, abya nangwa nkulo ya kipwilo kya Filadelifya, kechi bejitolele jibiji aja Jizhina ne. Kechi bejitolele aja Jizhina ne, mambo ja lupukilemo mu kyokya kimye. Pano, oo, twakonsha kwikajika kyokyo pa boba banji na mafunjisho a bubela, monka mu kikye, kwi mumwesa amba ye inabo, kipwilo kya Katolika, inanja byonse bye, byo anji “inaja, kyafyamika, Babilona.” Kabiji akyo, talai, aye nkulo ya kipwilo kukwe byo yalupukilemo, yajinga na kyeya kicheche, pano popo kyatatwile kuyanga na kuzhima, kuzhima, kabiji papo kyaishile kwikala mu bukabungwe kubwela kukwe, aye myaka fiftiini aduleendi. Kabiji kyalupukilemo pano, kechi nobe ke Kipwilo kya Nkambo Yesu Kilishitu ne, bino nobe kipwilo kya Katolika. Nanchi Luther wafuminemo byepi? Nobe kipwilo kya Benaluther. Nanchi ba Baptist bafuminemo byepi? Nobe kipwilo kya Baptist. Kechi Jizhina Janji ne, kechi Jizhina Janji ne; jizhina jikwabo, “uji na jizhina.” “Mambo kechi kujipo jizhina jikwabo jo bapaana mushi ya Mwiulu ja kupulukilamo bantu ne, kanatu Jizhina ja Yesu Kilishitu.” “Uji na jizhina amba uji na bumi, bino kasa wafwa,” abyo byo kiji na dinominesheni.

<sup>186</sup> “Oo, Amiwa ne Presbyterian,” kabiji wafwa! “Oo, Amiwa ne Baptist,” kabiji wafwa! Ujitu na bumi kanatu waikala nabo bumi mwi Kilishitu Yesu. Abyo ibyo. Lwenu lubatizhilo lwa bubela, meema, lubatizhilo lwa bubela; kusansa, kwichila, mukifulo kya kwibizha; kwingijisha “Taata, Mwaana, ne Mupashi Wazhila,” mu kifulo kya Jizhina ja Nkambo Yesu Kilishitu. Byonse byo bintu bya bubela byaiya kufika, Baibolo ubena kwamba, nobe kwichilamo kyakosa bingi monka mo kyafwainwa kubilwa. Kabiji kuno twibiswisha kuya nabyo, “Kyawama, kipwilo kyami Kibitabila *myuwe* musango.” Bino Baibolo waamba mba *Bibye*. Mwamona? Kafwako bintu bya musango yeo ne. Kechi kujipo kintu kya musango yeo ne.

<sup>187</sup> Kabiji kechi kujipo mpuzha mu Baibolo po balupwile lujimi wabo ne kuja Yukalisiti wazhila ne, kabiji pulisiti watoma waini ne kumutela mba Mupashi Wazhila. Kafwako mu Baibolo

ko be imwine maboko ne kwipa kuboko kwa kilujo kwa lumvwang'ano, kabiji mwi kitela mba Mupashi Wazhila ne. Kafwako nangwa umo waimene ne kwaamba mba, "Pano ne Waitabila," kabiji natambula Mupashi Wazhila ne. Inge kyaubiwe, amuno mo mujishinda Byubilo 2 mo afwayijilwe kutangilwa, "Kabiji Juba ja Pentekositi byo jafikile, monka mu mukwakwa kwaishile pulisiti mwina Loma, kabiji ne teneshi yanji yaalulukile. Aye waiya, waamba mba, 'Anweba bonse lupulai lujimi wenu kabiji mutambule Yukalisiti wazhila, kijilo kitanshi.'" Bushe amo kechi mo mujishinda ja kutangilamo Byubilo 2?

<sup>188</sup> Kyawama, anweba ba Polotesitati mujitu pamo kutama. Bwelai kokwa ne kwamba mba, "Pano tusa kwenda kuya kwi anweba ba Methodist; babikai ku kuboko kwa kilujo, nangwa, bapai kuboko kwa kilujo kwa lumvwang'ano, kabiji babikwe pa kwesekwa bang'ondo sikisi." Kwepi ko mutanga kyokyo mu Byubilo 2? Mwamona? Kwepi ko mutaana kyokyo? Mwamona?

<sup>189</sup> Kyaamba mba, "Kimye kyo bajinga mukifulo kimo bonse, na muchima umo!" Kechi kwaishilepo bishopu na kuba *kikye*, ine kabiji kechi paishilepo pulisiti na kuba *kikye*. "Pakuuba kwaishile kilulumo kufuma Mwiulu nobe kupupa kwa lubesha mukatampe, kabiji Wayuzhizhe nzubo yonse mo baikele." Ajo jo jishinda mo be Kitambwijile, ee, mwane, nobe kupupa kwa lubesha mukatampe kufuma mu Lukumo. Kechi mu mukwakwa nangwa kufuma ku dinominesheni imo.

...muji na *jizhina amba* mwi bomi, bino kasa *mwafwa*.

<sup>190</sup> Mwamona, mafunjisho enu akipwilo ne ma dinominesheni akanya Lesa muyewa musango, poso amba, "Twaketekela *kikye*, kabiji twaketekela mba moba a bya kukumya apita." Ke ngauzhi wabubela wamba byo byo. Ke ngauzhi wabubela wiimubula, amba, "Mwakonsha kwiimuna mu maboko ne kutambula Mupashi Wazhila." Ke ngauzhi wabubela wiimubula mba, "Mwatambwile Mupashi Wazhila kimye kyo mwaitabijile." Ke ngauzhi wabubela wiimubula mba, "Mwafwainwa kwichila ne kusansa mukifulo kya kubatizha." Ke ngauzhi wabubela wiimubula mba "batizhiwai mu jizhina ja Taata, Mwaana, ne Mupashi Wazhila," bino kasa kwabula Kinembelo kya kyokyo mu Baibolo. Abyo ibyo. Kechi kujipo Kinembelo mu Baibolo ki mubuula kubatizhiwa, amo muntu uji yense mo abatizhiwe, kanatu mu Jizhina ja Yesu Kilishitu. Kanatu, banababwanga bakwa Yoano; kabiji ne abo baishile, kubatizhiwa jibiji, mu Jizhina ja Nkambo Yesu Kilishitu, pakuuba mba utambule Mupashi Wazhila. Abyo ibyo. Pano, alo kechi ke lufunjisho lwa Yesu Yenkatu ne. Nayuka lufunjisho lwa Yesu Yenkatu. Abyo kechi ibyo ne. Alo ke Lufunjishotu lwa mu Baibolo. Abyo ibyo.

<sup>191</sup> Bino abyo byo byo kiji. Mwakonsha kuba nakyo byepi? Ao ye inenu. Ao ye inenu wa oa mafunjisho a kipwilo.

<sup>192</sup> Pano, talai kunyuma mu Baibolo kabiji mu mbule kana kujipo muntu umo ye basashile. Methodist, Presbyterian, Katolika, mbulai kwepi muntu umo ko bamusashile, mu Baibolo. Mbulai kwepi umo ko bamwitulwijile meema, mu Baibolo, mu lulekelo lwa mambo. Tongolaiko. Mwakonsha kwi kutaana nyi? Inge mwakonsha, iyai kwi amiwa, kabiji Amiwa nkenda muyuwe mukwakwa na kiyukilo pa nyuma yami, ne kwaamba mba, “Ngauzhi wabubela! Naile mungi.” Nangwa, umvwe mwataana pantu pamo mu Baibolo yense ako muntu ko abatizhiwe mu jizhina ja Taata, Mwaana, ne Mupashi Wazhila, jishinda eite pasenti ba mwi anweba jo mwabatizhilwemo. Mwenaike Kinembelo kimo ako muntu uji yense ko abatizhilwe mu jojo jishinda, kabiji Amiwa kabika kiyukilo pa nyuma yami mba, “ngauzhi wabubela,” ne kwenda mukwakwa nakyo *bibye*. Kabiji mweshaike ako muntu uji yense ko abatizhilwe, mu Kipwilo kya katataka, ao wabujile kwiya ne kubatizhiwa jibiji, mu. . . kechi mu jizhina ja “Yesu” yenkatu ne, kana mu Jizhina ja Nkambo Yesu Kilishitu. Abyo ibyo. Monai inge abyo kechi ibyo ne.

<sup>193</sup> Kabiji, papo, kyo kika? Aye wajinga inanja ba pite. Kika kya mulengela kwikala ke pite? Kika kya mulengela kwikala pite mukatampe? Mafunjisho anji! Kika kya mulengela kwikala pite? Mafunjisho anji!

<sup>194</sup> Kabiji ao oene mambo o tubujila kuswishang’ana na madinominesheni abo kabiji ne mafunjisho abubela. Twikala batokeshiwa na yuwe Baibolo. Amiwa kechi nayuka bulongo mo Mwikikela ne, bino mufunjishiwa Ye, nangwa byonka byo. Ibyo. Akyo kiji kwi obewa. Amiwa kuuba na kulengela obewa Kumwikala ne. Nakonshatu kwimubula anweba bya Bukine. Ao oene mambo kyo twabujila kwikala dinominesheni. Amiwa kechi—kechi twakonsha kwizhilulula atweba bene ne kutwela mu bintu bya yeo musango, ne kwikela ku biji nobe mafunjisho abubela. Kyangwamina kusala jishinda ja bacheche basulwa ba kwa Nkambo. Amiwa kyangwamina kwikala watokeshiwa kabiji wabula biko ku Kyambo ne kwi Lesa, ne kwimana popa ne kwamba mba, “Kechi jipo na mashi a muntu ku bya kuvwala byami ne.” Oene mambo kyo twaikela pa Branham Tabernacle. Oene mambo kyo twabujila kwikala ba Assemblies. Oene mambo kyo twabujila kwikala ba Oneness. Oene mambo kyo twabujila kwikala ba Yesu Yenkatu. Oene mambo kyo twabujila kwikala ba Methodist. Oene mambo kyo twabujila kwikala ba Baptist. Ke ka—ka tabbanako kachechetu kuno. Atweba kechi tujipo na dinominesheni nangwa pacheche ne. Twi bakasuluka, mwi Kilishitu. Oene mambo kyo twikela byo twikala. Kabiji Lesa ubena kwitupesha, Lesa ubena kwitukwasha.

<sup>195</sup> Pano, twakonsha kwimubula kyo tujila kijilo, twiimubula kika kyo twi omvwela-kumaulu, kika kyo tubujila kuleka bamembala kutolako lubaji inge twayuka mba baji mu bubi. Oene mambo, aye milungu yapelako ibiji nangwa isatu,

Nabaendenga kufuma ku umo membala ne kuya ku mukwabo, ako ko mwajinga na byakupusana byenu bicheche, ne apo. Kuya na kuzhokoloka, umo kechi wakonsha kwamba ku mukwabo ne, kabiji kwipitatu pa mukwakwa kasa watezha mutwe kungi. Kimulenge bumvu, anweba mwatoma katomeno kapeshiwa ka kwa Lesa kukilang'anya kikye, kitapisho kuno, kabiji kasa twimutela mba mwi balongo ne banyenga, ne kuya pa telefoni kabiji ne kwiambila umo ne mukwabo. Obewa kechi wafikilamo kutelwa mba wi Mwinakilishitu kasa uji muyeoy musango ne. Ibyo. Mwafwainwa kutulapo ma telefoni; inge kechi wakonsha kwamba byawama pa muntu umo ne, kechi wakonsha kwamba nangwa pachechetu ne. Vulukai, Lesa ukemuzhachisha. Kikulutu awa musango wa mupashi uji mwi obewa, yuka mba kechi uji bulongo na Lesa ne. Inge kechi wakonsha kumvwa . . .

<sup>196</sup> Inge muntu uji mu kilubo, yanga kwi aye ne kupwang'ana. Inge kechi mwakonsha kupwang'ana ne, sendapo muntu umo ne kuya nanji. Oene mambo Lesa kechi wakonsha kujimuna Kipwilo Kyanji ne, mambo kechi mubena kwikyuba bulongo ne. Mukifulo kya kutola foni ne kwisamba pa kikye, kika kyamweka, ke tubungwe kabiji ne bintutu bikwabo, bya yewa musango. Mukifulo kyakuba kyokyo, kika kyo mubujila kuba byaamba Baibolo? Inge mulongo akubale mambo, yanga koanji umone kana wakonsha kupwang'ana nanji. "Kyawama, bino, ye wangubile!" Amiwa kechi natako muchima ku byo aubile ne, yanga kwi aye nangwa byonkabyo! Kechi kyaambiwa mba aye eye kwi obewa ne. Obewa yanga kwi aye inge aye uji mu kilubo. Mwaamba mba, "Kyawama, aye wajinga mu kilubo. Ye wafwainwa kwiya kwi amiwa." Abyo kechi byo byaamba Baibolo ne. Aye Baibolo waamba mba obewa kuya kwi aye. Inge uji mukilubo, obewa yanga koanji.

<sup>197</sup> Kabiji inge wabula ku kuumvwa obewa, nanchi sendelapo umo, ekale kamonyi.

<sup>198</sup> Kabiji inge wabula kumona awa kamonyi, nanchi ambai mba, "Pano Amiwa nsakusenda bakafunga bobo." Nanchi mubuulai, mba, "Mbena kuya na kubuula kipwilo, kabiji mu moba sate kufuma pa jaleelo, inge anweba balongo kechi mwinengezha ku kyokyo ne. . . Awe mulongo winengezha kupwang'ana. Kechi usa kwikyuba ne. Kabiji umvwe kechi wakonsha kuwamisha kikye pa moba sate ne, nanchi kika kisa kumweka? Obewa nishi kechi wiiumo wa mwi atweba ne."

<sup>199</sup> Aye Baibolo waamba mba, "Inge wakakalwa kumvwa ku kipwilo, nanchi mulekai ekale kwi anweba nobe mutushi ne musokeshi." Mwamona, inge awa mulongo uji mubukikizhi bwa kipwilo, Mashi akwa Kilishitu abena kumulama. Oene mambo o tubujila kulekela kipwilo kutwajijila kuuba mo kyubila. Pano, ibyo, *Alwe* lo Lufunjisho lwa ba Bap- . . . lwa kipwilo kya ba Baptist, nangwa lwa kuno ku Branham Tabernacle, inge mwakonsha kwi luuba. Mwamona, kika kyakubujila . . .



200 Mwataana muno, kape, nobe kya kumwenako, banabalume babiji, nobe Leo ne Amiwa. Wakonsha nkuswa ami. . . Kabiji Naamba mba, “Kyawama, aye—aye wandengele mambo.” Akyo kechi kijipo na lupusano ne. Amiwa nafwainwa kuya kooka kwi aye. Kyawama, aye ye membela wa kino kipwilo. Aye—aye waikala ke Mwinakilishitu. Aye watolako lubaji ku kijilo pamo ne amiwa. Kabiji twabatizhiwa mu Jizhina ja Nkambo Yesu. Twaendela pamo, nobe balongo, umo na mukwabo, nanchi kintu kimo kyamweka.

201 Kechi ke muntu ne. Naite paseti wa bimye ke diabola wiiya pakachi ka bantu. Kechi ke bantu ne. Ke diabola. Kabiji kikulu mu mwaleka diabola kasa oba kyamusango yeo, ubena kukozha mulongo obe. Abyo ibyo.

202 Kyawama, kintu kimo kechi kiji bulongo ne pakachi kakwa Leo ne Ami; twayai twamishepo. Kabiji inge wamona mba pajipo kintu kimo, ye wwingilo obe wa kwiya kwi atweba, ne kwaamba mba, “Anweba bonse basongwalume iyai kuno mubwele pamo. Atweba tusa kuwamishapo pa kiky kintu.” Pano, nanchi, inge waiya koko, kabiji koko mwataana kuuba mba, nanchi, byobyo kiji. Naamba mba, “Kyawama, kintu kitanshi, inge twa—twabula kuswang’ana, nanchi mwaiya ku kipwilo mu yekawa musango.”

203 Kabiji pano anweba—anweba umvwe mwabula kwingijilapo pa kiky, nangwa byonkabyo, Mashi a Yesu Kilishitu a kikizha atweba bonse. Mwamona? Nanchi pano awa—awa kipwelonda wakala ukatatula kipwelonda kikwabo, kabiji awa kipwelonda ukatatula kipwelonda mukwabo, kabiji byonse bikekala ke byakolwa, ne jikwabo, kipwilo kyonse. Nanchi kifika pa kimye kyakuuba mba umvwe mwatwela mu kipwilo, mujitu munyango, kanatu utangijila mitanchi waiya wafumyapo mabebe a mashika, jibumba kasa jikyangye kutwelamo ne. Pano, mwayuka mba abyo ibyo. Kabiji mwauba munyango! Muntu umo waikala pepi, mwayukatu, kabiji kwambapo nangwa kimo ne. “Kyawama, twajinga ba bumupashi bingi.” Kyawama, kika kyamwekele? Mwaandelenga bulongo, pano nga lukatazho looluka? Mwamona, bubi bwenu bwiimwabanya. Kabiji Lesa ukemuzhachisha pa kiky, balongo. Pano Nsakololapo pa kiky.

204 Kafwapo kyatama ne amiwa, kafwapo kyatama ne Leo; ke diabola watwela pakachi ketu. Abyo ibyo. Aky kintu kyololai bulongo. Yanga kwi aye. Nanchi inge wabula kuteleka, nangwa Amiwa nabula kumvwa, monse mo kyaikela, nanchi bulai kipwilo. Inge wabula kwiya na kupwang’ana ku kipwilo mu moba sate, nishi wafumyapo pa bukinkizhi bwa Yesu. Atweba tumukasulula. Abyo kine ibyo. Pano monai kika kyakonsha kumweka. Pano lekai Lesa amufunde. Anweba mwafumyapo maboko enu. Anweba mwauba kyawama kyo mwafwainwa kuuba. Pano lekai Lesa ekale nanji pa kimye kicheche; Aye

ukamupaana kwi diabola. Aye ukeya pano. Inge wabula, bumi bwanji bwaipipatu.

<sup>205</sup> Mwavuluka mu Baibolo, kwajinga mulongo umo wabujile kwikala bulongo na Lesa? Baanga bavuluka ao mambo? Aye walengele mambo na muka shanji, kabiji kechi bakonsheshe kumolola ne. Paulo waambile mba, “Mupanai kwi diabola, pakuuba mba onaike.” Mwataana, mu Kolinda wa Kibiji, waolwele bintu.

<sup>206</sup> Njina mulongo, mulunda wawama, Natemwa kutela jizhina janji kuno, mulongo musapwishi. Kabiji awe mulongo musapwishi, jizhina janji ke Mulongo Rasmussen. Bavula anweba ba mwingilo mwaikala muno, bufuku buno, jizhina janji jiji pa bipepala byenu. Ke yoya yabula-dinominesheni kufuma mu Chicago. Kabiji talai. Aye wajinga na songwalume, wamingilo, kabiji waile na kusongola songwakazhi wa ku Katolika, kabiji watatwile muyekawa musango. Kabiji baubile *kikye*, *kyokya*, ne *kikwabo*, kabiji—kabiji byonse; watwelele mu lukatazho. Kabiji bashanji baile koaji, amba, “Pano, mwanami, bushe usa kubwela upwang’ane nyi?”

Waambile mba, “Taata . . .”

Watelele kipwilo kyabo amba ke jibumba ja booba-kyongo kyazhila, ba shanji. Aye waambile mba, “Pano, mona, usa kolola kyokya kintu na kino kipwilo nyi?”

<sup>207</sup> Aye waambile mba, “Pano, taata, mwi ba taata, kabiji kechi Mbena kukeba kwikala mulukatazho ne obewa ne.” Kijitu bulongo.

<sup>208</sup> Aye waile na kusendapo umo kwasho kabiji waile ku nzubo yanji. Waambile—waambile mba, “Wesley, Nakeba kwisamba nobe.” Waambile mba, “Obewa usa kolola kikye kintu na kipwilo nyi?” Kabiji wamupele mikumbu-ibiji ya ipipa byonkabya. Waambile mba, “Vuluka, Wesley, Amiwa yami kafunga wa kyokya kipwilo. Amiwa ne shobe, bino Amiwa nsakuuba byaamba Lesa mba uba. Mbena kukupa moba sate akolola kyokya na kipwilo, nangwa ne tusakukuchibako ku lumvwang’ano lwa Kyeenyi kya Lesa. Obewa wimwanami; awa ke Mupulushi wami.” Waambile mba, “Nakutemwa. Kabiji ne obewa wayuka mba Nakutemwa, Wesley. Nakonsha kufwila pe obewa. Bino wafwainwa kwikala bulongo na Kyambo kya Lesa. Mwamona?” Aye waambile mba, “Amiwa ne kafunga. Amiwa ne kafunga wa joja jitanga. Inge wimwanami, nangwa yobe ng’anyi, wafwainwa kwikala mu ndonda na Kyambo kya Lesa. Inge wabula kwikyuba, nishi Amiwa kechi nafikilamo kwikala kafunga Wanji ne.”

<sup>209</sup> Mulunda, awa ye kafunga. Awa ye mwanamulume. Kechi mwalanguluka byobyoby nenyi? Awa ye mwanamulume. Waambijile mwananji byobyoby. “Ne kumukozha,” byo aambile. Bino waambile mba, “Kika? Ng’anyi ye usa kukoza, muntu

nyi, nangwa kukozha Mupulushi obe? Nanchi,” aye waambile mba, “nanchi watwajijiletu.” Kabiji waambile mba, “Aye kuuba wikyuba ne. Kabiji atweba . . . Nabujile kipwilo.”

<sup>210</sup> Aye waambile mba, “Mwanami wamulume, Wesley, aye waakana nkung’umvwa, mu ao mambo. Aye waakana kumvwa bakwasho. Kabiji obewa yobe kamonyi wa kikye, Mulongo *Kananga-ne-Kananga?*”

“Ee, Amiwa.”

“Kijitu bulongo. Pa eiti koloko, Mulungu wiya, milungu foolo kufuma pano, inge kechi wikyuba bulongo na kino kipwilo ne, tukapana Wesley, mwanami, mu maboko akwa diabola, pakuuba mba mubiji wanji onaike. Mashi Anji, aa Mashi a . . . kwa Yesu Kilishitu, kabiji akye kipwilo, kechi kikatwajijila na kupaana bukikizhi ne.”

<sup>211</sup> Kabiji abwa bufuku bwafikile. Waimene pa pulupiti, ne kwaamba mba, “Kwashalatu mamineti abiji.” Kimye kyafikile. Aye waambile mba, “Pano, nobe mwanami, Wesley Rasmussen . . . waambile ku kino kipwilo, kwi kuweba, Lesa Wabulume bonse: Twauba byonse byo twakonsha kuuba, mwaila Byambo Byenu kabiji ne mikambizho ya Wenu—Wenu Mwaana, Mupulushi wetu, yo etushiila. Atweba pano, Napaana mwanami, kabiji ne kino kipwilo pamo ne amiwa, kupanwa ku kona- . . . kwi diabola, pakuuba mba mubiji wanji onaike, amba mweo wanji akapuluke.” Abyo byo byonka byaambiwe. Kafwako kyaubiwe ne, pa mulungu umo nangwa ibiji, kape pa ng’ondo umo nangwa babiji.

<sup>212</sup> Bufuku bumo, Wesley wakala wakolelwe. Kabiji byo akolelwe, misongo yatwajijiletu na kubaya. Aye waichile ba dokotala. Awa dokotala waishile na kumupima. Aye wajinga na mashika akufika ku aduleendi ne faivi. Aye wakakelwe kutaana ene mambo kyalengela. Misongo yatwajijiletu na kubailako. Dokotala waambile mba, “Mulunda, kechi Nayuka kyamweka kwi obewa ne.” Aye kechi wayukile byakuuba ne. Waambile mba, “Kyawama tusa kwita nsendwe.” Baichile nsendwe, kabiji ne nsendwe waishile konkakwa. Bamutwajile ku kipatala, bamupimine, byonsetu. Kabiji waambile mba, “Amiwa kechi nakonsha kwi mubuula ne. Awa songwalume wa—wa mwekelengatu lufu lufu.” Mukazhi wanji kasa aimana ponka, na kujila, bintu byonse byonkabyatu. Kabiji ne baana kasa baimana kuzhokoloka mwanya kabiji ne bintu byonse byonkabya tu. Aye waambile mba, “Ubena kuya. Abyo byo byonka.” Waambile mba, “Kwenda kwa mashi mu mishipeshipe ne mpemeno, ibena kuyatu panshi kimye kyonse.”

<sup>213</sup> Aye waambile mba, “Itai bataata.” Oo, ee. Ajo jo jishinda ja kwikyubilamo. Abyo byokiji. “Itai bataata.” Kabiji bashanji banyemejileko ku kipatala, bukiji bukiji, na kumumona. Aye waambile mba, “Taata, kechi Nakonsha pano ne, bino

Lesa ubena kumvwa byambo byami. Amiwa nsakunengezha bintu byonse. Nsakolola bintu bulongo. Ee, Nsa kuuba.” Ee, mwane, mulongo. Ponkapotu mpemeno yanji yatatwile kubwela mubulongo.

<sup>214</sup> Kabiji Mulungu walondejilepo, waimene ku kipwilo. Aye waambile mba, “Nalenga mambo ku meso akwa Lesa, ku meso a kino kipwilo. Nakaine kumvwa byambo byakwa kafunga. Na—Nakaine kumvwa bakwasho kuno.” Kabiji waambile mba, “Mbena kulomba kino kipwilo ku ndekelako mambo pa bubi bo Nauba muyuwe musango.” Waambile mba, “Lesa wapulusha mweo wami.” Ne mubuula, waikela mundonda. Ee. Abyo byo mwafwainwa kuba, mwamona. Mwamona? Anweba, inge mwakonsha kwi kyuuba mujishinda ja kwa Lesa! Mwamona?

<sup>215</sup> Pano, monai, jishinda jo tubilamo, tuji na mbung’eno ya kabungwe, kabiji twaamba mba, “Kyawama, pano, inge twalama...” Amiwa kechi naamba mba ku tabbanako ne, pakuuba Natazha kwi atweba bantu baki Polotesitati. Atweba twikala na mbung’eno ya kije, kabiji, “Pano mwalanguluka byepi pe Jones? Mwalanguluka mba twafwainwa kuuba byepi ne aye? Naketekela wakonsha kwikala membala wa Methodist wawama kukila byo anji kwi atweba.” Byobyo kiji. Akyo, ke kilubo. Oene mambo atweba kechi tulondela bisho byabo ne. Kabiji bishopu umo, twafwainwa kumwiita (byoanji-aye...ye muka, byo mu mutela? muntu wa pa kambi mu kino kipwilo kya Pentekosito? “mukulumpe wa kambi”)—mwiitai amone byubilo bya yuwe muntu.

<sup>216</sup> Aye Baibolo wiitubuula bya kuuba. Ao oene mambo kechi tukaya na madinominesheni abo ne. Atweba twikala bakasuluka ku kyokyo kintu. Amena. Kechi mwazhingijila ne, ibyo nyi? Kechi mwafwainwa kwikyuba ne. Kijitu bulongo. Amiwa keesha bufuku kape katambula mepuzho akosa awama. Bino, kyawama, abyoo ibyo. Mwamona? Vulukai. Yukai...

<sup>217</sup> Naamba kikye pano. Anweba bantu mwafuma ku bipwilo bya madinominesheni bya pusanapusana, dinominesheni yenu, kabiji, mulongo, Amiwa kechi mbena kwamba mba anweba kechi mwi Benakilishitu ne. Amiwa kechi mbena kwamba mba dinominesheni wenu kechi muji masauzande abawama Benakilishitu ne. Amiwa mbena kweseka kwamba ene mambo o twabujila kwikala dinominesheni ne. Mambo, Amiwa kechi nakonsha kufika pa kyokyo ne. Ine, mwane. Amiwa kine kechi nakonsha kwikyuba ne. Babena kukeba kwiimubula mwakubila. Inge Lesa wangichile kwiya na kusapwila Mambo awama, nanchi Amiwa ne Asapwile monka Lesa mo ambujila mba sapwile. Abyo kine ibyo, monka mo bya nembelwa mumwe mu Baibolo. Inge kechi naikala mundonda na Ao, nanchi ke kyokya...Lesa ukazhachisha amiwa pe akyo. Pakuuba inge Na—inge Na—inge Namona musuka ubena kwiya, nangwa mulwany ubena kwiya, kabiji Nakakalwa kupana lujimuno,

nanchi Lesa ukakebela amiwa. Pakuuba umvwe Napaana lujimuno kwi anweba, akyo kiji kwi anweba. Mwamona?

<sup>218</sup> Vulukai, “Akwa ku moba akupelako, amba kukeya bimye bya katazha, bantu bakekala ba kwitemwa abo bene, ba kwitota, bakwilundumika, ba mwenga.” Monai, ba mwenga, “Oo, abo bantu bakosama. Moba abya kukumya apita. Kechi kujipo kintu kya musango yeo ne.” Awa ke ngauzhi wakala wabubela. “Pano, twayuka mba banabakazhi betu bajitu pamo na maana nobe banabalume.” Amiwa kechi mbena kupachika nangwa pacheche ne, pakuuba Baibolo wa Lesa waamba mba mufumyaimo mu pulupiti. Akyo—akyo kyangwamina bingi, monai. Abyo ibyo. Kijitu bulongo. Mwamona?

Kabiji baamba mba, “Kyawama, pano, dinominesheni wetu, muji bantu bawama pamotu nobe byo muji mu tabbanako.” Amiwa kechi naamba kyokyo nangwa pacheche ne, pakuuba Baibolo kechi waswisha madinominesheni ne. Abyo ibyo. Kabiji, nanchi, Amiwa kechi mbena kwamba mba bamembala bawama mu kipwilo kyenu bafwamo ne. Akyo kyawama. Ke bantu bawama. Bantu bamo bawama bingi, Ne basambakana monsetu, ba Katolika kabiji ne bonsetu. Bonsetu, Nkumanya bamembala bawama.

<sup>219</sup> Pano, jishinda ja kuletelamo bibye, balunda, inge Nkambo waswa, mu bimye bya byalondelapo bya kufunda, kapepo. . . Nkemuyukisha keesha lukeelokelo kana twakonsha kwikalako keesha mute nangwa ine, monai, pakuuba mba bikapwe. Ene mambo kyo tubena kukebela kwikyuba, Nasaka kwi kileta kufika pampuzha pamo. Pano, inge mubena kukeba kwiyapo na muntu umo, mwatambulwilwa bingi bulongo kwikyuba. Bino vulukai, kechi—kechi muye kwalepa nangwa kweseka kutanamo bilubo ne. Anweba mwiya kuno. . . Amiwa mbena kwambatu ku kyami—kyami kipwilo, mwamona. Amiwa kechi funjisha bibye pangye ya kipwilo kyami kuno ne, mambo ao ke mwingilo wa muntu mukwabo. Kuuba mba, ye kafunga wa jitanga. Kabiji—kabiji Amiwa ne. . . [Kafwapo bijipo patepu ne—Waku.]

<sup>220</sup> Kubwela kunyuma ku Ntendekelo, mwakonsha kupitamo, ne kumona pokitanwa. Tubena kubwela ku Ntendekelo, tumone kika awa mwaana wa mubukende kyo abujilanga kutwela mu kipwilo kya Lesa kufika ne kubisemi fotiini. Byo kyasendanga. . . Ayo yakonsha kwikala myaka bitota bina pakuuba mba abwa bubi bufumepo. Byo tusakutaana kuuba mba abwa—abwa bumbulwa koloka bwa basemi bupepula baana ne baana ba baana babo, byo kyatatwile mu Ntendekelo, kabiji ne bikwabotu.

<sup>221</sup> Kabiji anweba. . . nanchi musakumona mba, kubwela kunyuma kwine, amba Lesa, kitendekesho kya ino ntanda kasa kikyangye kwikalako, nangwa atomu umo kasa akyangye kwikalako, kunyuma kokwa kasa kukyanyge kwikala kyeya, Lesa wayukile kyonse kilengwa kabiji ne byonse bikekalako

pantanda. Pajipo umo muno...Anweba kechi mwakonsha kulondolola akya kyambo, ne kwikyabanya, kabiji ne kwamba kyambo kya “kubula kupela” byo kyalumbulula. Kijitu nobe kwalulwila kamela obe ku—ku kubula kupela. Kijitu, kyatatulatu kyabwela kyatwajijila, byo byonka. Mwamona? Kubula kupela! Kabiji kechi twakonsha ne, mu milanguluko ipela, kumvisha Milanguluko ibula kupela byo ilanguluka. Mwamona, kuuba twauba kyokyo ne. Anweba, kuuba mwikyuba ne. Mwamona? Bino inge mwakonsha kutajisha, ku kwatakanya mu Mupashi, mwakonsha kwikumvwa kwalepa kwine. Kabiji—kabiji ne kubwela kunyuma kwa mu Kinembelo kabiji mwakonsha kumona pano, monai, kwine kunyuma kintendekesho kya ino ntanda kasa kikyangye kwaalwa.

<sup>222</sup> Pano, Baibolo waamba mba Yesu Kilishitu wajinga Mwanamukoko wa Lesa. Pano telekai bulongo, nanchi, inge bamo mwi anweba kechi bakekalako keesha ne, kwikumvwa byo kikapwa. Aye Baibolo waamba mba Yesu Kilishitu wajinga Mwanamukoko wa Lesa, waipayilwe kufuma ku kintendekesho kya ino ntanda. Ayo ibyo nyi? Kimye ka Aye po aipaiwe? Kufuma ku kintendekesho. Ayo yo ntanda, inge yalengwa ku mulumba wa maatomu alalaika ma atomu, afumishiwa ku juba kwiine kokwa, kasa kikyangye kwikala kyokyo ne. Nanchi, kasa kikyangye kwikala nangwa atomu umo waabanwapo mu kulenga juba, inge akye kyajinga kyeya kya juba, akyo yakonsha kwikala myaka aduleendi bbilyoni tililyoni matililyoni, kunyuma kasa kikyangye kwikala nangwa kyeya kimo ne, Kilishitu waipayiwe. Umvwe milanguluko ikatampe yakwa Lesa yaikala pa kintu kimo, ke kipe kyapwijiika. Kimye Lesa kyo aambile mba, “Kwikale,” kyapwila jimo. Inge kyasendele myaka aduleendi mbilyoni pakuuba mba kifikizhiwe, kyapwa kala ponka po Ekyambiletu. “Kabiji kimye Mwanamukoko kyo aipailwe kufuma ku kitendekesho kya ino ntanda,” Baibolo umotu, Mupashi umotu wanembele ne kwamba mba, “Mazhina etu abikilwe mu Buuku wa Bumi wa Mwanamukoko kitendekesho kya ino ntanda kasa kikyangye kwaalwa.”

<sup>223</sup> Nanchi awa muntu wanembele yewa lwimbo, “Kuji Jizhina Jipya Janembwa Monka Mu Lukumo,” wajinga na kilumbululo kyawama, bino wajinga wabula mu binembelo. Mwamona? Aja jizhina ja nembelwe mu Lukumo kimye ntanda . . . kimye ntanda kasa ikyangye kutatulwa. Kimye Mwanamukoko po aipailwe, mazhina etu abikilwe mu Buuku wa Bumi wa Mwanamukoko.

<sup>224</sup> Lekai—lekai ne mupepo kimo kicheche Kinembelo. Musa kutwajijilako pa kamineti kamo nyi? Kyaiyatu mu milanguluko yami ponka pano. Amiwa Nalanguluka namba twakonsha kuzhikulapo. Amiwa kechi nashiniinwa ne. Kabiji pano Ndekelaiko mambo pa kwi mulama kimye kyabaya, bino Najikwimubuula mba kyafwainwa kwikala pakachi kabufuku;

kechi kyatamishatu ne. Bino Na—Natemwatu ku—kuleta kikye, Kinembelotu kimo kyakubikapo.

Tuzhikule pamo ne amiwa mu Buuku wa bena Loma, kabiji Nakeba mba anweba mutange pamo ne amiwa. Pano, lekai tumone, bena Loma, inge Nakonsha kwi kitaana, nobe ponkapo. Pano twayai tuye ku bena Loma 8, kabiji—kabiji twayai tutatule pa veleeshi 28 wa kyapitala kyabu 8 wa bena Loma. Pano Nakeba mba anweba mutaange pamo ne amiwa na milombelo. Telekai papo byaambile Lesa.

*Kabiji twayuka mba bintu byonse bingijila pamo mu kwibaletela byawama batemwa Lesa, bo boba . . . baitwa monka mwaila kufukula kwanji.*

*Mambo abo bo ayukijile jimo, . . .*

225 Akyo kimupa . . . Mwakonsha kutanga pamo ne amiwa? “Mambo abo . . .”

*Mambo abo bo ayukijile jimo, ibo bo atongwejile jimo (kijitu bulongo) amba bakapashang’ane pamo na Mwanami, aye aluke ke mubeji mu balongo banji bavula.*

*Kabiji aba bo atongwejile jimo, i bo bo aita: ne boba bo aita, i bo bo abingisha: ne abo bo abingisha, i bo bo atumbijika.*

226 Kufuma ku kintendekesho kya ino ntanda! Lesa byo atajile panshi . . . Pano, Lesa kechi wingila mu ofweshi Wanji, amba, “Kyawama, pano, Amiwa mbena ku . . . Oo, kika kyo tusa kuba pano?” Mwamona? Kafwako kijipo ne . . .

227 Vulukai, bumbulwa koloka, bubi, ke bololoke bwa alulwa. Aye diabola kuba walenga ne. Bushe muntu yense, bonsetu, mwaumvwa kyokyo? Alo lo Lufunjisho lwa kino kipwilo. Aye diabola kuba walenga ne. Aye walulatu byalenga Lesa. Pano, kwalulula kyo kika? Muno, anweba bonse mubena kumweka nobe bakulumpe, byo kyamweka. Telekai ku kino. Twi bantu baji mu masongola. Kabiji anweba banabalume mwasongola kabiji anweba banabakazhi mwasongolwa mwikala pamo nobe mulume ne mukazhi, kabiji abo banabakazhi bajitu pamo byonka byo bajinga . . . Abo ke babisungu, kikulutu waikala pamo na balume bobo. Abyo ibyo. Pano, akyo mo mwaila mizhilo ne kwitabilwa, kabiji kijitu bulongo. Ke kyabikwako na Lesa kuba byobyoy. Mwanamukazhi mukwabo wakonsha kuba kintu kimo kyubapo bakazhi bobo; kimo mu kyokyo, wiiwaoloka ku meso akwa Lesa; kabiji kyubilo kimo ku mwanamukazhi mu kwabo, wazhatwa ku meso akwa Lesa, kufika ne kulufu. Kyokika? Bololoke bwapipulwa, monai, bololoke bwapipulwa. Pano, diabola kuba walenga ne, bino walululatu Lesa byo alenga kala.

228 Bubela kyo kika? Ke bukine bwa alulwa. Muntu umo waambile mba, “Oo, talai, pajinga pa Kibelushi bufuku,

naini koloko, ee, Bill Branham wajinga mu Jeffersonville,” ibyo. “Ponka po batendela suki pa ba Antz, kasa apendwa,” ke bubela. Kyajika kika? Najinga mu Jeffersonville. Akyo kya kine. Kyajinga bololoke bwaalulwa ke bubela. Mwamona kyo Nalumbulula? Monai, bubela bwalula kya kyaoloka. Ke kintu kimo kyaambile ko Najinga. Pano, inge kyaambile mba, “Pa kipwilo, na kusapwila,” ibyo. Abo ke bololoke. Aye wambujile bukine. “Pa nzubo ya malwa, na kutoma,” ke bubela. Kya alululwa; monai, bukine bwa alulwa. Mwamona mo Nalumbulwila nyi? Bonse bumbulwa koloka ke bololoke bwa alulwa.

<sup>229</sup> Lufu, kyokika? Bumi, bwa alulwa. Misongo? Butuntulu bwa mubiji, bwa alulwa. Wafwainwa kwikala muntu wawama, muntu wakosa. Kijitu bulongo. Inge wi ukolwa kolwa, kyokika? Butuntulu bobbe bwa mubiji bwa alulwa. Mwamona? Abyo ibyo bitanwamo mu kikye. Kyokika? Mwajinga banyike, banabakazhi balamba; kabiji bakosa, banabalume balamba. Pano ke mikafi mikafi, ke kukoma. Kyokika? Bumi, bwa aluluka, monai, ke kubwela kunyuma jibiji. Mwamona? Kabiji bwafwainwa kubwela jibiji. Jitotwe Jizhina ja Nkambo! Lesa walaya kwibubwezha jibiji. Kabiji kine byonka byo—byo buji (twayuka mba buji pano), nanchi kine byonka byo buji, Lesa ukebubwezha jibiji. Aye walaile kabiji wachipile mba Ukeyyuba. Akyo kyo kibupaana.

<sup>230</sup> Pano, byepi, twafwainwa kwikala bantu bamusango ka? Pano monai abye bintu byo byubiwa. Pano, aba bo Ayukijile jimo, Bo aita; aba bo Aita, Wibabingisha bonkabo. Kimye ka? Kintendekesho kya ino ntanda kasa kikyanyge kwaalwa, ntanda kasa ikyangye kutatula. Pano, inge twakonsha kutola kikye Kinembelo ne kwikikajika, twakonsha kusenda ma awala pa kyonka kyootu, bino atweba—atweba kechi tubena kukeba kuuba byobyone. Pakuuba bonse bwe bumbulwa koloka bujipo, ke bololoke bwa alulwa ke bumbulwa koloka. Abyo diabola byo oba.

Pano, umvwe wafika pa myaka ya kuyuka bintu, kabiji wayuka byawama ne byatama, wafwainwa kufuma ku bilubo byobe. Mambo, wasemekejilwe mu bubi, waimichijilwe mu bubi, kwiya pantanda kasa wamba bubela. Pano wiwa—wi wasemekelwa mulusako lwa masongola, kabiji wafwainwa kusemwa jibiji, pakuuba mba utambule Kusemwa kupya, ukatwele Mwiulu. Mambo, awe musango wakusemekwa ko uji nako pano . . .

<sup>231</sup> Monai ba Kamonyi ba Yehoba po bakonsha kwikela mukilubo kyabaya bingi, kulanguluka mba Kusemwa kupya ke lusanguko lwa mubiji? Mwamona, kechi kyafwainwa kwikala byobyone. Mwamona? Kyafwainwa kwikala kintu kimo . . .

<sup>232</sup> Obewa, wikala mu kinye. Kabiji kintutu kiji Peenape ke kintu kyabula ntendekelo nangwa mpelo ne. Kyonse kintu



kiji Peenape kechi kyajinga na ntendekelo ne, nangwa kechi kikekala na mpelo ne. Mwamona? Nanchi umvwe wi lubaji lwa kwa Lesa, awa Mupashi uji mwi obewa kechi wajingapo na ntendekelo nangwa kechi ukekalapo na mpelo ne, kabiji obewa wi Wapeenape na yewa Mupashi uji mwi obewa. Mwamona? Kijitu pamo na—na—na butemwe bwa *Agapao*, popo bwaiya kufika ku butemwe bwa *phileo*, kabiji apa kyaiya ne ku butemwe bwa lukumbwa. Kitwajijilatu na kuya na kuya kulutwe, na kwalulwa poso byonse byaikalatu ke bintu bya lubakana. Kyawama, jishindatu jimo Yesu waishile kwingijisha ndandalashi imo, pano panshi na kutola muntu ne kumubwezha jibiji mu musango wakila wa peulu, kufuma kuyewa wapeleshako panshi; kufuma kulufu kuya ku Bumi, kufuma ku misongo ne kuya ku butuntulu bwa mubiji, kufuma ku bumbulwa koloka kuya ku bololoke. Mwamona? Aye wafumine Peulu peene pa kijishatu kwiya peene panshi, pakuuba mba Aye afumye baji panshi peene kwi batwala Peene peulu. Aye walukile amiwa pakuuba mba Amiwa konshe, kupichila mu lusa Lwanji, ngikale ke Aye, swanyi wa Jitanda mu Lukumo. Mwamona mo Nekitazha nyi? Abyo bintu.

Pano talai. Kwiine kunyuma ino ntanda kasa ikyangye kutatula mu oa ma atomu kunyuma kokwa, Lesa byo amwene bintu bikobiwa, konkakwa Aye wakumwene, Aye wamwene amiwa, Aye wamwene lubalebale yense, kyonse kitumbuka, yense bombwe, konse ka kilongolo. Byonse bintu bikekala panopantanda, Aye wi bimwene pa kyonka kya kimye. Kine, Aye wikyubile.

<sup>233</sup> Pano, Aye kechi waambile mba, “Amiwa katuma Mwaana Wami pantanda kabiji ka muleke Akafwe, kabiji amba kape muntu umo Akamumvwinoko lusa ne. Kabiji amba kikekala ke kintu kyalusa bingi, kape po muntu umo wafwainwa kupuluka.”

<sup>234</sup> Aye wayukijile jimo ukapuluka ng’anyi! Ee, mwane. Aye waambile mba, “Isao Namushikilwe, pakuuba Yakoba Namutemenwe,” bonse babiji kasa bakyangye kwikala na lubaji lwa kushiniikisha musango wabo ye bajimo ne, mambo Aye wayukile byo bajinga. Aye wayukile. Aye wayuka bintu byonse. Aye wayukile byo ukoba, kasa ukyangye kusemwa, nangwa ntanda kasa ikyangye kutatula.

<sup>235</sup> Pano talai. Nobe byo mwayuka, Ami—Ami—Amiwa ne muntu wa buta bwalaifo. Na—Natemwa ma laifo. Kabiji mwanamukazhi umo mu Texas, Naketekela mba ku Texas, wandetajile musango wa buta bwa Swifiti, tweti-tuu Swifiti. Amiwa kimye kyonse na kebangapo bumo. Nkeba kwi bupesapesa. Ke buta bucheche buji bingi na bulume bwa kuloza. Buji na polopolo tweti-tuu, polopolo ya mapeke-fote-eiti. Kabiji wakonsha kulonga polopolo na maboko. Pano, mukinyi ulenga waamba mba, “Kechi wakonsha kwikyuba ne; ke kintu kyatama bingi.” Bino wakonsha kulonga na

maboko awa lupolopolo kufika ma fiti faivi sauzande pa sekonde umo, kabiji kasa wakitwajijila kwi kikwata mukifulo kyakyo. Faivi sauzande ma fiti pa sekondi umo, ko kuuba mba ke mailoshi umo pa sekondi umo. Mu ng'ambilo ikwabo, kabemba waikala, mayadi tuu aduleendi. Waloza awa kabemba, wamona mayona avuyuka buta kasa bukyangye ku kufikila. Mwamona? Amba, bino watola, lubaji lwa papakana lwa kya kutokwelako mujino, ne kutwezha mu kabinga, kabiji waitulwila *abya* byavula mukachi, wa esakanatu kya kuuba mba wakonsha ku mulama ponka pa kyakutokwelako mujino; kabiji waloza ngulube mulume waikala kwapela kino kishimikwa kokwa, wikalatu kasa akutalatu. Lukatazho lweepi? Awa lupolopolo usansaukatu, mambo wenda bingi bukiji, ne-... Kabiji wakonsha kubika kisapi pakachi kokwa ne kuno, kabiji kechi ukamonapo nangwa kacheche ka kibalakasha kaponena pakisapi ne. Kibwelatu byo kyajinga kunyuma; kechi ku—ku buto ne, buto bwakyuya bufuma mu mushiji, pakuuba kiya palepa kukila popo. Kibwelatu kunyuma konka ku ma asidi oka alenga jibwe ja mukuba ne mabwe atanwamo. Kibwelatu kunyuma kwiine nobe myaka aduleendi bbilyoni. Pano, awe ke lupolopolo mucheche, uji na tumapeke fote-eiti twa lupolopolo yenji nanji mu maboko ami, kabiji sekodi walondelapo kyabwela konka ku musango ye kyajingamo myaka ma aduleendi milyoni kunyuma. Kabiji inge ntanda yakonsha kutanwako myaka ikwabo aduleendi milyoni, wakonsha kubwela jibiji ku bu lupolopolo, wakonshaka kubwezihiwa jibiji, mambo kyakonshaka kulengwa jibiji mu musango wa jibwe ja mukuba.

<sup>236</sup> Pano monai Lesa kyo aubile, kabiji Aye mwakonsha kumutemwa. Nanchi waya kunzubo, ne lukeelo kelo walala kimye kyapwa. Kabiji—kabiji obewa—ukamutemwa Aye kukila ne myaka yapita. Pano, Lesa ke Mulenga. Baanga bayuka kyokyo? Aye ye Mushimikishi. Kijitu bulongo. Telekeshai bulongo. Pano, Lesa kunyuma kwine, nangwa, bamba mba... Pano tusa kusenda mulanguluko wa balonda bintu byapita kunyuma. Lesa, myaka aduleendi bbilyoni yapita kunyuma, kimye Aye kyo alengelenga ntanda, kyawama, Aye popo atatwiletu. Pano, Aye wajinga na... Aye wajinga na mulanguluko mu Maana Anji.

<sup>237</sup> Pano musa kwamba mba, “Inge Aye wabaya byobyoy, Mulongo Branham, kika kyo aswishishe diabola kulenga mambo?” Kyawama, Aye wayukile, diabola kasa akyangye kulengwa, amba ukekala diabola. Lukumo! Pano Naumvwa bupopweshi. Oo, ami! Aye wayukile, diabola kasa akyangye kulengwa, amba ukekala diabola. Pano mwaipuzha, “Pano nga kyo?” Mwamba mba, “Kika kyo amulekejile kwikala diabola?” Pakuuba Aye ashiniikishiwe mba ye Lesa. Oene mambo Aye kyo e kyubijile. “Kika kyo kwaikajile bumbulwa koloka? Kika?”

238 Kyajinga kitanshi kyepi, Mupulushi nangwa mubi? Kyajinga kitanshi kyepi? Ke Mupulushi. Kyajinga kitanshi kyepi, Ubuka nangwa muntu wakolwa? Kika kyo kyaswishiwe mba kwikale mubi? Mambo a milanguluko Yanji ya kwikala bu Mupulushi. Inge kechi kwajinga mubi ne, inge kechi Wayukanyikwa nobe Mupulushi ne. Aleluya! Aye wakonsha kulengela bintu byonse byazhokolokela kubwela ku lukumo Lwanji. “Bushe mbumbi wakonsha kwamba ku . . . Nangwa, mwipika wakonsha kwamba ku mbumbi mba, ‘Mwandengelaka bibye?’” Ing’anyi uji ku jiwilo? Ing’anyi uji na buchimba? Mu maboko abang’anyi mo kiji? Paulo waambile mba, “Oo, muntu wabula maana, Aye waambile mba kechi Naimenye Felo na onka ano mambo nenyi?” Kyakine. Aye wikiyukile. Kasa kukyangye kwikala ntanda, Wayukile kikekala kinanga kika. Kabiji Aye walekele mba kwikale mubi, pakuuba mba Aye ekale Mupulushi. Aye waswishishe mba kwikale misongo, pakuuba mba Aye ekale Ubuka. Aye waswishishe mba kwikale bushikwe, pakuuba mba Aye ekale Butemwe. Kine, Aye wikyubile. Aye ye Lesa, kabiji ayo yo milanguluko Yanji. Kabiji Aye wafwainwa kwikalapo na kintu kimo kya kumwesheshapo milanguluko Yanji.

239 Mwakonsha kuyuka byepi amba kuji bufuku, mwakonsha kuyuka byepi amba kuji kintu kananga? Inge kwajingatu kyeya kya mute, mwakonsha kuyuka byepi mba kuji bufuku? Kuji bufuku, pakuuba mba kishiniikishe kyeeya kya mute. Kine, ko kiji. Amena. Mwamona byo Aubile nyi?

240 Bino byo Ajinga kunyuma kokwa, kintendekesho kyaino ntanda kasa kikyanyye kwaalwa, kasa Aye ukyanyye kutola jije juba ja kala kabiji Aye wijizhokolosha ku kako kabaangabanga kakala ko twaikalapo kino kimye, yo inontanda, ne Aye wakilengele ku juba, kabiji wi kitula ke kizhokoloke juba. Ne kwaamba mba, *aje* jo juba. Aye wikilengele ku *lulwe* lubaji, kabiji ne ku muleka wakobama popa pa myaka foolo aduleendi bbilyoni. Kika Aye kyo alengelenga? Magasi amo. Aye waendele konse konse ku *lulwe* lubaji, Walengele kintu kikwabo. Kika Aye kyo lengelenga popa? Potashi umo umo. Aye wazhokolokele *kukwe* ku lubaji, kabiji Aye ubena kuuba byepi kuno? Ubena kulenga kaushamu. Aye waubilenga ka? Aye walengelenga obewa ne amiwa. Kika Aye kyo aubilenga? Nobe sendwe wa makotalaki ubena kusashika byanji byonse bibiji-pa-bina kabiji byanji bibiji-pa-bitanu na bisatu, kusashika kwanji, kutanchika kwanji, aye wayukile bishimikwa binga byo akashimikwa. Kabiji twalengwa kufuma ku bintu sikisitiini bya pantanda, kabiji Aye witulengelenga atweba bonse, kabiji ne kwitubikako ntanda kasa ikyangye kwikalako ne. Kabiji Aye. . . Wafwayijilwe kwikala wazhinguluke pa kyokya kimye; kechi Nayuka byo kyajinga ne. Kika Aye kyo alengejilenga golonde, ne jibwe ja mukuba, ne lubemba, ne meema, kabiji ne byonse bye bintu? Aye ke Sendwe wa makotalaki. Aye ye . . . Aye Ntungu, Wa ashikilenga

bintu byonse kokwa, wajinga na byonse byachibiwa kabiji ne kunengezhiwa jimo. Kimye Aye kyo alengele byonse, kyajingatu nobe vokano walupula mujilo wakaba kufuma mu mushiji. Aye walekele mavokano akala anengezhiwa pa myaka aduleendi milyoni, pa kulenga kaushamu. Kyokika? Ke lubaji lobe.

<sup>241</sup> Kabiji pano, kasa pakyangye kwikalapo nangwa ka bumi kachechetu ne, mibiji yetu yalajile ponka pano. Aleluya! Kasa pakyangye kuponena nangwa kamo ka kinyazhi nyazhi pantanda, atweba twalajilenga ponka pano. Kimye Adama kyo ailenga na-kwenda-uka mu bujimi bwa Edena, Najinga na lajile monka. Amena. Ee, mwane. Ee, lukumo! Kimye ba Kelubi, bantanda ba kumakya byo baimbile pamo, kabiji ne baana bakwa Lesa byo babijikile na lusekelo, Nalajile ponka pano kupembelela muya wa bumi bwami kwiya. Najinga ponka pano. Aye wandengele amiwa ponka pano, wajinga na mubiji kasa aalala ponka pano. Ee, mwane. Inge kechi kyajinga byobyo ne, bwafwainwa kufuma kwepi? Uu? Bwafikile byepi kuno? Lesa wajinga nabo kasa bwalala ponka pano. Lesa wi bulengele. Atweba twalengwa kufuma ku bintu sikisitiini: petulyolyamu, potashi, kabiji ne kyeya kya mulwelele, ne bika-bikwabo. Mwamona, twalajile ponka pano.

<sup>242</sup> Nanchi kika kyamwekele? Nanchi Lesa waambile ku Mupashi Wazhila, tusa kwikisendatu mu musango wa masimbo, “Pano Obewa yanga, kabiji Ukalenge butemwe na ntanda. Mambo, Amiwa ne butemwe, kabiji Obewa wi lubaji Lwami, nanchi Yanga ukobe butemwe na ntanda.” Kabiji aye Mupashi Wazhila wabaya, tulanguluka mba, waishiletu ponka pa; pano ke musangotu wa kipikichala. Kechi kyajinga byobyo ne. Mambo, Mupashi Wazhila ne Lesa ke nkebelotu-imo, nkebelotu-imo, Muntu. Ndekelaiko mambo. Kabiji oene mambo Aye kyo atanyikijile byapi Byanji kuzhokolosha ntanda, Aye watatwile kufukamina. Akwa kufukamina kyo kika? Kijitu pamo nobe kyanje na twaana twanji, kasa afukamina, na kuba butemwe, “Chukwi, chukwi, chukwi.” Oo!

<sup>243</sup> “O bumi, bwamwekele!” Aye wabijikile. Wakeketele konse konse. “Amiwa nakeba buuya pa ino ntanda. Iya, kyeya!” Aye Mupashi Wazhila ke ende. Kabiji Aye byo aubile, Natajila; ke kwiye, mulala wa kulupula katumbatumba, akwa ke kwiye kaushamu na kwituluka, kabiji wimvwanga na potashi. Kibena kwalulwa ke kika? “Bumi, bwaiya!” Kabiji ne jiluba jicheche ja Lusanguko ja lupwile mutwe wajo kufuma mushi ya jibwe. “Iya kuno, Taata, talai pa kyokya.”

<sup>244</sup> “Akyamweka bulongo. Twajijilatu na kufukamina.” Aye walupwile maluba. Aye walupwile bijimwa byonse. Aye walupwile bumi bwa banyama bonse. Bang’onyi batumbukile kufuma mu lukungu. Pakupitapo kimye, kwaishile mwanamulume ne mwanamukazhi; kwaishile mwanamulume, kabiji awa mwanamulume wajinga byonse bibiji mwanamulume

ne mwanamukazhi. Kechi kwikala na lubaji lubiji ku mubiji ne, pano. Kyajitu, kyajinga monka mwi aye, mwajinga mupashi wa bwanabukazhi.

<sup>245</sup> Inge mwatola mwanamulume ao uji na tumisango twa buinetu, aye wakonsha kwikalatu bulongo, waesakanatu bulongo, bino kujipo kintu kimo kyatama. Kabiji umvwe mwatola mwanamukazhi, ukeba kwipipisha suki kabiji ne kumwala ma ofoloshi, ne kulupuka nabyo, kabiji, “Apehiwe Lesa, Nsakwimubuula!” Pajipo kintu kimo kyatama. Mwanamukazhi uji na mupashi wa bwanabukazhi, kabiji mwanamulume ke mupashi wa bwanabulume. Twayuka kyokyo. Kabiji ne anweba mwayuka kyokyo. Bushe mwanamukazhi umweka byobya, kweseka kwikala, ngubilo nobe mwanamulume nyi?

<sup>246</sup> Kika, Naikele kimye kimo, Najinga mukulumpe wabangemu kuno, kabiji Naikele mu sanya kabiji naile kunyuma na imbilenga pa mauu amwanamukazhi, na kuboko kwami, kasa nesamba naji, kabiji kechi Nayukile mba mwanamukazhi ne. Wamvwajile kisochi kimo kya kuwelingilamo, kabiji ne magalashi akatampe nobe *byobya*, kabiji Naikele konkakwa kunyuma, kabiji wabujilenga kintu kimo kyaubiwe ku mukwabo. Waambile mba, “Mwayuka,” kabiji waambile mba, “kabiji bufuku bwapita,” wamwekelengatu-wakosakana mo afwainwa kwikela, ne kupepa fwaka. Waambile mba, “Bufuku bwapita, Nakubuula, awa muntu wajikwiya, peulu ya jwi janji. Aye waambile mba, ‘Ami!’ Waishile na ku kukuluka kupita momwa.” Waambile mba, “Nasekele bingi mu bumi bwami.”

<sup>247</sup> Kabiji Nasekelenga, mwayukatu, byonka *bya*. Naambile mba, “Mulunda, ao wajinga iye, kechi ibyo nenyi?” Waikele popa kasa abena kwamba yewa musango. Kabiji kechi wavujileko akyo kintu ne kabiji wasukenye mutwe wani, kabiji wajinga na kya kupukuchilako peulu popa, ku mwesha mba mwanamukazhi. Amiwa kechi na kilengeshiwapo buvu byobya mu bumi bwami ne. Na—Naambile namba, “Wimwanamukazhi nyi?”

Aye waambile mba, “Kika, kine!”

<sup>248</sup> Naambile mba, “Ndekeleko mambo.” Amiwa kechi nakimonapo kyokya ne. Pano, akyo, kya bukine.

<sup>249</sup> Namwene kiyukilo juba jikwabo, kyandengejile kumvwa bulongo. Kyajinga na kiyukilo kikatampe peulu, amba, “Bainetu benengezha kumwala bya kuvwala.” Nalangulukile namba, “Ataikwe Lesa pa kyokyo.” Mwamona? Bino, naishile kutaana mba, kyajingatu nobe musango wa bya kuvwala byo balenga kala, mwayukatu. Na—Nalangulukile mba kine basakutatula kumwala bya kuvwala. Amiwa byo naubile. Kyaambile mba, “Bainetu benengezha kala kumwala bya kuvwala.” Naambile mba, “Atotwe Lesa na mambo a babo. Akyo kyawama.

Pakyokyo, Amiwa kine nasachila Nkambo pa kikyē.” Bino, monai, kyajingatu musango umo wa bya kuvwala byo balengejile jimo, bintu bimo. Kyajinga kintu kileta tuseko, kechi ibyo nenyi, mu kino kyaalo? Kijitu bulongo.

<sup>250</sup> Nanchi Adama byo amwekele. Kabiji Adama wamwekele bu buke, nanchi Aye watolele lubavu umo kufuma ku lubaji lwanji ne kulengamo Eva, wakulengwa-kufuma mwiaye. Aye walengele... Aye wafumishemo mupashi wa bwanabukazhi kufuma mwi Adama, kabiji ne kumubika mu mwanamukazhi, mupashi wa butemwe, wa bwanabukazhi, wa lusa, wanekena. Kabiji Aye washile mupashi wa bwanabulume mwi Adama. Pano, inge pajipo kintu kimo kypusanako, nishi pajipo kwalulula pantu pamo. Pano, kabiji nanchi aba babiji bajinga umo.

<sup>251</sup> Kabiji twayai tubepo kisela kicheche kasa tukyangye kupwisha. Kino kiya... Pano, ke Adama wasenda Eva mu kuboko kwanji kabiji ke baye ne kuya. Natemwa jije jishimikila. Kabiji ke baye ne kuya, mwayukatu. Kabiji Eva waambile mba, “Oo, mutemwe, kine ubena kwamba mba?”

“Ee, Ne kipele jizhina.”

“Pano wikitela mbaka?”

“Awa witwa mba mbili. Uu-uu.”

“Kyo kika kya?”

“Awa ke ng’ombe. Uu-uu.”

“Wikipele jizhina akya?”

“Ee. Uu-uu.”

<sup>252</sup> “Wibatela mbaka aba, aba babiji baikala popa na mitwe yabo iji pamo?”

“Aba ke bang’onyi butemwe.”

<sup>253</sup> “Oo, Namona. Namona.” Kabiji batwajijiletu byonka bya. “Kabiji ngakye papo?”

“Nekitela akya amba, *kikananga*, kabiji ngakye papo.”

<sup>254</sup> Kabiji, “Oo, Namona. Uu-uu. Akyo kyawama.” Kabiji bonkwe wa buluma. “Mwikitela mbaka kya?”

“Awa ye bonkwe.”

“Ngakye *kika*?”

“Ye kisekesa.”

<sup>255</sup> Kabiji, oo, nobe. . . “Oo, Namona.” Ujitu pamo nobe bapushi, mwayuka, kabiji ne kuba mba myaau.

<sup>256</sup> Nanchi, pa kupitapo ka kimye, wakeketa kuzhokoloka. Waambile mba, “Mutemwe, talai kokwa, juba kejiye na kuzhika. Ke kimye kyakuya ku kipwilo.”

Mwayuka, pajipo kintu kimo inge juba ke jiye nakuzhika, ke kukeba kupopwela. Inge wabula kuya ku kipwilo bobo bufuku, watemwa kuya mu kibamba kya nzubo, na kutanga Baibolo. Baanga batemwa kuba kyokyo, waikalatu pa buke bobo? Mwamona? Kijitu mu muntu kuba kyokyo. Wafwainwa kuba kyokyo.

“Kimye kya kuya ku kipwilo.”

257 Bino kechi, baambile mba, “Pano, pembelaiko ka mineti, bino, Jones waku Assemblies, kabiji atweba twi ba ku...” Ine, kechi kyajinga byobyo mu kyokya kimye ne, nanchi bayangatu. Kechi bajinga na kipwilo, nangwa kipona kyawama kya kwikalapo nobe byobya ne. Abo bayangatu mushi ya kikatampe bingi kishimikwa kya binchi, ne kufukama panshi.

258 Kabiji akya Kyeya kyazhinguluka kasa kya kobama peulu ya binchi. Mwamona? Nakonsha kumvwa jivi ke jambe panshi amba, “Bushe baana Bami bepakisha abo bene pantanda, leelo, apo Nkambo Lesa wenu po emupa?”

259 “Ee, Nkambo, twipakisha atweba bene leelo.” “Ibyo nyi, mutemwe?”

260 “Ee. Ee, mutemwe, twauba.” “Nkambo, kine atweba Twimusachila. Pano Nalala panshi namba ndale.” Mwamona? Kabiji aye watandabika ne mukoko wanji mukatampe, ne aye walala panshi, pa mukoko wanji, kabiji walajika kisekesa panshi ne bonkwe panshi, kabiji bintu byonse byaikala panshi na kulala; na mutendetu.

261 Nanchi Lesa waikila panshi kabiji Aye waleta, oo, jibumba ja ba Malaika, Ngabaliela, ne bilengwa Byanji bya Mwiulu. Nanchi baikila panshi ne kwimena kunung’unu-yamana monka mukibamba kya mwanya, monai, ne kukeketa konse konse. Ngabaliela waambile mba, “Iyai kuno, Taata. Iyai kuno. Talai kuno. Uji pano. Pano, pano palala baana Benu.”

262 Baanga muno bakiyapo ku lubaji lwa mwanya, anweba bamo bamaama, anweba ne bataata pamo, ne kutala pa songwalume mucheche, awa songwakazhi mucheche, kabiji ke mwivululeko umo na mukwabo, “Bushe—bushe ke ubena kumweka nobe anweba, *muyuwe* musango ne *muyewa* musango?” Muuba byobyo ne anweba nyi? Kika, bimye byavula Ngya na kwamba kwi Meda, ne kwamba pe Joseph. Aye waamba mba, “Bill, uji na kilungi kyalundumana nobe obewa.”

263 “Ee. Bino, Meda uji na meso abaya nobe obewa.” Kika? Aye ke lubaji lwetu lwa luse-... Aye walengwa na—na kukwataka kwetu.

264 Pano, kabiji Taata waamba mba, wakonsha kwamba kikye pa kikye. Waambile mba, “Mwayukatu...” Kabiji Ngabaliela waambile mba, “Mwayuka, aye ubena kumwekatu nobe Anweba.” Abyo Lesa byo amweka; talai pe anweba. Abyo

Lesa byo amweka. Aye ubena kumweka nobe anweba. Anweba yenu kisaka Kyanji. Baanga bayuka kyokyo? Mwamona?

<sup>265</sup> Pano talai. Ng'anyi musango wa bumi bwa peleshakotu panshi botuji nabo? Bombwe. Ng'anyi musango wa bumi bwa peleshakotu peulu? Bantu. Kyakine. Kabiji ing'anyi musango wapeleshakotu peulu? Bwatwajijiletu kufuma ku bwapeleshakotu panshi, kuya peulu, kufuma ku bombwe kuya ku *kikye* kabiji ne kuya ku *kyokya*, kabiji kufika ne ku kang'onyi, poso, ne bikwabotu, mu misango ya peulu ya bumi, poso kyaiya kumusango wakijishapo wapeulu ko bwakonsha kuya, nanchi bwalengwa mu kipasha kya Lesa. Abyo byo kiji. Kabiji mwanamukazhi kechi walengelwe mu kipasha kyakwa Lesa ne, pakuuba mu kipasha kya mwanamulume. Mwamona?

Pano, pano, byobyoby banji. Kabiji Lesa utala pe abo, ne kwamba mba, "Ee, babena kumweka—babena kumweka batemwikwa."

<sup>266</sup> Kyajinga kika, mulongo? Kechi bafwainwa kufwa ne. Abwa bwajingatu mukono mutanshi wa kaushamu, potashi mutanshi, kabiji bintu byonse byo byatatwile muyekawa musango. Kechi kyawama nenyi? Pakuuba bubi bwaishile palutwe kabiji ne kulubakanya kipikichala. Pano, ke Lesa. . . Kika Lesa kyo ebuswishishe kuuba? Kika Aye kyo ebuswishishe amba bwikale kyo tubaambengapo kakimye kacheche kapita kunyuma? Aye wibuswishishe pakuuba mba ashiniikishe mba Aye wajinga Mupulushi. Aye wikyubile. Aye walekele misongo kumweka, pakuuba mba Aye ashiniikishe mba ye Ubuka. Aye walekele lufu kumweka, pa kushiniikisha mba Aye ye Bumi. Mwamona? Aye walekele byose bintu byatama kumweka, pakuuba mba ashiniikishe Aye ye wawama, byobyoby Ajinga. Tukoba. . .

<sup>267</sup> Mwaamba pa kwimba jishimikila ja bukuzhi! Kika, mulongo, kimye Yesu kyo akeya, akeye—akeye Kipwilo kikemana peulu ponka papelela ino ntanda kabiji kikemba mashimikila a bukuzhi, kimye ba Malaika kyo bakakunyika mitwe yabo, kwakubula kuyuka kyo tubena kwambapo. Kyawama, abo kechi bajingapo balubilamo ne. Abo kechi bayuka kyo twapitamamo ne. Atweba twayuka mo kyatala ku lubilamo kabiji ne kulubuka. Oo, twakonsha kubijika mitoteloYanji! Aye kechi Mupulushi kwi abo ne. Abo kechi bakebelepo kupuluka ne. Aye kechi wajinga Ubuka kwi abo ne. Ine. Lukumo! Aye kechi—Aye kechi Bumi kwi abo ne. Kyakine ine. Abo kechi bafwilepo mu bubi ne mu mizhilulwila ne. Atweba twajinga, kabiji twalengwa ke bomi. Abyo byo tuji. Tukamba mba ka, na michinya yetu, "Oo, obewa wi Rev. *Kananga-ne-kananga*"? Ine, ine, ine, ine, ine. Lonse lukumo lwikale kwi Aye! Byokiji. Abyo byokiji. Pano po tukabulang'ana jishimikila byo twashijile. Tu ke kyumvwa shabulongo kulutwe.

<sup>268</sup> Nanchi, nanchi mukyokyo, pano kika kyamwekele? Nanchi Lesa waambiletu mba, "Kyawama, Amiwa nanchi kyapeela



ng'onaunetu potashi Wami yense ne kaushamu. Byonse bya onaikatu"? Ine, ine. Aye wayukile mba kikekala muyewa musango.

Pano, pano, inge Mupashi Wazhila wandengele kwikala Byonji, kabiji ne kuja kajo ne kwikabika mu mubiji wami, kabiji ne ku koma kufika pakipimo kyo Njipo. Bino, nangwa byonkabyo, Nalengelwe mu musango. Kyonse kipikicha Lesa kyoamwene, kintendekesho kya inontanda kasa kikyangye, kufikizhiwa, kumweka. Mwamona? Kyaishile kufuma mu mwanamukazhi, monka Aye moaambijile amba byo kikekala; kyalondelapo, kyafuma kwi Lesa. Kyaishile mu kyokya kimye, kupichila mu mwanamukazhi; mu kino kimye kyaishila, mu Mwanamulume. Mwamona? Kyaishile mu kyokya kimye, kupichila mu nkebelo ya masongola; kyaiya mu kino kimye kupichila mu Kyambo kya Lesa. Mwamona?

<sup>269</sup> Amo, pano, pajipo kyakonsha kuleta bulemo nyi? Ine, mwane. Kechi pajipo kintu kyakonsha kwituletela bulemo ne. Paulo waambile mba, "Nangwa mu bintu bijipo, bintu bikeya, misongo, lufu; kafwako kyakonsha kwitwabanya na butemwe bwa Lesa mwi Kilishitu ne." Kechi kujipo kintu kyakonsha kwitwabanya ne.

<sup>270</sup> Monka mo Naambila jishimikila jicheche. Amiwa nashaltu nasuki itanu ya kwikala na jipala, japwijijika. Kabiji Nasang'unanga yonkayo icheche bimye byapita kunyuma, mukazhi wami waambile mba, "Billy, kwashalatu pacheche kwikala najipala."

Naambile mba, "Bino kechi natayapo nangwa umo ne."

Aye waambile mba, "Iji kwepi?"

<sup>271</sup> Naambile mba, "Yajinga kwepi Amiwa kasa kyangye kwiitambula?" Mwamona? "Konse ko yajinga Amiwa kasa kyangye kwiitambula."

Pano, kwajingapo kimye kimo, myaka aduleendi kunyuma, aye suki kechi yajinga mumwe nangwa pachechetu ne, bino yajinga mu mushiji. Abyo ibyo nyi? Nanchi pepi nobe myaka fiifiite kunyuma, yatatwile kwiya mu mutwe wami. Yafumine kwepi? Kufuma mu mushiji. Kabiji pano ibena kubwela konka ko yajinga. Abyo ibyo nyi? Kechi yajingako ne, nanchi yaikalako, kabiji pano kechi ko iji ne. Kyokika? Kika kiilengele byo iji? Lesa! Abyo byo Aji. Aye wapetele kipikichala, ne kwaamba mba, "Aje jo jishinda Njona mukebelamo amba ekelemo."

<sup>272</sup> "Obewa Lufu, lumuna obe ujipi? Kilende, lushijilo lobe lujipi?" Mwakonsha kuzhika amiwa juba jimo jibena kwiya kufuma pa kino kimye. Amiwa kechi nayuka ne. Bino, mulongo, Amiwa kechi kafwa ne. Nsawkimubuula kyokyo. Ine, mwane. Oo!

Atweba tukasanguka, (Aleluya!)  
 Atweba tukasanguka!  
 Mujuba ja lusanguko,  
 Minyololo ya lufu po ikamokauka,  
 Atweba tukasanguka, (Aleluya!) atweba  
 tukasanguka!

Kechi kujipo kintu kyakonsha kukanya kubula kusanguka ne. Kechi mujipo bademona bavula mu kalunga kabafu ba kunkanya mba mbule kusanguka ne. Kechi kujipo bintu byavula kutu kumo bya kunkanya mba mbule kusanguka ne. Amiwa njina mulaye wakwa Lesa. Amiwa njina Mupashi Wazhila. Amiwa njina Zoe, Bumi bwa Peenape bwa Lesa, buubena kukokoloka mumwe. Awe mubiji wakala wanyama wafumine kokwa, kabiji Lesa wafukamijile kufumya mu mushiji. Kabiji Aye Yeka wafukamijile kufumya mu mushiji. . .

<sup>273</sup> Kimye Amiwa byo nakomene, pano, kimye kyonse kyo Ng'umvwa ngengele ya kipwilo, Kintu kimo kyamba kwi amiwa, songwalume mwanjike wamucheche. Awa Malaika waambile kufuma mukipupu, amba, "Kechi ukapepepo fwaka nangwa kutoma ne. Njina na mwingilo ye ukengila. Kuzhilulula mubiji obe ne, nangwa kunyema nyema na banabakazhi ne bintu bikwabo ne. Obewa, Njina kintu kimo kyobe kya kuuba inge wakoma."

"Yenu Bang'anyi? Yenu Bang'anyi?"

<sup>274</sup> "Ukayuka byavula pa kyokyo kulutwe." Pakupita kimye, Aye waishile. Aye wamwekele peulu pa kimye kya lubatizhilo. Aye wimwasha Ayemwine. Aye wisapula Ayemwine. Aye ukumbula. Amiwa namumona Aye kasa aimana peulu, konse konse, pa kuboko konse.

<sup>275</sup> Mukoba byepi, inge Aye wandengele ami kwikala byonka Byonji, kwakubula kwikalapo na kyakusala ne. . . ? Amiwa kechi nabwelele kokwa kunyuma ne kwaamba mba, "Pano, charlie Branham, obewa usongole Ella Harvey pakuuba mba mukandete amiwa pantanda ne." Ine, mwane. Amiwa kechi najingapo na kyakusala ne. Lesa ye waubile kyokyo.

Kabiji inge Aye wandengele ami byonka Byonji, kwakubula kusalulula ne; pano ibyepi kukilapo, umvwe Mupashi Wazhila waiya wafukamina, kabiji Naamba mba, "Ee, Nkambo, Anweba yenu Mulenga wami. Nemutemwa Anweba, kabiji Nemwitaba Anweba kwikala Mupulushi wami!" Mwakonsha byepi kundama amiwa mu lukungu? Kechi mwakonsha kwikyuba ne, mulongo. Kechi mwakonsha kwikyuba ne.

<sup>276</sup> Lesa kechi walengelepo lubaji lumu lwa yuwe kaushamu, nangwa potashi, nangwa kintutu kikwabo ne, akyo kikekala kya—kya konaunwatu ne. "Bonse Bataata bo Baapa, kintendekesho kya inontanda kasa kikyanyge kwaalwa, bakeya kwi Amiwa." Woo! Naumvwa nobe mbena kukeba kubijika;

kyakishika byo Naumvwa. “Bonse Bataata bo Baapa bakeya kwi Amiwa, kabiji kafwapo nangwa umu ukataika, bino Amiwa kamusangula jibiji mu lusanguko.” Amiwa namumvwine Aye kwita, byo Naishile kwi Aye. Bakonsha byepi kundama mu lukungu lwa pantanda? Kechi kujipo bavula bakalama panopantanda bakunshata mu kilungu na fosholo ne, bakonsha kundama amiwa mulukungu lwa pantanda ne. Amiwa juba jimo kasanguka kabiji kemana mu kipasha Kyanji, waomvwewa mu Mashi Anji, wasemwa ku Mupashi Wanji! Aleluya! Ikalai na madinominesheni onse o mukeba; Amiwa kasenda Yesu. Amena!

<sup>277</sup> Aye musokeshi wa ku yishuwalasi waishile kwi amiwa. Wilmer Snyder, mulunda nami wawama. Aye waambile mba, “Billy, Nakeba ku kupotesha muzhilo wayishuwalasi.”

<sup>278</sup> Naambile mba, “Amiwa njinaji kala.” (Mukazhami wakeketele, nobe ke akebe kwamba, “Kika kyo ubena kubepela bubela, mulunda?”)

Waambile mba, “Uji na yishuwalasi?”

Naambile mba, “Ee, mwane.”

Waambile mba, “Ing’anyi kapanyi kowaubako? Kyokika?”

<sup>279</sup> Naambile mba, “Lwapeshiwa luketekelo, Yesu ye wami, oo, pa kutatwila na lukumu lwa Bulesa! Swanyi wa lupulukilo, wapotwa na Lesa, wasemwa ku Mupashi Wanji, waomvwewa mu Mashi Anji.”

<sup>280</sup> Aye waambile mba, “Akyo kyawama, Billy, bino kechi kikakubika mu kilende ne.”

<sup>281</sup> Naambile mba, “Kikafumyamo.” Aleluya! Amiwa kechi nasakamana namambo akutanwa momwa ne; kana kulupukamo.

<sup>282</sup> Nanchi, Amiwa njina yishuwalasi imbula mba, “Nkasangula. Bonse Bataata bo Baapa bo Bami.” Amiwa kechi natako muchima kyo bauba bataata, byauba bamaama ne, biji kintu kyonse ne. “Bonse Bataata bo Baapa bakeya kwi Amiwa, kabijikafwako nangwa umu wakonsha kwiya kwakubula Ba Taata kumukoka ne.” Aleluya! Kika Aye kyo ebakokejile? “Amiwa ne bayukijile jimo kintendekesho kya inantunda kasa kikyanyye kwaalwa. Byo Naipaille Mwanamukoko, Namwipajile pamo Nanji.” Amena. “Amiwa natongwejile jimo Kipwilo.” Kika kiji mu kutongwelwa jimo? Akya Kipwilo. Mutwela byepi mu Kipwilo? “Konka ku Mupashi umu ko twabatizhilwa mu Mubiji umu.” Aye wayukile, kitendekesho kya ino ntnda kasa kikyanyye kwikalako, amba tukekala konka. “Kabiji abo bo Ayukijile jimo, ibo bo Aita. Abo bo Aita, bo Abingisha. Abo bo Abingisha, ibo bo Atumbijika.”

<sup>283</sup> Mu ma Buuku akwa Lesa, Aye waamba mba Ukakumanya ponka pano. Kechi kujipo bonse demona ba ku kalunga kabafu

bakonsha kwi balamina kuntu kukwabo ne kanatu baiya konka kuno, mambo Lesa waamba kala, kabiji akyo kya ikajikwa kala. Inge myaka aduleendi bbilyoni ntanda kasa ikyangye kulengwa, bantanda bakumakya baimbile pamo kabiji ne baana ba Lesa babijikile na lusekelo, kasa ku kyangye kwikala kintendekesho kya inontanda, monai, kasa ku kyangye kwikala kintende- . . . , kabiji aba ba Malaika ne bintu byonse byajinga na lusekelo, kasa babena kubijika pa kyokyo, kasa ku kyangye kwikala kintendekesho kya ino ntanda, pano nga diabola wakonsha byepi kundama amiwa mu lukungu lwa pantanda? Kechi bakonsha kwikyuba ne. Uji bulongo.

<sup>284</sup> Twayai tumone, pano. Akye ke kimye bwanabwabene kyo Njinakyo, kuno. Apo kwashalatu mamineti tweti kufika pa leveni. Aye ke mamineti tweti kufika pa teeni. Abyo ibyo nyi, Mulongo Wood? Abyo ibyo, mamineti tweti kufika pa teeni. Bonse mwasangalala nyi?

Oo, Amiwa mbena kukeba kuya,  
Amiwa mbena kukeba kuya;  
Nzubo Yami ya Mwiulu yawama ne kutoka,  
Kabiji Mbena kukeba kuya.

Oo, Amiwa mbena kukeba kuya,  
Amiwa mbena kukeba kuya;  
Nzubo Yami ya Mwiulu yawama ne kutoka,  
Kabiji Mbena kukeba kuya.

<sup>285</sup> Mwiitemwa nyimbo yakala byonkabya nyi? Kwajingapo umo wakala ye twaimbanga, kiji nobe bibye, “Bupe ne lusa byataaine. Konka kwa Ntanda wa Kumakya wasamine.” Kyo kika, Nyenga Gertie? Twayai tumone. Baanga. . . Kyokika, Mulongo Neville? Monaiipo kintu kimo, “Bupe ne lusa byataaine. Konka kwa Ntanda wa Kumakya wa mwesheshe Lwanji. . . ? . . . pe amiwa.” Uu-uu. Ee. “Ku kalvali.” Tupe pa kusawila pe yeo, nyenga, amba, *Kekale Ku Kalvali*. Iya kuno, Mulongo Neville. Oo, Natemwa iye. Baanga batemwa iye nyimbo yakala yashingwa? Mwakonsha kwikala na yenu yonse ya kutolauka-peulu-nepanshi na bimbisho-byakatataka byo mwakonsha kukeba. Mpai yuwe, “Apo ipo bupe ne lusa popo byataaine.” Abyo ibyo. Kijitu bulongo, bitende bitende pano.

Yesu, ngikale kwipi na kalvali,  
Kuji nsulo yawama,  
Yatutu kubonse, kakola ka lubuko,  
Kufuma ku mutumba wa Kalvali.

Kalvali, kalvali,  
Katotanga myaka;  
Ne byo kafika konka  
Nakukokoloka kubushiya bwa mukola.

<sup>286</sup> [Mulongo Branham watatula kunyinyita *Kekale Ku Kalvali*—Waku.] Oo, byo kyawama! Kilangulukaitu! Pano

umvwe kechi kwajinga Mupulushi ne? Pano byepi inge kechi twajinga na kikye Kyambo ne? Pano inge kechi Wakwiichile ne? Pano inge kechi Wakuyukijile jimo ne, kabiji inge ujitu mubibye byashala bya muntanda bufuku buno? Wamutemwa Aye nyi? Oo, ami! Kechi mulubeko kupwila mu lukeelo kelo ne, pano, pa naini-sate.

Kalvali, kalvali,  
 Katotanga myaka;  
 Ne byo kafika konka  
 Nakukokoloka kubushiya . . .

<sup>287</sup> Pano tupai pa kusawila *Mpuzha Pa Yoya Nsulo*. Awe ke lwimbo wawama wakala, “Ko iji mpuzha pa yoya Nsulo.” Baanga bamuyuka? “Mpuzha, mpuzha, ee, ko iji mpuzha, mpuzha pa yoya Nsulo.” Umvwe mwamwimba pano, jiwi ja mushi mwimbai, yilubaiko anweba bene, kabiji imunai yewa mulongo. Mwayukatu, ko iji mpuzha ya bonse ba Methodist. Ko iji yaba Baptist. Ko iji mpuzha yaba Pentekositi. Ko iji mpuzha ya atweba bonse pano, pa yoya Nsulo. Baanga bayuka lwimbo wakala? Oo, kine mwayuka. Anweba bamo batanshi-kupwila pano, awe wawama, lwimbo wakala wa ku Kentucky.

Mpuzha, mpuzha . . .

Imunai maboko.

. . . ee, ko iji mpuzha,  
 Paji mpuzha yenu payoya Nsulo;  
 Mpuzha, mpuzha, ee, koiiji mpuzha,  
 Paji mpuzha yenu pa yoya Nsulo.

Oo, mpuzha, mpuzha, koiiji mpuzha yabaya,  
 Paji mpuzha yenu payoya Nsulo;  
 Oo, mpuzha, mpuzha, ee, koiiji mpuzha,  
 Paji mpuzha yenu payoya Nsulo.

<sup>288</sup> Pano, Njina kya kwi mukumisha anweba. Yonse mbila yakatakata, ne mabuuku, kabiji ne bintu byonse, bisa kupoteshiwa ku lubaji lukwabo lwa kipwilo, mulungu wiya, pa mbung'eno yonse; matepu ne bintu byonse, ne bonse, mu mabuuku awama. Kukekala tebulu kunyuma kokwa, mu kibamba kimo kya bibamba. Kabiji byanembwa, busapwishi bwa katataka, ne byanembwa byawama bya nembelwe patanshi, mu mabuuku apya, anembwa katataka, byonse bikatanwapo, kabiji ku—ku mpelo ya kishimikwa, pa Kisatu kibena kwiya bufuku.

Kabiji atweba twaketekela kwikala na—na kimye kyawama mwi Nkambo. Mukeye, kasa mulomba, pano. Bino, mukete benu bakolwa ne bamanyikwa, mwibanembela kalata. Mukebalete muno. Atweba tukooba . . . Lesa ukamweka na bulume. Kabiji twayuka mba Aye ukekyuba.

289 Kabiji papo Nafika ku muntu yense ye Nayuka, mba ujipo na kintu kimo kicheche. Inge pajipo kintu kimo kyufuma mujishinda, anweba vulukai, Amiwa ne mubuuujile kimye kyapita kunyuma namba, byonse tukulolapo. Kabiji Nayuka mba muno muji mupashi wapusanako na yewa wajingamo kala. Mwamona? Mwamona? Mwamona? Abyo ibyo. Bino, kechi mu muleke afumemo ne. Amiwa ne mukambizha ku meso akwa Yesu Kilishitu, kechi mu muleke afumemo ne. Ikalai nanji monka muno, monai, anweba wamishaipo kabiji ne kuya kulutwe. Anweba mwi balongo na balongo. Kechi ke mulongo wenu nangwa nyenga uba kintu kyatama; ke yewa mupashi wakwa diabola utwela pakachi kenu. Monai, aye uzhololoka. Kabiji mumvwinaike lusa mulongo nangwa nyenga, kabiji yukaitu mba Satana watwela pakachi kenu. Inge mujipo na kintu kimo pa kikye, kifumyaimo bukiji bukiji mwi anweba, mwamona, mambo kikemuja. Ee, byo kikoba. Nanchi, fumaiko kwi aye. Anweba vulukaitu.

Paji mpuzha, mpuzha, mpuzha yabaya,

Paji mpuzha yaba Methodist, mpuzha yaba Baptist, mpuzha yaba Presbyterian. Paji mpuzha yabonse.

Mpuzha, mpuzha, ee, koiji mpuzha,  
Paji mpuzha yenu pa yoya Nsulo.

290 Baanga bavuluka lwimbo wetu wakala ye twalupwilangamo bantu, nanchi?

Yanga Najo ja kwa Yesu,  
Mwaana wabulanda ne wamalwa;  
Jikakupa lusekelo ne lutekenesho,  
Yanga Najo konse konse.

Nanchi inge mwaikala netu, Mulongo Jeffreys, anweba ne Nyenga Jeffreys, ne basongwalume koko, kabiji ne bonsetu.

Pa Jizhina ja Yesu nakufukama,  
Kupona kikuvumene ku mauulu Anji; (Oo, ami!)  
Mfumu wa bamfumu Mwiulu Aye  
tukamuvwika,  
Kimye lweendo lwetu byo lukapwa.

Yanga Najo ja kwa Yesu,  
Jo Jikebo Jobe;  
Oo, mukimye kya lweseko,  
Lomba Wijitele Jazhila.

Oo, Natemwa kyokyo. Ngobe? Aja Jizhina jawama ja Yesu! Pano, twayai twimane ponka pano, kimye kyo tubena kwimba. Kijitu bulongo.

Yanga Najo ja kwa Yesu,  
Mwaana wabulanda ne wamalwa;  
Jika... (...?. ...)

Oo jawamisha!  
 Luketekelo lwa ntanda ne lusekelo lwa  
 Mwiulu;  
 Jizhina Jawama (Oo jawama Jizhina), Oo  
 jawamisha!  
 Luketekelo lwa ntanda ne lusekelo lwa  
 Mwiulu.

<sup>291</sup> Awe wapusanako pacheche. Twayai tukunyike mitwe yetu  
 pano, kabiji, kwimbilatu mushi, twayai tusutuleko kuboko  
 kumo. Ne kwamba mba:

Pa Jizhina ja Yesu nakufukama,  
 Kupona kikuvumene ku maulu Anji,  
 Mfumu wa mfumu Mwiulu Aye tukamuvwika,  
 Kimye lweendo lwetu byo lukapwa.  
 Jizhina byo Jawama, Byo janemesha!  
 Luketekelo lwa ntanda ne lusekelo lwa  
 Mwiulu;  
 Ee, Jizhina jawama, Oo, jawamisha!  
 Luketekelo lwa ntanda ne lusekelo lwa  
 Mwiulu.

<sup>292</sup> Namitwe yetu yatwajijila na kukunyikwa, atweba...  
 [Mulongo Branham watatula kunyinyita *Yanga Najo Ja Kwa*  
*Yesu—Waku.*]



*KIKA KYO TWABUJILA KWIKALA DINOMINESHANI?* KDE58-0927  
(Why Are We Not A Denomination?)

Ino Mbila na Mulongo William Marrion Branham, yalupwilwe patanshi mu Kizungu pa Kibelushi mabaanga, Kainyainya 27, 1958, ku Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)